

MGA PAGTULON-AN




Alang sa Madaugon
nga Kinabuhi



(†) Bishop Cenen Mascardo Sr, ThD, DD
Bishop Faulkner Mascardo, PhD, DM, DCBL
Prophet Bethel James Mascardo Sr, PhD, DMin, EdD

Si Ginoong Hesus kaniadto gipangutana sa daghang mga tawo mahitungod sa mga pagtulon-an sa kinabuhi; natubag na kini. Kita ingon nga iyang mga magtutuo angay usab nga magtuon sa mga pagtulon-an nga iyang gitudlo.

Naga-ingon Siya sa Iyang pulong, “15 Ako ang maayong magbalantay sa mga karnero. Nakaila ako sa akong mga karnero ug ang akong mga karnero nakaila kanako sama nga ang Amahan nakaila kanako ug ako nakaila sa Amahan. Ug ako andam sa pagpakamatay alang sa akong mga karnero.” Juan 10:15



Copyright © 2020 by DR. FAULKNER MASCARDO
Mga Pagtulon-an 2 Alang sa Madaugon nga Kinabuhi

All rights reserved under
International Copyright Law.



TALAAN SA MGA HILISGOTAN

1. ANG TINUOD NGA IKAW	5
2. BAG-O NGA KINABUHI	7
3. ADUNA KA NAY KINAIYA UG KINABUHI SA DIOS	8
4. NAHIMO KA NGA PAGKAMATARONG SA DIOS	10
5. SA KORTE SA LANGIT IKAW DILI NA SAD-AN	13
6. IKAW GIBALAN NA	15
7. IKAW MAY KAGAWASAN NA	17
8. ANG SPIRITU SA DIOS KANUNAY MAGPABILIN DIHA KANIMO	18
9. ANG LINGGUWAHE SA TAWO NGA MAY BAG-O NA NGA ESPIRITU	20
10. NGANONG MAGSULTI KITA OG LAING MGA PINULONGAN	24
11. MGA LAHI NGA PINULONGAN: KASINATIAN ALANG SA IKADUHA NGA KASABOTAN	26
12. UNSAY MAS MAAYO: PAG-AMPO UBAN SA PANABOT O PAGSULTI OG PINULONGAN	28
13. MGA LAHI NGA PINULONGAN + HUBAD= MENSAHE SA DIOS	30
14. ANG LABING BALANG PAGTOO	33
15. ANGAY KITA NGA MOAPIL SA MGA PANAGTIGUM	35
16. ANG KAMATUORAN SA PAGKA-KRISTOHANON	38
17. PAG-PUASA: MAG-IMPLUWENSIYA KANIMO, DILI SA DIOS	40
18. ANG HUSTONG PANAHO SA PAG-AMPO UG PAGPUASA	42
19. ANG PAG-AMPO DILI HAGO	45
20. PADAYON SA PAGTUBO PINAAGI SA PULONG	47
21. ANG PRINSIPYO SA PAGHATAG OG PAGDAWAT	50
22. ANG TINUOD NGA KATAGBawan	52
23. ANG DAMGO SA DIOS ALANG KANIMO	54
24. MGA SEKRETO SA KALAMPUSAN	56
25. PAMAAGI SA DIOS SA PAGLIMPYO KANIMO	58
26. ANG ADLAW NGA IGPAPAHULAY	60
27. ANG MGA GASA NI GINOONG HESUS ALANG SA PAGDUMALA SA SIMBAHAN	64
28. ANG MGA APOSTOLES SA SIMBAHAN	66
29. ANG MGA PROPETA SA SIMBAHAN	72
30. ANG MGA EBANGHELISTA SA SIMBAHAN	75
31. ANG MGA PASTOR SA SIMBAHAN	77
32. ANG MGA MAGTUTUDLO SA SIMBAHAN	78
33. ANG PAGKAPARI SA IKADUHAN KASABOTAN	80
34. ANG IGLESIA GIPAKASAMA SA BUILDING	83
35. ANG IGLESIA GIPAKASAMA SA PANIMALAY	85
36. ANG IGLESIA GIPAKASAMA SA LAWAS SA TAWO	86
37. ANG IGLESIA GIPAKASAMA SA USA KA PANGASAW-ONON	88
38. ANG MATAG-USA INGON NGA BAHIN SA LAWAS NI CRISTO	90
39. UNSAON PAGTUKOD SA IMONG KINABUHI?	93
40. NGANONG MOSANGYAW MAN KITA SA EBANGHELYO?	95

PASIUNA

Kining ikaduha nga libro sa Mga Pagtulon-an, nasulat tungod sa nakita namo nga dakong panginahanglan sa daghan mga magtutuo. Bisan tuod ug nag-una na sa langit si Bishop Cenen Mascardo, Sr., apan ang iyang mga pagtulon-an nahiapil dinhi ni nga libro.

Sa kadaghan sa mga magtutudlo karong panahona, nahimong usa ka dakong pangutana sa kasagarang mga tawo kung unsa ang insakto nga pagtulon-an og asa gayud ang pundok nga gawali sa tinuod nga Pulong sa Dios.

Alang sa mga ministro, pastors o magbalantay sa mga katawhan sa Dios, dili sayon ang pagmatuto sa usa ka tawo nga bag-o pa nga nahimugso diha sa Pamilya sa Dios. Tungod niini, naningkamot kita sa pagtigom og mga pagtulon-an nga gisulat sa Cebuano aron magamit nato sa kasayon aron nga makatabang ang matag-usa sa pagpaambit og pagpasabot sa Pulong sa Dios.

Ang among tinguha nga ang matag usa kanato makahimo sa pagtudlo ngadto sa uban sa tanan nga inyong nakat-unan gikan sa alagad sa Dios sumala sa giingon sa 2 Timoteo 2:2. Dili ang tanan maka-kopya sa panahon sa mga Bible Studies og mga Sunday Services, busa naningkamot kita sa pagpahiluna sa mga pipila ka mga importanteng pagtulon-an nga makatabang gayud kanato sa pagpahigawas sa atong kaugali-on gikan sa mga gapos og prisohan sa kalibog og pagka-ignorante sa kamatuoran.

Maoy among pag-ampo nga kitang tanan mahigugma sa pagtuman sa dakong kamanduan sa Dios diha sa Mateo 28:19-20 (19) nga naga-ingon “Panglakaw kamo sa tibook kalibutan og himoang mga tinun-an ang tanang katawhan sa tibuok kalibutan. Bunyagi sila sa ngalan sa Amahan, sa Anak, ug sa Espiritu Santo (20) ug tudloi sila pagtuman sa tanan nga akong gisugo kaninyo. Ug hinumdomi! Ako maga-uban kaninyo sa kanunay hangtod sa kataposan sa kapanahonan.

(+) Bishop Dr. CENEN D. MASCARDO, SR.
Bishop Dr. FAULKNER MASCARDO
Prophet Dr. BETHEL JAMES MASCARDO

1

ANG TINUOD NGA IKAW

Labaw pa ka sa lawas nga imong nakita. Ang imong lawas mao ang imong bayanan o kaha nga nagsal-ob sa imong senses (sa paglantaw, sa pagpaminaw, sa paghikap, pagtilaw ug sa pagpahimaho). Sa sulod sa imong lawas, adunay gapuyo nga mas importante pa kay sa imong lawas. Mao kini ang spiritu, ug mao kini ang tinuod nga ikaw. Kini nga tawo nga anaa sa sulod maoy gihisgutan sa Biblia diha sa 1 Pedro 3:4 ***“Apan tinguhaa hinuon ang katahom nga naggikan sa sulod ninyo, katahom nga walay paglubad nga mao ang malumo ug matam-is nga kinaiya nga bililhon kaayo sa atubangan sa Dios.”***

Sa dihang mamatay ang lawas sa tawo, ang spiritu magpadayon kining buhi. Mao lang gihapon siya sa niadtong naa pa siyay lawas. Walay mawala kaniya gawas lang sa paglihok niya sa pisikal nga kalibutan. Dili na siya kagunit sa bisan unsay materyal nga mga butang kay wala naman siya pisikal nga lawas. Oo, patay na tuod ang lawas apan ang spiritu nagapadayon pa kini. Ang spiritu sa tawo naa pa gihapoy panghuna-huna og pagbati.

Ang Ginoong Hesu-Kristo nagsaysay og usa ka sugilanon diha sa Libro ni Lucas 16 mahitungod sa duha ka tawo nga namatay. Ang usa kanila makililimos nga ginganlan og Lasaro. Ang punto dili nga siya usa ka makililimos; apan nga bisan siya kabos, naangkon niya ang pagkamatarong sa Dios. Sa dihang siya namatay, gidala siya sa sabakan ni Abraham. Ang ikaduha nga tawo nga namatay mao ang usa ka adunahan o dato kaayo sa pinansiyal og materyal nga mga butang. Hilabihan niya kahayahay dinhi sa kalibutan apan wala gayud siya nagkinabuhi sumala sa plano sa Dios para kaniya.

Sa dihang siya namatay, ang iyang lawas gilubong usab, apan si Hesus nga nagsaysay niini nga sugilanon miingon nga didto sa impyerno, ang tawong dato mihangad og naglantaw kang Lasaro nga atua sa dapit ni Abraham og nakaila pa gani siya kang Lasaro. Nagpasabot kini nga makakita pa gyud diay siya. Dayon iyang gisangpit si Abraham nga “tabangi ako”. Nagpsabot kini nga makasulti pa gihapon siya bisan og patay na ang lawas. Si Abraham mitubag kaniya og nadungog niya ang gisulti ni Abraham. Nagpasabot kini nga makadungog pa gyud diay siya. Ang dato miingon nga giuhaw siya og ang dapit nga iyang gipuy-an nag-uga kay wala may tubig busa init kini. Nagpasabot kini nga makabati pa gihapon diay siya bisag patay na.

Ang tanan niya nga sentido (senses) naa pa gyud diay. Wala ra nawala bisag patay na ang iyang lawas. Gani, kanumdom pa man siya sa kalibutan kay misulti man siya, ***“27Ang dato mitubag, ‘Kon mao kana, Amahan, hangyoon ko ikaw nga imo untang ipadala si Lazaro ngadto sa amo 28 kay aduna akoy lima ka igsoong lalaki. Paadtoa siya aron kapasidan-an sila aron dili mahianhi niining dapit sa kasakitan.’ ”*** Busa, klaro kaayo nga nakahinumdom pa diay siya.

Kini gapahibalo kanato nga ang spiritu sa tawo mopadayon ra gyud diay bisag patay na ang lawas. Ug sa dihang ang tawo mitoo kang Cristo, natawo siya diha sa

Gingharian sa Dios. Ang iyang tawhanong spiritu natawo sa spiritohanon nga dapit. **2 Corinto 5:17** *Kay bisan kinsa nga nahiusa kang Cristo, bag-o na siyang binuhat. Ang daan miagi na ug ang bag-o miabot na.* **18** *Gibuhat sa Dios kining tanan ug siya usab ang nagpasig-uli kanato ngadto kaniya pinaagi kang Cristo ug gihatagan kita niya sa buluhaton sa pagpasig-uli sa uban ngadto kaniya.*



2

BAG-O KA NGA BINUHAT

Karon nga gihatag na nimo ang imong kinabuhi diha kang Hesu-Cristo, imo na Siya nga Ginoo karon. Dili na ikaw sama kaniadto. Bag-o na ka. Anak na ikaw sa Dios. Taga langit na ka. Bisan og naa pa ikaw dinhi sa kalibotan. Tingali sa panggawas nimo nga panagway dili makita ang kalainan kay wala man mausab ang imong dagway sa dihang natawo ang imong spiritu sa Gingharian sa Dios, apan ang imong sulod nausab gayud kini sa hingpit. Mao kini ang pasabot sa giingon sa **2 Corinto 5:17** *“Kay bisan kinsa nga nahiusa kang Cristo, bag-o na siyang binuhat. Ang daan miagi na ug ang bag-o miabot na.”*

Dili ka nireporma, dili ka “refurbished” o gilimpyonhan og gipasinawan lang, wala ka gi “renovate”; bag-o gyud ka nga binuhat- bag-o ka nga tawo. Apan, ang katinuoran nga bag-o na ang sulod nga tawo, wala kini nagpasabot nga lahi naka sa panggawas. If mobo lang ang imong buhok sa dihang mitoo ka og midawat ni Cristo ingon nga imong Ginoo og Manluluwas, ang style og kamoboon dili kini mausab. Mao ra gihapon ang imong pisikal nga dagway, negosyo o trabaho, pamilya og mga silingan.

Ang punto mao nga ang imong mga bili sa kinabuhi o values nausab; aduna kanay bag-o nga mga tinguha og pamatasan tungod kay ang imong spiritu nausab naman. Dili man kini diha-diha makita dayon nimo og sa uban ang imong kausaban, apan makamatikod ka lang gayud nga mawala ang mga kagana sa mga naandan nimo nga mga dili maayo nga binuhatan kay ang spiritu nga bag-o nga natawo sa sulod kanimo liwat man sa Dios.

Ang Dios nahimo nimong Amahan pinaage sa imong pagtoo kang Hesu-Cristo. Siya ang magbag-o og mag-usab kanimo tungod kay nagpuyo naman Siya sa sulod sa imong pagkatawo. Sama nga ang usa ka tawo nagpuyo og usa ka balay, siya ang manilhig, manglimpyo, manghugas, manglaba og moatiman sa balay, mao usab ang buhaton sa bag-o nga spiritu nga nagpuyo sa imong pagkatawo nga mao ang imong lawas og kalag. Ang spiritu momando sa imong kalag og ang imong kalag momando sa imong lawas. Ug tungod kay Balaan naman ang spiritu nga nagpuyo kanimo kay kini anak man sa Spiritu sa Dios, matingala ka na lang sa imong kausaban tungod sa imong pagkabag-o nga binuhat.

3

ADUNA KA NAY KINAIYA UG KINABUHI SA DIOS

Ingon nga naanak ka diha sa Espiritu, nahimo kanang anak sa Dios ug adunay katungod ingon nga anak. Sumala sa nasulat ni Apostol Juan:

Juan 1:12

12 Apan kadtong midawat ug misalig kaniya gihatagan niya sa katungod nga mahimong mga anak sa Dios. 13 Nahimo silang mga anak sa Dios dili sa tawhanong paagi o pagbuot. Ang Dios mismo mao ang naghimo kanilang iyang mga anak.

Gihatag sa Dios ngadto sa spiritu sa tawo ang Iyang Kinaiya (o nature) og ang Iyang Kinabuhi. Karon, ikaw may bag-o og Diosnon nga kinabuhi na. Kini mao ang kinabuhi sa Dios nga gikahatag sa tawo PINAAGE lamang kang Hesu-Cristo.

1 Juan 5:11-13

11 Ang pagpamatuod mao kini: ang Dios naghatag kanato sa kinabuhing walay kataposan ug anaa kini sa iyang Anak. 12 Ang midawat sa Anak may kinabuhing walay kataposan. Apan ang wala modawat sa Anak sa Dios wala makabaton sa maong kinabuhi. 13 Gisulatan ko kamong tanan nga nagtuo sa ngalan sa Anak sa Dios aron masayod nga kamo may kinabuhing walay kataposan.

Pagkadako gayud niini nga pribiliheyo! Pwede ka nang moambit sa tanang gitagana sa Dios ingon nga imong panulondon.

2 Pedro 1:3-4

3 Ang iyang diosnong gahom naghatag kanato sa tanan tang gikinahanglan alang sa pagkinabuhi nga diosnon pinaagi sa atong kahibalo mahitungod kaniya nga nagtawag kanato aron makaambit kita sa iyang himaya ug kaayo. 4Niining paagiha iya kitang gihatagan sa bililhon ug dagkong mga gasa nga iyang gisaad. Pinaagi sa maong mga gasa makalikay kamo sa makadaot nga mga kailibgon sa kalibotan ug makaambit sa diosnong kinaiya.

Ang Dios nahimo na nimo karon nga imong Amahan. Sa unsa nga paagi? Diba ang kinaiyahan o nature bunga man kini sa pagka-anak o pagkaliwat? Mao na nga ang bunga sa mangga, kanunay gyud nang mangga. Ang anak sa baboy, baboy usab. Ang anak sa manok, manok usab. Dili ba niingon ang Juan 1:12-13

“12 Apan kadtong midawat ug misalig kaniya gihatagan niya sa katungod nga mahimong mga anak sa Dios. 13 Nahimo silang mga anak sa Dios dili sa tawhanong paagi o pagbuot. Ang Dios mismo mao ang naghimo kanilang iyang mga anak.”

Aduna Siya’y inamahang gawi, pagtagad og pag-atiman kanimo. Ikaw sakop na sa Pamilya sa Dios, busa heavenly citizen o langitnong lumolupyo ka na. Ang Dios nagbaton og responsibilidad sa Iyang kaugalingon nga atimanon ka!

Filipos 4:19

Ug ang akong Dios magsangkap sa tanan ninyong gikinahanglan sumala sa naghingapin niyang bahandi diha ni Cristo Jesus.

Aduna Siyay maayong plano alang kanimo og nagsugod kini pagkatuman sa dihang nahimo kang anak diha sa Spiritu. **IKAW USA KA HINIGUGMA NGA ANAK SA USA KA MAHIGUGMAONG AMAHAN SA LANGIT UG KARON SAKOP KA NA SA PAMILYA SA GUGMA.** Importante kaayo ang pagkasayod niini nga kamatuoran. Gihatagan ka og bag-o nga kinabuhi aron nga mahimo kang sakop sa Paghari sa Mahigugmaon nga Dios.

Ang Biblia nagpahibalo nga ang Dios naghatag sa Diosnon nga klase sa kinabuhi o Eternal Life. Mao kini nga kinabuhi nga makapahimo sa imposible nga posible tungod kay ang sulod niini nga kinabuhi mao ang Dios. Mao kini nga kinabuhi ang nagpildi sa kamatayon sa lawas ni Hesus. Mao kini ang KINABUHI SA PAGKABANHAW. Ug kini nga kinabuhi mao nay imong bag-o nga kinabuhi.

Ang kadto lamang mga tawo nga midawat sa Anak mao ra ang nakabaton niini nga kinabuhi tungod kay kini nga kinabuhi gisulod man og gidala sa Anak (Basaha pagbalik ang 1 Juan 5:11-13). Busa, mao kini ang modala nimo kanunay sa taas nga dapit og kahimtang sa kinabuhi. Huna-hunaa gayud kini: Dili mahitabo nga ang Dios mapildi, mapukan og maguba. Busa, mao pud kini ang mahitabo sa imong kinabuhi sugod karon nga nasayod ka na niini nga Maayong Balita.

Roma 8:11

“Kon nagpuyo sa inyong kasingkasing ang Espiritu sa Dios nga nagbanhaw kang Jesus, siya nga nagbanhaw kang Cristo mohatag usab ug kinabuhi sa inyong madunot nga lawas pinaagi sa iyang Espiritu nga anaa kaninyo.”

4

NAHIMO KA NGA PAGKAMATARONG SA DIOS

2 Corinto 5:21 RCPV

Walay sala si Cristo apan gipakamakasala siya sa Dios aron kita, sa atong pagkahiusa kaniya, makabaton sa pagkamatarong sa Dios.

Kung ato kining basahon sa King James Translation, “...made him to be sin for us... made the righteousness of God in Him”. Medyo adunay sayop sa hubad sa Cebuano.

2 Corinthians 5:21 KJV

For he hath made him to be sin for us, who knew no sin; that we might be made the righteousness of God in him.

Huna-hunaa nga ang Dios naghimo o nag perform og NATURE-TRANSPLANT o nagbalhin sa kinaiyahan. Gihimo si Hesus nga sala alang kanato, aron nga mahimo kitang PAGKAMATARONG SA DIOS.

Mao kini hinungdan nga pwede na si Hesus mamatay sa kamatayon sa usa ka makasasala agi og puli sa imong dapit. Ang resulta sa Iyang kamatayon mao nga ikaw karon may pagkamatarong na sa Dios. Pwede kana makatindog atubangan sa trono sa Dios Amahan nga walay pagkabalaka sa imong mga apan, kabalaka, kahadlok, kaluhayon og mga kasal-anan tungod kay giduphan ka sa atong Manluluwas nga si Cristo Hesus.

Hebreohanon 10:9-10

9 Unya miingon siya, “Ania ako, O Dios, aron pagtuman sa buot mong ipabuhat kanako.” Busa gisalikway sa Dios ang tanang mga karaang sakripisyo ug giilisan kini sa sakripisyo ni Cristo. 10 Tungod kay gituman ni Jesu-Cristo ang buot ipabuhat sa Dios kaniya, nahinloan kitang tanan sa sala pinaagi sa paghalad sa iyang kaugalingong lawas sa makausa lamang ug alang sa tanang panahon.

Roma 5:1-2

1 Kay gihimo na man kitang matarong sa Dios pinaagi sa pagtuo, may panagdait na kita uban sa Dios pinaagi sa atong Ginoong Jesu-Cristo. 2 Pinaagi kaniya makahimo na kita sa pagpahimulos sa grasya sa Dios diin nagkinabuhi kita karon ug nagmalipayon diha sa paglaom nga makaambit gayod kita sa himaya sa Dios.

Ngano man nga Iya kining gibuhat? Tungod kay nahigugma Siya kanimo.

Sofonias 3:17

17 Ang Ginoo nga inyong Dios anaa uban kaninyo; ang iyang gahom maghatag kaninyog kadaogan. Malipay kaninyo ang Ginoo, ug diha sa iyang gugma hatagan kamog bag-ong kinabuhi. Magmalipayon siya nga moawit tungod kaninyo.

Adunay mga tawo nga nagdako sa tinuohan nga ang Dios kono himantayon sa mga sala sa tawo, ug tungod kay ang kalibutan napuno man kono sa sala, nasuko Siya sa matag-usa. DILI kini tinuod. Dili ingon niana. Ang Dios DILI na maghuna-huna sa imong sala. Kaniadto naghuna-huna Siya niini ug maoy hinungdan nga Iyang gipadala si Cristo Hesus aron masulbad ang Iyang nakita nga problema.

Sa dihang si Hesus namatay didto sa krus, ang problema sa sala nasulbad na hangtud sa kahangtoran. Busa, ingon nga magtotoo ka na ni Hesus, ang sala dili na kini problema pa. Pamalandongi kini nga kamatuoran:

2 Corinto 5:21 RCPV

Walay sala si Cristo apan gipakamakasala siya sa Dios aron kita, sa atong pagkahiusa kaniya, makabaton sa pagkamatarong sa Dios.

Mao kini ang giingon sa English nga pinulongan “DIVINE EXCHANGE”. Sa ato pa, adunay nahitabo nga pagbaylo. Nakita na nimo? Ang Dios wala na diay galagot pa nimo. Iyang gisolusyonan ang problema sa sala DIHA kang Cristo og PINAAGE kang Cristo. Roma 6:14 Kinahanglan nga dili na kamo magpaulipon sa sala kay dili na man kamo ilalom sa balaod kondili ilalom na sa grasya sa Dios.

Unsa ra man ang angay nimo nga buhaton?

1. Mao lang ang pagsalig sa Iyang pagkamatarong nga Iyang giregalo alang kanimo og ayaw na pagsalig sa imong kaugalingong pagkamatarong. Ikaw ang bunga og resulta sa giantos ni Hesus aron maluwas ang tibook kalibotan.
2. Dawata ang Iyang regalo alang kanimo diha sa imong kinasoluran.
3. Pagkinabuhi diha sa Iyang himaya og grasya, dili sa imohang tinawhanong pagpaningkamot uban sa paghinumdom nga wala na Siya nasuko kanimo apan excited o mahinangpon nga gani Siya sa imong kinabuhi.

2 Corinto 5:19

Maoy among mensahe nga ang Dios pinaagi kang Cristo nagpasig-uli sa tanang tawo ngadto sa iyang kaugalingon. Ang Dios wala na mag-isip sa ilang mga sala, ug gihatagan kami niya sa mensahe unsaon niya pagpasig-uli kanila ngadto kaniya.

Kini nga bersikulo nagpahibalo kanato sa sulod sa hunahuna sa Dios. Matarong kana sa mata sa Dios! Ayaw padala sa unsay storya sa mga tawo mahitungod sa imong pagkatawo. Ang tinuod nga mas nakaila kanimo mao ang imong Langitnong Amahan. Gihigugma ka NIYA!

Salmo 89:15-17

15 O Ginoo, pagkamalipayon sa mga tawo nga nagsimba kanimo pinaagi sa mga awit; nga nagpuyo diha sa kahayag sa imong kaluoy. 16 Naglipay sila tibuok adlaw tungod kanimo ug nagdayeg kanimo 17 Gihatagan mo kamig mga dagkong kadaogan; tungod sa imong gugma gipadaog mo kami

ISUGID KINI:

AKO ANG PAGKAMATARONG SA DIOS DIHA KANG CRISTO HESUS. ANG SALA WALA NAY GAHOM IBABAW NAKO. ANG AKONG LANGITNONG AMAHAN NAGMAYA UBAN KANAKO UBAN SA PANAG-AWIT, UG ANG AKONG KINABUHI MAGDALA KANUNAY OG KALIPAY SA DIOS, MAGPAHIMUOT KANIYA SA TANANG PAAGI. AKO ANG IYANG KORONA. AKO ANG IYANG PERLAS NGA BILILHON. HIMAYA PARA SA AMAHAN!



5

SA KORTE SA LANGIT IKAW DILI NA SAD-AN

MGA BUHAT 13:38-39

*Busa mga igsoon ko, angay kamong masayod nga pinaagi kang Jesus gisangyaw diha kaninyo ang **kapasayloan** sa mga sala. Ug hibaloi ninyo nga ang tanan nga nagtuo kaniya naluwas sa tanang mga sala—butang nga dili mahimo sa Balaod ni Moises.*

Ang ubang English nga hubad niini nga bersikulo dili “forgiveness” apan “remission” kay gikan man kini sa Greek nga teksto nga “Aphesis”. Ang ubang mga maghuhubad dili sigurado kung kanus-a gamiton ang pulong “forgive” ug kung kanus-a pud gamiton ang pulong nga “remit”. Busa, sa nagkadaiya nga mga hubad, ang uban naggamit og “forgiveness” o kapasayloan samtang ang uban pud naggamit sa pulong nga “remission” o kalimpyohan o pagpapas sa sala.

Sama pananglitan, ang King James Version naggamit og “forgiveness” imbis “remission” nga pareho sa Cebuano nga atong mabasa sa ibabaw.

Ang REMISSION mao ang hingpit nga pagwagtang sa sala. Sa Greek Septuagint (Griego nga Hubad sa Unang Kasabotan), adunay pulong nga gigamit sa Levitico 25:10 nga kapareho sa pulong nga REMISSION; og mao kato ang pulong nga LIBERTY o kagawasan, nagpasabot kini nga gibuhian o na released na.

Party niana nga bersikulo mao kini, “10 Balaana ninyo ang ika-50 nga tuig ug **pahatagig kagawasan** ang tanang mga lumolupyo sa tibuok ninyong yuta. Niining tuiga ang tanang kabtangan nga nabaligya mahibalik ngadto sa karaang tag-iya niini o sa iyang mga sumusunod. Ug bisan kinsa nga gibaligya ingon nga ulipon mopauli sa iyang banay.

PAHATAGIG KAGAWASAN! Mao kini ang gusto sa Dios. Mao kini ang hubad sa Greek Septuagint nga teksto sa “Aphesis”. Busa, ang atong isangyaw mao ang kagawasan sa tawo gikan sa tanang kasal-anan ug ang mga benepisyo, epekto og resulta sa giantos ni Cristo alang kanato, ug dili lang ang kapasayloan.

Ingon nga ang mga utang sa mga tawo kaniadto sa Unang Kasabotan na kanselar tungod sa Jubilee o ika 50 ka tuig, ang kagawasan o remission sa Ikaduhang Kasabotan mao usab ang pagwagtang o paghugas o pagpapas sa atraso o utang o sala sa tawo, nga daw wala siyay record sa libro sa Dios ug nga daw walay nahimo nga daotan sa mata sa Dios. Ang kapasayloan o “forgiveness”, sa listahan sa libro makita pa man gud nga ikaw daghan og sala apan gipasaylo lang, samtang sa kagawasan o remission, wala gayud nahabilin nga record sa imong mga atraso batok sa Dios.

Mga Taga-Colosas 2:14

'Gipapas niya ang tanan tang mga utang lakip ang mga kasabotan bahin niini ug giwagtang niya ang tanan pinaagi sa paglansang niini didto sa krus. '

Sa Iyang pagpapas sa imong kasal-anan, ang sala nimo og ikaw nagbulag na. Wala na kadtoy labot sa imong kinabuhi og sa mata sa Dios kay gihukman na kadto diha sa lawas ni Hesus. Busa, sa Korte sa Balaod, wala kanay atraso pa. Oo! Tuohi kini nga kamatuoran.

Mga Buhat 13:39

*"Ug hibalo niyo nga ang tanan nga nagtuo kaniya (**Hesus**) naluwas sa tanang mga sala—butang nga dili mahimo sa Balaod ni Moises."*

Ang buot ipasabot niini mao nga "acquitted" naka; dili na ka pwede nga hukman pa sa ikaduha nga hukom. Gihukman na ka nga dili naka sad-an pa kay humana ang hukom alang sa imong mga sala. Kanus-a? 2,000 na katuig ang milabay. Si Hesus maoy niangkong sa tanan nimong mga sala (Nilabay man, karon man o bisan pa sa umaabot). Dili naka "guilty" pa. Taliwala sa imong daghang mga sala, tungod kay gipapas naman kini sa libro sa langit tungod sa dugo ni Cristo Hesus, kitang tanan mga gawasnon na (remitted).

Posible ba kini? Oo, mao kini ang paagi sa Dios aron ang tawo mahimong matarong. Butang nga dili mahimo sa tawo. Ang paagi sa Dios nga ang tawo mahimong matarong mao nga KINAHANGLAN NGA KITA MOTUO KANG CRISTO HESUS.

Roma 3:23-26

*23 Nakasala ang tanan ug nahilayo sa himaya sa Dios. 24 Apan pinaagi sa grasya nga gigasa sa Dios ngadto kanila, mahimo silang matarong pinaagi kang Cristo Jesus nga nagluwas kanila. 25 Gihatag siya sa Dios aron pinaagi sa iyang dugo mapasaylo ang mga sala sa motuo kaniya. Niining paagiha gipakita sa Dios ang iyang pagkamatarong ug tungod sa iyang pagkamapailubon wala niya tagda ang ilang mga sala kaniadto. 26 Apan karon gitagad na niya ang mga sala sa mga tawo aron pagpakita nga siya matarong **ug himoon niyang matarong ang tanan nga motuo kang Jesus.***

2 Corinto 5:19

Maoy among mensahe nga ang Dios pinaagi kang Cristo nagpasig-uli sa tanang tawo ngadto sa iyang kaugalingon. Ang Dios wala na mag-isip sa ilang mga sala, ug gihatagan kami niya sa mensahe unsaon niya pagpasig-uli kanila ngadto kaniya.

PAG-AMPO:

LANGITNONG AMAHAN, nag-ampo ako alang sa mga makasasala sa tibuk kalibutan karong adlaw nga samtang mamati sila sa Maayong Balita, ang ilang kasing-kasing maabli sa pagdawat sa kapapasan sa kasal-anan nga imo nang gigasa alang sa tanan pinaage sa mga pag-antos ni Hesus nga akong Ginoo aron nga masinati sa tanan ang imong pagkamatarong, grasya og panalangin, sa ngalan ni Cristo Hesus nga akong Ginoo. Amen.

6 IKAW GIBALAAN NA

1 Corinto 6:11 RCPV

*Ang pipila kaninyo sama gayod niana kaniadto. Apan **nahugasan na kamo sa inyong mga sala ug gihalad na kamo ngadto sa Dios.** Gimatarong na kamo sa Dios pinaagi sa ngalan sa Ginoong Jesu-Cristo ug pinaagi sa Espiritu sa atong Dios.*

1 Corinthians 6:11 KJV

*And such were some of you: **but ye are washed, but ye are sanctified,** but ye are justified in the name of the Lord Jesus, and by the Spirit of our God.*

Ato sa ibutang nga ikaw nahulog sa hugaw nga gahong, hilabihan ang kabaho og kahugaw sa lungag nga diin ikaw nahagbong. Adunay tawo nakakita kanimo og mitabang sa paghaw-as kanimo gikan sa gahong. Busa, luwas naka gikan sa pagkahagbong. Ang sunod na nimo nga buhaton mao na ang pagkaligo og paglimpyo sa imong tibuok lawas. Nakasinati naka nga nakalingkawas na sa dapit sa kahugaw, apan ang kahugaw og kabaho wala pa makagawas o mawala sa imong lawas. Kini nga imong angayan nga buhaton nagkinahanglan og oras og pagabuhaton.

Matud pa sa **1 Corinto 6:11**...*nahugasan na kamo sa inyong mga sala ug gihalad na kamo ngadto sa Dios.*

Ang PAGKABALAAN adunay duha ka pakli o hugna:

UNA, si Ginoong Hesus nagkuha kanimo gikan sa yanang sa kahugaw sa sala. Nagpasabot kini nga natawo na ikaw diha sa spiritu sa dihang mitoo og midawat ka sa iyang gitanyag nga kaluwasan. Ang Biblia nagdiklara nga ikaw nahugasan na sa mga sala ug gihalad na ngadto sa Dios; gibalaan ka na sa Ginoo gikan sa kalibutan nga mao ang imong spirituhanong gahong kay ikaw **alang lamang Kaniya og para lang Kaniya.**

IKADUHA, imo nang kuhaon ang hugaw nga nitapot sa imong kalag pinaage sa pagsubmitar sa awtoridad sa Pulong sa Dios.

Roma 12:2

Ayaw kamo pagpahiuyon sa pamatasan niining panahona. Ipabag-o hinuon sa Dios ang inyong kaugalingon pinaagi sa pagbag-o sa inyong panghunahuna aron masayran ninyo ang kabubut-on sa Dios—unsay maayo, hingpit ug makapahimuot kaniya.

Ang pagbag-o sa imong huna-huna usa kini ka mapadayonon nga proseso samtang anaa pa ka niini nga kalibotan. Ang imong huna-huna nabansay og naanad nga motutok (o mo-focus) lamang sa usa ka paagi nga mao ang paglantaw sa tanang butang nga makita ayha pa ka motoo. Karon, pinaagi sa pagbag-o sa inyong panghunahuna, imong gitugotan ang imong kaugalingon nga molantaw sa tanang panghitabo og butang sama sa nilantawan sa Dios. Usbon nimo pagbansay o pag-anad ang imong huna-huna sumala sa nakita sa Dios og dili sumala sa nakita sa

imong physical nga mga mata. Niining paagiha, mausab napud ang imong sinultihan, pamaagi og mga resulta kay giusab man nimo ang imong nilantawan. Lantaw sama sa Dios. Unsaon? Lantawa ang Pulong sa Dios alang sa tanang sitwasyon.

Juan 17:16-19

16 Sama nga ako dili iya sa kalibotan, dili usab sila iya sa kalibotan. 17 Balaana sila diha sa kamatuoran; ang imong pulong kamatuoran. 18 Gipadala ko sila sa kalibotan sama nga ako imong gipadala nganhi sa kalibotan. 19 Ug tungod kanila gitugyan ko ang akong kaugalingon nganha kanimo aron maimo usab sila.

Ang kamatuoran lamang maoy makapabalaan sa atong panghuna-huna nga mao ang ikaduhang pakli sa pagkabalaan. Dili kini madala og pinugos, pabuotan-buotan sa mata sa mga tawo. Kung walay Pulong, walay Kamatuoran. Ug kung walay kamatuoran, walay pagkabalaan sa atong panghuna-huna.

Apan, kung nangandoy ka nga magamit gyud og maayo sa Spiritu sa Ginoo ang imong kaugalingon, tumana lang ang tambag ni Apostol Pablo ngadto ni Timoteo ang pastor sa Efeso kaniadto:

2 Timoteo 2:4-5

4 Gusto sa usa ka sundalo nga mahimuot ang iyang labaw busa dili siya mag-apil-apil sa kalihokan nga walay labot sa iyang pagkasundalo. 5 Ang usa usab ka magdudula nga moapil sa lumba dili gantihan kon dili mosubay sa mga lagda.

GIGAHIN KA SA DIOS GIKAN NIINI NGA KALIBOTAN PINAAGE SA PAGSALIG SA GIBUHAT NI HESUS DIDTO SA KRUS, APAN KINAHANGLAN USAB NGA MAUKAL ANG KALIBOTAN NGA NAA SA IMONG HUNA-HUNA PINAAGE SA PAGDAWAT SA AWTORIDAD SA PULONG SA DIOS ALANG SA TANAN NIMO NGA MGA DESISYON OG PLANO.

ISUGID KINI:

AKO GIBALAN SA DIOS KAY IYANG GAMITON ALANG SA IYANG DAKO OG MAAYO NGA KATUYOAN. MAPADAYONON ANG AKONG KAUSABAN KAY AKO MAMATI MAN SA PULONG SA DIOS. MATAG-ADLAW AKO MAGAKAHAMTONG SA SPIRITUHANON NGA BAHIN UG DIHA SA PANGHUNA-HUNA KAY ANG SPIRITU SA DIOS NAGAPADAYON MAN SA PAGTUDLO KANAKO NGADTO SA KAHINGPITAN. SA NGALAN NI CRISTO HESUS. AMEN.

7

IKAW MAY KAGAWASAN NA

Colosas 1:12-14

12 Pasalamat ni ninyo ang Amahan nga naghimo kaninyong takos sa pag-ambit sa gitagana sa Dios alang sa iyang katawhan didto sa gingharian sa kahayag. 13 Kay giluwes kita niya gikan sa gahom sa kangitngit ug gidala ngadto sa gingharian sa iyang hinigugmang Anak 14 nga maoy naglukat kanato ug nagpasaylo sa atong mga sala.

Niadtong panahon nga imong gidawat si Cristo Hesus sa imong kinabuhi ingon nga maoy labaw nimo- Ginoo, Hari ug Manluluwas sa imong kinabuhi, nahimong sakop sa Pamilya og sa Gingharian sa Dios. Nagpasabot kini nga walay si bisan kinsa nga daotang spiritu nga gikan sa impierno ang makahilabot og maguba kanimo. Wala nakay obligasyon o responsibilidad sa bisang unsang kasabotan sa kaaway nga imong nasudlan kaniadto- nasayod man ka niini o wala. Dili kana ulipon sa bisan unsang sakit, addiction, balatian, katalagman, problema o mga gapos. Ngano? *13 Kay giluwes kita niya gikan sa gahom sa kangitngit ug gidala ngadto sa gingharian sa iyang hinigugmang Anak 14 nga maoy naglukat kanato ug nagpasaylo sa atong mga sala. Colosas 1:12-14*

Ang Biblia nagsaysay nga ang Dios nagluwas kanato gikan sa gahom sa kangitngit ug gidala kita Niya ngadto sa gingharian sa Iyang Hinigugmang Anak- ang Iyang Anak mismo mao ang expression o pagpadayag sa Iyang gugma. Dili kana angay pa nga mahadlok sa bisan unsa nga klase nga daotang spiritu. Ang Dios maoy Magbalantay og ang Iyang mga mata nagalantaw kanunay alang sa imong proteksiyon.

Salmo 23:1-6

1 Ang Ginoo mao ang akong magbalantay, ug walay nakulang kanako.

2 Gipapahulay niya ako sa mga lunhawng sibsibanan ug gitultolan niya ako sa tin-aw nga katubigan.

3 Gilig-on niya ako. Gitultolan niya ako sa dalan nga angay kong subayon, tungod ug alang sa iyang ngalan.

4 Bisang pag maglakaw ako sa ngitngit nga walog sa kamatayon, dili ako mahadlok kay nag-uban ka man kanako;

gipanalipdan mo ako pinaagi sa imong sungkod ug bunal.

5 Giandaman mo akog pagkaon atubangan sa akong mga kaaway.

Gidihogan mog lana ang akong ulo ug gipaawas mo ang akong kupa.

6 Ang imong kaayo ug gugma mag-uban kanako sa tibuok kong kinabuhi; ug magpuyo ako sa balay sa Ginoo hangtod sa kahangtoran.

Ang Biblia nagsulti usab nga: “36 Kon ang Anak maghatag kaninyog kagawasan, mahimo gayod kamo nga mga tawo nga gawasnon.” (**Juan 8:36**). Ang Dios naghimo sa tanang nga mitoo ni Cristo Hesus nga gawasnon. Ug karon ikaw may kagawasan na kay sa spirituhanon nga kahimtang ikaw anaa nagpuyo sa dapit sa Dios. Dili mo man kini makita sa imong physical nga mga mata, apan mao kini ang kamatuoran. Dili naka ilalom sa gahom og panggobyerno ni satanas kay ikaw karon anaa na sa gingharian sa Dios.

8

ANG SPIRITU SA DIOS KANUNAY MAGPABILIN DIHA KANIMO

Dugang nga benepisyo sa imong pagka-anak sa Dios mao ang pag-abot sa Spiritu sa Dios sa imong kinabuhi og magpuyo diha kanimo og magpabilin kanunay diha kanimo. Sa dihang ang Spiritu sa Dios mipuyo diha sa imong lawas, nagsugod Siya sa paglamdag kanimo sa Iyang kabubut-on ug gipasabot ka Niya sa Iyang mga Pulong.

Busa, sa dihang magtuon ikaw sa Biblia, aduna kanay bag-o og pinasahe nga PANABOT diha sa imong spiritu; ug kining tanan nga imo gayung masabtan kay gusto ang Amahan nga magamit kini sa imong kinabuhi. Bililhon kaayo ang mga pagtulon-an sa Biblia.

Laing pa nga mahimo sa Espiritu sa Ginoo diha kanimo mao nga ikaw IYANG PAHINUMDOMAN sa Pulong ni Hesu-Cristo (John 14:26). Hatagan usab ikaw Niya og GAHUM aron mahimo kang epektibo nga mopamatuod o mosaksi sa Maayong Balita nga gidala ni Cristo dinhi sa kalibotan.

Mga Buhat 1:8

Apan kon mokunsad na kaninyo ang Espiritu Santo, makadawat kamog gahom ug mahimo kamong akong mga saksi sa Jerusalem, sa tibuok Judea ug Samaria ug sa tibuok kalibotan.”

Dugang pa, kung imong tun-an ang Lucas 24:49, makita nimo nga ang Ginoong Hesus nagtudlo sa Iyang mga tinun-an nga mohulat sa Jerusalem hangtud nga mapuno sila sa Espiritu sa Dios, tungod kay nasayod man gud Siya nga ang Iyang mga tinun-an nagkinahanglan gayud og Langitnong Gahom sa pagbuhat sa Iyang Langitnong sugo dinhi sa kalibotan. Gani, sa tanang ministeryo sa atong Ginoo dinhi sa kalibotan, wala gyud Siyay gihimo nga dili pinaage sa Espiritu sa Dios.

Ang Amahan nga Iyang gihisgotan diha mao kadto ang Espiritu nga nagpuyo diha sa Iyang lawas kay ang Espiritu maoy hinungdan nga Siya naanak sa kalibotan pinaage ni Maria.

Juan 5:19

Busa miingon si Jesus kanila, “Sultihan ko kamo: ang Anak walay mahimo sa iyang kaugalingon. Nagbuhat lamang siya sa nakita niya nga gibuhay sa iyang Amahan. Ang gibuhay sa Amahan, gibuhay usab sa Anak.

Mateo 1:18b

... Apan sa wala pa sila magtipon nakamatikod si Maria nga nagsabak siya pinaagi sa gahom sa Espiritu Santo.

Juan 14:10-11

10 Wala ka ba motuo, Felipe, nga ako anaa sa Amahan ug ang Amahan ania kanako? Wala maggikan kanako ang mga pulong nga gisulti ko kaninyo. Ang Amahan nga ania kanako nagbuhat sa iyang kaugalingong buluhaton. 11 Tuohi ninyo nga ako anaa sa Amahan ug nga ang Amahan ania kanako. Kon dili kamo motuo sa akong gisulti, panuo kamo kanako tungod niining maong mga buhat.


Zacarias 4:6b

...“Molampos ka, dili pinaagi sa kusog o sa imong gahom kondili pinaagi sa akong espiritu.

Sumala sa mga bersikulo nga atong nabasa, gihisgotan sa atong Ginoo ang Amahan nga nagpuyo diha Kaniya pinaage sa Iyang Espiritu; ug kini mao ang hinungdan nga kahibulongan gayod ang Iyang mga nahimo og nabuhat dinhi sa kalibotan.

Sa sama nga paagi, ang mga milagro, sinyales og mga kahibulongan nga mahitabo sa atong mga ministeryo ug ang mga maayo nga epekto niini dili kini tungod sa pagpaningkamot sa tawo kondili pinaage sa Espiritu sa Dios nga nagpuyo usab diri kanato. Mga trabaho kini sa Espiritu sa Dios nga nagpuyo sa sulod sa atong pagkatawo.

Mao kini ang pinakadako nga hinungdan nganong gipadala diri kanato og gipapuyo ang Iyang Espiritu kanunay sa atong pagkatawo. Sa dihang mamati kita kanunay sa Iyang Pulong, mohamtong gayud kita og mahimong mas epektibo pa sa atong pag-alagad sa Ginoo.



9


ANG LINGGUWAHE SA TAWO NGA MAY BAG-O NA NGA ESPIRITU

Ang Tawo usa ka spiritu, apan adunay kalag ug siya nagpuyo sa lawas.

1 Mga Taga-Tesalonica 5:23

'Hinaot unta nga ang Dios nga naghatag kanatog kalinaw hingpit nga maghimo kaninyong balaan aron walay makitang salawayon sa tibuok ninyong pagkatawo—sa espiritu, kalag ug lawas hangtod sa pag-abot sa atong Ginoong Jesu-Cristo. '

Ang lawas sa tawo mao kini ang balay sa kalag. Ug ang kalag maoy puy-an sa Espiritu.



Ang Dios Espiritu busa aron masabtan Siya, makigsulti Siya kanimo diha magsugod sa imong spiritu, dili sa lawas. Ang tinuod pud nga pagsimba mahimo lamang diha sa spiritu, dili sa lawasnon nga paagi. **Juan 4: 24-** *Ang Dios Espiritu ug kadtong magsimba kaniya kinahanglang magsimba diha sa espiritu ug sa kamatuoran."*

Juan 3:5-7

5 Si Jesus mitubag, "Sultihan ko ikaw: walay makasulod sa Gingharian sa Dios gawas kon matawo siya pinaagi sa tubig ug sa Espiritu. 6 Ang gianak sa tawo, tawo usab. Ug ang gianak sa Espiritu, espiritu usab. 7 Ayaw ikahibulong nga ako nag-ingon kanimo nga kinahanglan magpakatawo kamo pag-usab.

Sa dihang ang ikaw naanak diha sa Spiritu, ang imong spiritu bag-o na. Mao nang hinungdan miingon si Apostol Pablo sa **2 Corinto 5:17-18**- *“17 Kay bisan kinsa nga nahiusa kang Cristo, bag-o na siyang binuhat. Ang daan miagi na ug ang bag-o miabot na. 18 Gibuhat sa Dios kining tanan ug siya usab ang nagpasig-uli kanato ngadto kaniya pinaagi kang Cristo ug gihatagan kita niya sa buluhaton sa pagpasig-uli sa uban ngadto kaniya.*

Ang Dios pinaage sa Iyang Spiritu maoy naghatag sa tawo og bag-o nga spiritu. Tungod niini, naghatag usab Siya og bag-o nga lingguwahe ug kini nga pinulongan mao ang gipasabot ni Apostol Pablo nga “pinulongan sa mga anghel” (1 Corinto 13:1).

Pagkahoman sa pagkabanhaw sa atong Ginoo sa wala pa Siya mokayab sa langit, nagbilin Siya og mga importante nga sumada sa kinaiya sa bag-o nga spiritu sa tawo. Iyang gihatag ang mga timaan sa mga mahimo sa Bag-o nga Tawo.

Marcos 16:17-18

17 Ug mao kini ang mga timaan nga mabatonan sa mga motuo: sa akong ngalan maghingilin silag mga yawa ug manulti silag lainlaing mga sinultihan. 18 Makakupot silag mga halas ug kon makainom silag hilo, dili sila maunsa. Itapion nila ang ilang mga kamot sa mga masakiton ug mangaayo sila.”

Sa dihang misulti niini ang atong Ginoo, **“mao kini ang mga timaan nga mabatonan sa mga motuo”**, wala Siya nagsaad ani. Daghan ang nasayop sa pagsabot niini. Nagtuo ang uban nga saad pa kini sa atong Ginoo. Dili na. Angay nimo nga masabtan nga ang atong Ginoo niining panahona, nakigsulti sa Iyang mga tinun-an mahitungod sa umaabot nga pundok sa mga tawo nga mao ang SIMBAHAN o IGLESIA. Mao kini ang gipasabot ni Pedro sa

1 Pedro 2:9-10

“9Apan kamo mao ang piniling katawhan, ang mga harianong pari ug ang balaang nasod. Gipili kamo sa Dios aron maiya ug aron magsangyaw sa mga kahibulongang buhat sa Dios. Gitawag kamo niya gikan sa kangitngit ngadto sa iyang katingalahang kahayag. 10Kaniadto dili kamo katawhan sa Dios apan karon katawhan na kamo niya. Kaniadto wala maluoy ang Dios kaninyo apan karon gikaluy-an na kamo.

Mao ni sila ang gipasabot sa atong Ginoong Hesus nga ang mga timaan mosunod sa mga motoo. Busa, kung ikaw nitoo sa Awtoridad o Ngalan sa Ginoong Hesu-Kristo ug naanak sa Espiritu, usa pud ka sa gihisgotan diha sa Marcos 16:17-18. Mailhan pud ka pinaage niana nga mga timaan.

Sa mga panahon nga ang atong Ginoo nagpuyo dinhi sa kalibotan, ang Spiritu wala pa mianhi aron magpuyo sa kalibotan. Mianhi lamang Siya sa dihang ang atong Ginoo naglingkod na sa Iyang trono didto sa Langit.

Juan 14:16-17

16 Mangayo ako sa Amahan ug hatagan kamo niyag laing Magtatabang aron makig-uban kaninyo hangtod sa kahangtoran. 17 Siya mao ang Espiritu sa

kamatuoran. Ang kalibotan dili makahimo pagdawat kaniya kay dili man kini makakita o makaila kaniya. Apan kamo nakaila kaniya kay nag-uban siya ug nagpuyo diha kaninyo.

Sumala sa atong gibasa, misaad ang atong Ginoo nga mangayo Siya sa Amahan og laing Magtatabang aron makig-kauban hangtod sa kahangtoran- Siya mao ang Spiritu sa Pagkabalaan (Balaan nga Spiritu) nga mao nay mopuyo diha kanimo og magpabilin nga uban kanimo hangtod sa kahangtoran.

Mga Buhat 2:1-4

1 Sa pag-abot na sa adlaw sa Pentecostes, ang tanang magtutuo nagtigom sa usa ka dapit. 2 Ug sa kalit may haguross gikan sa langit sama sa kusog nga huros sa hangin ug milukop kini sa tibuok balay nga ilang gitigoman. 3 Unya nakakita silag daw mga dila nga kalayo nga nagtungtong diha sa matag usa kanila. 4 Silang tanan napuno sa Espiritu Santo ug misultig nagkalainlaing pinulongan sumala sa gipasulti kanila sa Espiritu.

Mao kini ang panghitabo sa dihang ang Spiritu mikunsad sa kalibotan ug kining 120 ka mga magtutuo nga naghulat didto sa taas nga lawak sa balay mao ang pinaka-una nga mga Kristohanon nga nakadawat sa Spiritu ug sa mga pinulongan (dila) nga daw kalayo. Niingon ang Biblia nga “Silang tanan napuno sa Espiritu Santo ug misultig nagkalainlaing pinulongan sumala sa gipasulti kanila sa Espiritu.” (Mga Buhat 2:4).

Gikan niadto nga panahon nga ang Spiritu sa Dios mikunsad nga daw sama sa kusog nga haguross sa hangin, wala na gayod Siya mibiya pa sa kalibotan. Gani, nagapuno Siya sa matag magtutuo ug nagasangkap sa tanang gahom nga gikinahanglan sa tanang magtutuo sa Ginoong Hesu-Kristo aron mahimong epektibo sa tahas nga gihatag nga mabuhat sa Iyang lawas- Ang Simbahan. Ang Espiritu sa Dios maoy “in charge” o tigdumala sa mga anak sa Dios dinhi sa kalibotan. Siya karon ang Boss sa church. Siguradohon Niya nga han-ay ang tanan o malamposon ang bulohaton.

Unsa may angay buhaton sa mga magtutuo sa Ginoo? Mao ang pagdawat sa Spiritu nga maghimo kanimong Balaan. Kung ikaw nahimo nang anak sa Dios, kinahanglan pa nimo nga mapuno sa Spiritu. Unsay kwalipikasyon? Ang imo rang kaluwasan maoy gipangita sa Spiritu. Karon, kung mitoo ka ni Hesus og midawat ka nga Siya mao ang imong Ginoo og Manluluwas, luwas kana. (Roma 10:9-10). Ug kay luwas ka na, pwede ka nang mapuno sa Spiritu sa Dios. Pwede na pud kang mo-claim o modawat sa imong mga gasa nga gikan sa Spiritu sumala sa 1 Corinto 12:8-10

Mga gasa nga gikan sa Spiritu sa Dios:

1. Mensahe sa Kaalam
2. Mensahe sa Kahibalo
3. Pagtoo
4. Pag-ayo sa mga masakiton
5. Paghimo sa mga milagro
6. Pagsulti sa mensahe sa Dios o propesiya
7. Pag-ila sa nagkalain-laing mga spiritu

8. Pagsulti og lahi-lahi nga pinulongan
9. Pagsabot sa kahulogan sa mga lahi-lahi nga pinulongan sa spiritu

Kung gusto ka nga modawat niini, karon dayon isulti kini nga mga pag-ampo:

Mahinatagon nga Amahan sa Langit, nagpasalamat ako sa imong gipadala nga Spiritu nga nagdala sa mga gasa nga imong gihatag para sa Imong mga anak. Ingon nga imong anak, karon ako nang dawaton ang mga gasa. Karon ako puno na sa imong Spiritu. Karon ako magasulti na usab og lain-laing mga pinulongan nga spirituhanon sumala sa giya sa Imong Spiritu, sa ngalan ni Hesu-Cristo nga akong Ginoo. Amen.

Karon tungod sa imong pagtoo, nadawat na nimo kini diha sa spirituhanon nga aspeto. Ablihi nalang ang imong baba og pagsugod sa pagdayeg sa Ginoo sa Iyang pagkamaayo og pagkagamhanan. Matingala ka nalang nga adunay mga pinasahe nga mga pulong nga manggawas sa imong baba nga dili nimo kini tuyoon sa paglitok. Ang presensya sa Spiritu nga anaa kanimo naghimo na kanimo karon nga labaw na sa ordinaryo nga tawo. Lantawon ka, mosulti og molakaw diha sa pisikal daw walay nausab, apan ang ikaw mismo ang nahimong tabernakulo o templo o pinuy-anan sa Spiritu sa Dios. Gadala kana sa gahom og kinabuhi sa Dios diha kanimo.



10

NGANONG MAGSULTI KITA OG LAING MGA PINULONGAN

“Ang pagsulti og lahi nga mga pinulongan nagtukod og nagporma kanimo.”

Sa dihang naanak ikaw diha sa Spiritu og napuno sa Spiritu sa Ginoo, ang gahom sa Dios niabot og nagpuyo na diha kanimo. Kini nga gahom maaktibo kini og makalihok sa dihang magsugod ka sa pagsulti og mga lahi nga spirituhanong pinulongan.

1 Corinto 14:4 “Ang nagsulti ug lahi nga pinulongan naglig-on sa iyang kaugalingon...”

Ang Griego o Greek sa pulong NAGLIG-ON mao ang **“oikodomeo”**, nga nagpasabot:

- A. Nagkonstrak o nagtukod og usa ka inprastruktura o building;
- B. Nagpalubas;
- C. Nagpalig-on
- D. Nagkarga ug gahom (nga sama sa baterya nga gikargahan)

Busa, kining 1 Corinto 14:4 nagtudlo kanato nga ang tawo nga nagsulti og lahi nga pinulongan nagkonstrak o nagtukod og usa ka inprastruktura o building; Nagpalubas; Nagpalig-on Nagkarga ug gahom sa iyang kaugalingon.

Sa dihang mohatag ka og panahon sa pagsulti og lahi nga pinulongan, imong gitukod og gilig-on ang imong kaugalingong pagkatawo.

Judas 20

Apan kamo, mga hinigugma, padayon kamo paglig-on diha sa inyong labing balaang pagtuo. Pag-ampo kamo diha sa Balaang Espiritu.

Sa dihang gasulti ikaw sa lahi nga pinulongan, imong gikargahan ang imong kaugalingong pagkatawo ug gipa andar og gipainit nimo ang among gahom sa Dios nga nagpuyo diha sa sulod nimo. Dayon ang kusog og ang himaya sa Dios magsugod nga mapadayag pinaage sa imong kinabuhi. Kung ikaw usa ka kristiyano nga huyang, gikinahanglan gayod nimo ang pagsulti og lahi nga pinulongan tungod sa dihang buhaton mo kini, ang gahom nga nahimong nahikatulog lang diha kanimo mapaandar na kini og malig-on ka gayod aron sa pagbuhat sa mga bulohaton sa Dios.

Ang pagsulti og lahi nga pinulongan ubanan sa pagsugid sa mga Pulong sa Dios makapahimo kanimo nga higanti sa spirituhanon nga bahin. Wala ka gasulti og spirituhanong mga pinulongan nga walay kahulogan. Hinuon nagadeklarar ikaw og mga misteryo og mga sekreto sa pagpaanindot sa kinabuhi sa mga anak sa Dios. Nagasulti ikaw og mga pulong nga makapausab sa dagan sa imong kalibotan.

Ang pagsulti og lahi nga pinulongan maoy tubag o solusyon sa kahadlok og katalaw. Kung talawan ka sa kinabuhi, pagsulti na og mga lahi nga pinulongan. Isip

kristohanon, angay kang masayod nga ang Dios wala gahatag kanimo og spiritu sa pagkatalawan kondili GAHOM og gugma ug pagpugong sa kaugalingon. (2 Timoteo 2:1).

Pa-andara ang gahom nga anaa kanimo pinaage sa pagsulti og lahi nga pinulongan. Mas dako ang gahom nga anaa kanimo kaysa ni bisan kinsa nga tawo niining kalibotana nga walay Spiritu ni Cristo sa ilang kinabuhi. Busa, ayaw kahadlok kung naay manghilabot kanimo. Ayaw pagpakilooy kanila. Pagsulti lang og lahi nga pinulongan. Mobali ang bati nga kahimtang. Sila na hinoon ang magpakilooy kanimo kay sa dihang magsulti ka og lahi nga pinulongan, ang mga anghel maoy motrabaho sa imong mga gisulti.

Adunay usa ka babaye nga nakasinati nga na “kidnapped” siya. Ang iyang gibuhay mao lamang ang pagsigeg sulti sa lahi nga pinulongan. Gipahilom siya sa mga tawo nga nagdala kaniya apan misinyas siya nga dili niya kapugngan ang iyang baba sa pagsulti sa lahi nga pinulongan. Wala madugay sa dihang gisakay siya og usa ka van, nanaog og nanalagan ang mga kidnappers og wala na mamalik pa. Siya nalang ang nahabilin. Busa, miuli nalang pud siya sa ilang balay. Hallelujah!

Ang pagsulti og lahi nga pinulongan makapahunong sa imong kahadlok. Mao kini ang makapakusgan og makapaisog sa imong spiritu nga tungod niini mahimo nimo ang pagmando og pagbuot sa imong mga kaaway. Walay limitasyon kung unsay mahimo sa Spiritu sa Dios alang kanimo kung magsige ka og sulti og lahi nga mga pinulongan. Ug buhaton gayud Niya kini sa tanan nga motoo og mosalig Kaniya. Apan, kung nagduha-duha ka sa maayo nga epekto sa pagsulti og lahi nga pinulongan, wala gayod kini mahimo sa imong kinabuhi. Ang imong pagsalig maoy giagad sa Spiritu.

Kung mobalik kita sa paglantaw sa nahitabo sa Unang Kasabotan, sa matag panahon nga mokunsad ang Spiritu ngadto ni Samson, mausab siya; gikan sa pagka ordinaryo ug kusog ngadto sa pagka dili ordinaryo ug kusog. Sa pila lang ka minoto ang iyang dihug o hiyas mapa-andar dayon. Gani sa Maghuhukom 16:3 mabasahan nato nga,

“3 Apan si Samson natulog hangtod sa tungang gabii. Unya mibangon siya og gials sa niya ang ganghaan sa siyudad lakip ang mga sira, mga haligi, mga trangka ug uban pa. Gipas-an niya kini og gidala ngadto sa tumoy sa bungtod nga nagdungaw sa Hebron.”

Si Samson gikargahan ug insakto nga gahom nga maoy hinungdan nga nahimo niya ang dili mahimo sa ordinaryong mga tawo. Kung nahitabo kini sa Unang Kasabotan nga ang Spiritu sa Ginoo mokunsad lang sa limitado nga oras aron mahimo nila ang gipabuhay sa Dios kanila, unsa pa kaha sa atong panahon nga niabot Siya og nagpuyo na kanunay sa sulod kanato! Dalaygon ang Ngalan sa atong Ginoong Hesu-Cristo!

11

MGA LAHI NGA PINULONGAN: KASINATIAN ALANG SA IKADUHA NGA KASABOTAN

Ang pagsulti og lahi nga pinulongan usa kini ka panghitabo alang sa ikaduha (Bag-o) nga kasabotan. Ang mga magtotoo sa Dios kaniadto sa unang kasabotan, dili kahibalo mosulti og lahi nga pinulongan, apan kita nga nailalom sa ikaduhang kasabotan makahimo sa pagsulti niini. Busa, angay kita nga magpasalamat sa atong Langitnong Amahan niini nga hiyas.

Sa unang kasabotan, dili sila mga tawo nga naanak diha sa Spiritu. Dili pa pwede tungod kay si Ginoong Hesus niadtong panahona wala pa miabot aron sa pagbayad sa ilang mga kasal-anan ug ang Ikaduha nga Kasabotan wala pa mapa-implementar tungod kay wala pa matapos ang Unang Kasabotan.

Hinumdomi nga ang Hiyas sa Pagsulti og Lahi nga Pinulongan mahatag lamang kini ngadto sa tawo nga may BAG-O NA NGA SPIRITU tungod sa Iyang pagdawat kang Cristo. Ang Pagsulti og Lahi nga Pinulongan usa ka spirituhanon nga lingguwahe nga dili gayud makat-onan sa huna-huna sa tawo. Pinaage niini nga lingguwahe pwede kanang maka-komyunikar sa Dios ug sa mga anghel diha sa spirituhanong dapit.

Ang tawo kinahanglan nga mokonektar sa Spiritu sa Dios pinaage sa iyang kaugalingon nga bag-o nga spiritu nga gianak sa Dios pinaage sa pagtoo og pagdawat kang Hesu-Cristo. Ug ang paagi sa tawo sa iyang pagkonektar og pagkomyunikar ngadto sa Dios nagkinahanglan og spirituhanong lingguwahe o pinulongan.

Sa Unang Kasabotan, ang nag-inusarang kahayag nga naghigot mahitungod og Pagsulti og Lahi nga Pinulongan mao ang gisulti ni Propeta Isaias.

Isaias 28:10-12

“10 Balik-balik ang iyang tinudloan ug kutikutihan kaayo siya. 11 Kon dili kamo mamati kanako, makigsulti ang Ginoo kaninyo pinaage sa mga langyaw nga dili masabot ang sinultihan. 12 Gitanyagan kamo niyag pahulay ug kalipay, apan wala kamo mamati kaniya.

Bisan tuod nga ang mga tawo nga nailalom sa Unang Kasabotan wala makasinati niini, unsay gisulti ni Propeta Isaias mahitungod sa mahimo sa Pagsulti og Lahi nga Pinulongan ilalom sa Ikaduha nga Kasabotan naghatag kanato og mas tin-aw nga panabot. Naghigot siya niini kaniadto apan wala gani siya nakasinati og walay nakita nga aktuwal nga panghitabo sa iyang panahon kay dili man gayod kini mahimo gawas lamang sa Spiritu sa Dios.

Sa bersikulo 12 ang Dios nagsulti pinaage ni Propeta Isaias nga “pinaage sa mga langyaw nga dili masabot ang sinultihan” gitanyag ngadto sa mga tawo ang pahulay ug kalipay, apan dili sila mamati Kaniya kung kini moabot sa ilang mga dalunggan.


Subo man isulti, ubang mga Kristohanon karon dili gihapon motoo niining Pagsulti og Lahi nga Pinulongan o Speaking in Tongues. Kung ikaw usa kanila, akong klarohon nga bisag dili ka motoo dili kini nagpasabot nga sayop o daotan ang Pagsulti og Lahi nga Pinulongan. Hinuon, imo pa gani gisalikway ang usa sa mga importanteng gasa o hiyas nga hinatag sa Spiritu sa Ginoo. Tabla ra nga imong gisalikway ang dakong pamaagi sa pagdawat sa panalangin ug ang mga benepisyo nga dugay nang giandam sa Langitnong Amahan alang kanimo.

Apan, alang ni bisan kinsa nga gustong magkinabuhi diha sa tiunay og matuod nga pagka-anak sa Dios og pagkamadaogon nga Kristiyano, ang pagdawat sa mga spirituhanong mga gasa og ang pagsulti og lahi nga pinulongan dili na kini angay nga palabyon pa. Walay anak sa Dios nga molampos sa kinabuhi kung walay Spiritu sa Dios. Kung walay Spiritu sa Ginoo nga naglihok sa imong kinabuhi, tanan nimong gibuhay para konohay sa Dios USA LAMANG KA BASIYO UG HAW-ANG NGA RELIHIYON.

Nisulat usab si Apostol Pablo:

1 Corinto 14:18

Nagpasalamat ako sa Dios nga makasulti akog lahi nga mga pinulongan labaw kang bisan kinsa kaninyo.



12

UNSAY MAS MAAYO: PAG-AMPO UBAN SA PANABOT O PAGSULTI OG PINULONGAN?

1 Corinto 14:14

Kay kon mag-ampo ako sa pinulongang dili masabtan, nag-ampo ang akong espiritu apan ang akong hunahuna wala makasabot.

Sa kadaghan sa mga tawo nga akong gipanguta nganong ang uban kanila mahadlok og dili ganahan makasulti og lahi nga pinulongan, ang ilang kasagarang tubag mao nga: “Tungod kay dili man gud ko kasabot og dili ko ganahan mosulti og pinulongan nga dili ko kasabot”.

Ang katinuoran nga ikaw dili makasabot sa lingguwahe maoy usa ka positibo nga ebidensiya nga kini gikan sa Dios kay mao man kini ang nahisulat sa Biblia. Sa dihang magsulti ka o mag-ampo diha sa mga lahi nga pinulongan, dili na kinahanglanon pa nimo nga magsigeg sabot sa imong nalitok nga mga pulong tungod kay ang spiritu man nimo maoy gasulti o gaampo og dili ang imong huna-huna. Busa, walay labot ang imong huna-huna niini. Sumala sa atong nabasa:

1 Corinto 14:14

Kay kon mag-ampo ako sa pinulongang dili masabtan, nag-ampo ang akong espiritu apan ang akong hunahuna wala makasabot.

Ang mga pulong dili moadto sa imong huna-huna; apan gikan kini sa imong spiritu nga nag diretso og palitok sa imong baba, gawas kung ang imong huna-huna ablihan napud sa Spiritu sa Dios aron kang makasabot. Buhaton gayod Niya kini kung mangayo ka sa kahulogan sa imong nasulti nga mga lahi nga pinulongan.

1 Corinto 14:13

Busa ang nagsultig lahi nga pinulongan kinahanglan nga mag-ampo nga makabaton sa hiyas sa paghubad niini.

Akong nabantayan nga kasagaran sa mga kristohanon mas ganahan hinoon mag-ampo diha sa mga pinulongan nga nasabtan kaysa sa mga lahi nga pinulongan nga dili masabtan. Wala man nanaway si Apostol Pablo niana. Apan mas minos kana og “coverage” o malakip o maakopar.

1 Corinto 14:15

Busa unsa man ang akong buhaton? Mag-ampo ako uban sa akong espiritu ug sa akong salabotan. Mag-awit ako uban sa akong espiritu ug sa akong salabotan.

Gikan sa atong nabasa nga bersikulo, mas prayoridad ni Apostol Pablo ang pag-ampo uban sa iyang ESPIRITU ug nagsunod nalang ang pag-ampo uban sa SALABOTAN. Apan sa ubang mga Kristohanon, ila kining gibaylo; giusab ang importansya. Mas ganahan sila nga mag-ampo uban sa salabotan ug ulahi nalang ang uban sa espiritu. Mao kini ang hinungdan nga sa panahon sa moatubang na sila og

mga hagit sa kinabuhi, dali ra silang malumos og dili na kahibalo kung unsay buhaton.

Nagkanayon usab si Apostol Pablo: “Nagpasalamat ako sa Dios nga makasulti akog lahi nga mga pinulongan labaw kang bisan kinsa kaninyo. -1 Corinto 14:18

Busa, sa dili pa ikaw mag-ampo diha sa pinulongan nga masabtan, pag-ampo una uban sa spiritu kay nagsulti ka niini og mga misteryo.

1 Corinto 14:2

Ang magsulti ug lahi nga pinulongan wala magsulti ngadto sa tawo kondili ngadto sa Dios tungod kay walay makasabot kaniya. Nagsulti siya sa tinagong mga butang pinaagi sa Espiritu.

Kining mga tinago nga mga butang pinaage sa Espiritu mao ang mga tubag sa imong mga pangutana ug mao usab kini ang mga kaalam nga imong gikinahanglan aron sa pagsulbad sa matag sitwasyon nga imong giatubang. Unya, kini nga mga tinagong mga butang nga maghatag og kaalam masabtan mo ug magamit nimo sa dihang moabot na kanimo ang hubad o interpretasyon niini.



13

MGA LAHI NGA PINULONGAN + HUBAD= MENSAHE SA DIOS

1 Corinto 14:4-5

4 Ang nagsultig lahi nga pinulongan naglig-on sa iyang kaugalingon lamang apan ang nagsulti sa mensahe sa Dios naglig-on sa tibuok simbahan.

5 Buot unta nako nga kamong tanan makasulti ug lahi nga pinulongan. Apan palabihon ko nga kamong tanan makabaton sa hiyas sa pagsulti sa mensahe sa Dios. Kay ang nagsulti sa mensahe sa Dios mas mahinungdanon pa kay sa nagsultig lahi nga pinulongan gawas kon may makahubad sa iyang gisulti aron malig-on ang tibuok simbahan.

Ang pagsulti og lahi nga pinulongan naglakip kini og PAG-AMPO, PAGWALI ug PAGHATAG SA MENSAHE SA LAHI NGA PINULONGAN, ug mao nga gikinahanglan nimo ang interpretasyon o hubad aron nga ikaw og ang uban nga naminaw malipay og mabulahan.

Ang pagpropesiya mao kana ang pagsulti sa mensahe sa Dios uban sa gahom niini; mao kini ang pagpadayag sa Pulong sa Dios sa paagi nga masabtan sa tanang tawo aron nga ang simbahan ni Cristo malig-on.

Ang Biblia naghigot nga ang pagsulti sa mensahe sa Dios mas angay nga ipalabi kaysa pagsulti og lahi nga pinulongan, gawas kung ang nagsulti siya mismo ang mohubad niini. Sa ato pa, ang pagsulti og lahi nga pinulongan inubanan sa paghubad niini mao ang pagsulti sa mensahe sa Dios o gitawag og propesiya.

Apan kung walay interpretasyon unya gasulti ka lang sa mga pinulongan, ang Propesiya og ang pagsulti sa Mensahe sa Dios mas labaw pa kini kay makapalig-on man kini sa TIBOOK SIMBAHAN. Ang pagsulti og lahi nga pinulongan nagpalig-on lamang sa iyang kaugalingon.

1 Corinto 2:6-7

6 Apan, alang niadtong mga hamtong na sa ilang kinabuhing espirituhanon, naghigot akog kaalam. Hinuon dili kini ang kaalam nga iya niining kalibotana o sa mga nagmando niining kalibotana nga mga lumalabay lamang. 7 Ang kaalam nga akong gitudlo mao ang tinagong kaalam sa Dios nga iyang gililong sa tawo, apan gipili niya alang sa atong himaya, bisan sa wala pa himoa ang kalibotan.

Nagsulti kita og kaalam sa Dios diha sa tinago nga paagi- Lingguwahe nga alang lamang sa mga anak sa Dios. Ang Pulong sa Dios mao ang Kaalam sa Dios. Sama niini nga pananglitan, kung mosulti ako nga “Mas gamhan Siya nga ania kanako kay kaniya nga anaa sa kalibotan”, ang tawo nga wala ma-edukar sa Pulong sa Dios dili gayod kasabot kung unsay kahulogan niini. Wala kini bili alang kaniya tungod kay gasulti man ako og kaalam sa Dios.

Sa dihang magsulti ikaw og lahi nga mga pinulongan ang imong espiritu imong gipaandar, gipainit og gipatrabaho.

1 Corinto 14:14-15

14 Kay kon mag-ampo ako sa pinulongang dili masabtan, nag-ampo ang akong espiritu apan ang akong hunahuna wala makasabot. 15 Busa unsa man ang akong buhaton? Mag-ampo ako uban sa akong espiritu ug sa akong salabotan. Mag-awit ako uban sa akong espiritu ug sa akong salabotan.

Si Apostol Pablo nagsulat nga kung siya mag-ampo diha sa espiritu, mag-ampo usab siya uban sa panabot kay kon mag-ampo siya sa pinulongan nga dili masabtan, nag-ampo ang iyang espiritu apan ang iyang huna-huna wala makasabot. Nagpasabot lamang kini nga ang pagsulti og lahi nga pinulongan maoy sinultihan sa bag-o nga espiritu sa tawo nga nadawat niya gikan sa Dios pinaage ni Hesu-Kristo.

1 Corinto 14:2

“Ang magsulti ug lahi nga pinulongan wala magsulti ngadto sa tawo kondili ngadto sa Dios tungod kay walay makasabot kaniya. Nagsulti siya sa tinagong mga butang pinaagi sa Espiritu.”

Nabantayan ba nimo? Sa dihang magsulti ikaw og lahi nga pinulongan, wala ka makigsulti sa tawo apan sa Dios diay. Nagsulti ikaw og mga tinago- mga misteryo, mga sekreto nga kamatuoran sa pagpaanindot sa atong kinabuhi. Sa dihang imo kining gisulti, nagpadayag ka sa mga tinago ug nagpalihok sa spirituhanong dapit aron sa pagpalig-on ug pagpa-anindot sa imong kinabuhi.

Daghang mga panahon nga dili ka mahibalo unsay angay nga buhaton. Nagkinahanglan tingale ka og idiya, plano sa negosyo, plano para sa pamilya o plano para sa imong kaugalingon. Wala siguro ka nasayod unsay mga lakang nga buhaton, apan sa dihang magsulti ka og mga pinulongan, ang mga pamaagi og mga kamatuoran itug-an diha sa imong espiritu aron masayran mo ang angay nga buhaton.

Ang atong Ginoo nag-ingon, *“Bisan kinsa nga motuo kanako modagayday gikan sa iyang kasingkasing, sama sa mga sapa, ang tubig nga naghatag ug kinabuhi, sumala sa giingon sa kasulatan.” (Juan 7:38)*. Busa, sa dihang modagayday na diha kanimo ang mga sekreto o yawi sa gingharian, nadawat na nimo ang mga kamatuoran og pamaagi sa Dios alang sa imong plano og alang sa pagsulbad sa imong mga problema.

Sa dihang magsulti ka og lahi nga mga pinulongan, ang mga tawo nga kalibutanon magkatawa og magbiay-biay kanimo tungod kay wala silay kahibalo kon unsay nahitabo sa spirituhanong dapit. Maghuna-huna sila nga nayabag o nabuang na ka. Apan salamat sa atong Ginoo, ang Biblia gaingon nga gituyo Niya pagpili ang mga giisip nga binuang niining kalibotana aron sa pagpakaulaw sa mga maalam niining kalibotana (1 Corinto 1:27).

Sa dihang magsulti ka og lahi nga mga pinulongan, makita sa kalibotan ang mga kahibulongan, makapalibog og katingalahan nga mga resulta. Dili gayud sila makatugkad sa unsang paagi nilampos og nilambo ka kay buhat lamang kini sa espiritu og masabtan lang sa spirituhanon nga mga tawo. Hallelujah!

1 Corinto 2:14-15

14 Apan ang tawo nga wala magbaton sa Espiritu sa Dios dili makadawat sa mga gasa nga gikan sa Espiritu sa Dios. Dili gayod siya makasabot niini ug binuang kini alang kaniya kay kini matugkad man lamang sa espirituhanong pamaagi. 15 Ang tawong espirituhanon makatugkad sa bili sa tanang butang apan walay makahukom kaniya.



14

ANG LABING BALANG PAGTUU

Judas 20

Apan kamo, mga hinigugma, padayon kamo paglig-on diha sa inyong labing balaang pagtuo. Pag-ampo kamo diha sa Balaang Espiritu.

Sa dihang makadungog ka sa Pulong sa Dios, ang pagtuo moabot diha kanimo. Ang Biblia gaingon, “Busa ang pagtuo naggikan sa pagpamati sa mensahe ug ang nabati naggikan sa pulong ni Cristo.” (Roma 10:17). Ang imong pagtuo mosaka kon ang Spiritu sa Dios magtudlo kanimo sa Pulong; mao nay mohatud gikan sa ubos nga level o ang-ang ngadto sa mas habog nga ang-ang.

Sa dihang ang imong pagtuo mosaka sa bag-o og mas habog nga ang-ang, mahimo kana nga maoy pinakataas nga level sa imong pagtuo anang panahona lang. Apan daghang mga kristohanon nga wala gayud nakasinati sa pinakatumoy nga ang-ang sa ilang pagtuo. Sa daghang mga panahon, nagkinabuhi sila sa ubos nga ang-ang sa pagtuo nga ilang naangkon.

Ang gitudlo sa libro ni Judas bersikulo 20 mao nga sa DIHANG NIABOT NAKA SA PINAKATAAS NGA ANG-ANG SA PAGTUU, imbis nga magkanaog ang pagtuo ug magkinabuhi diha sa ubos nga pagtuo, pwede na nimong matukod ang imong kinabuhi pinaage sa pinakataas nga ang-ang sa pagtuo nga imong nadawat gikan sa Pulong sa Dios; ug mahimo kini sa dihang mag-ampo ikaw kanunay diha sa lahi nga mga pinulongan.

Pinaage sa mapadayonon nga pagsulti og lahi nga mga pinulongan, madala nimo ang imong kaugalingon sa pinakahabog og pinakatumoy nga dapit sa imong pagtuo. Ang pagtuo anaa gikan sa Pulong. Apan dili kini kalihok kung ang imong mga sinultihan dili spirituhanon.

Matukod, mapundar, mapalig-on og mapaanindot ang imong kinabuhi sumala sa Pagtuo nga imong nadawat gikan sa Pulong kung kini naubanan sa pag-ampo diha sa spiritu. Makita gayud nimo ang dakong kalainan sa imong kinabuhi kung magsige ka og sulti og lahi nga pinulongan tungod kay naglihok ka sa dapit diin ikaw gidala sa Spiritu sa atong Ginoo.

ANG PAGKAHIUSA NIMO SA SPIRITU SA PAGKABALAAN

Kung unsa kadaghan ang mga lahi nga pinulongan ang imong nasulti, ingon ana usab ang pagkahiusa kanimo sa Spiritu sa Ginoo nga naghatag og pagkabalaan tungod kay gigamit mo man ang Iyang lingguwahe.

Daghang Kristohanon ang wala masayod niini. Wala sila moila sa pwede nga mahimo nila sa mga gideposito sa Spiritu diha sa ilang kinasuloran. Apan lantawa si Apostol Pablo nga may kahibaloan sa kamatuoran:

“May kalig-on ako sa pagsagubang sa tanan tungod sa gahom nga gihatag kanako ni Cristo.” Filipos 4:13.

Mahimo gayud kana basta pinaage sa Spiritu sa Dios.

Si Apostol Juan niingon usab, *“Apan mga anak, iya na kamo sa Dios ug gidaog ninyo ang mga dili matuod nga propeta kay ang Espiritu nga anaa kaninyo mas gamhanan kay sa espiritu nga anaa sa mga tawo nga iya sa kalibotan”.* (1 Juan 4:4).

Ingon nga anak sa Dios, kinahanglan nga makamata ka gayod sa dugang pa nga kamatuoran nga ang Dios nga nagbuhat sa langit og yuta ug nga nagpuyo sa yutan-ong lawas ni Ginoong Hesus kaniadto mao usab ang nagpuyo diha sa sulod nimo ug kaya Niya kontrolahon ang matag bahin sa imong lawas.

PAANDARA UG PALIHOKA ANG GAHOM NGA ANAA NA KANIMO PINAAGE SA PAGSULTI OG LAHI NGA MGA PINULONGAN.

Bisag unsa pa nga matang sa hagit sa imong kinabuhi, ang imo lamang buhaton mao ang pagpaandar og paaktibo sa imong spiritu pinaage sa pagsulti og lahi nga mga pinulongan. Sa dihang buhaton mo kini, ang Spiritu sa Dios magdala kanimo sa mas habog nga kahimtang diin nailalom nimo ang problema og mga hagit sa kinabuhi. Busa, sayon nalang ang pagmando niini nga mopatuo og motahod kanimo.

Ayaw panundog niadtong mga Kristohanon nga magsulti man tuod og mga lahi nga pinulongan pero bali ra pud og pipila lang ka minuto. Mas maayo nga mahimo nimo kini sa taas og makanunayon nga panahon kay ang yawa wala pud kapahulay sa pagguba sa imong kinabuhi. Dali ra silang matandog sa ilang palibot. Walay concentration; walay focus kung mag-ampo. Ang uban mohunong kay mobasa og mga mensahe sa ilang cellphone o mag FACEBOOK. Mao pa gani pagsugod sa pagsulti og mga lahi nga pinulongan, nahunong dayon. Wala nila mapaandar ang ilang spiritu, busa dili nila kini magamit sa panahon nga naa silay problema.

Gidasig ko ikaw nga pagsulti og lahi nga mga pinulongan kanunay og ayaw og sugot nga madisturbo ka sa bisan unsa. Ikaw maoy modala sa imong hunahuna, dili ang bisan unsa nga mga makapalipat. Sa dili madugay, kung magsige ka og sulti og mga pinulongan, bahaan ang imong huna-huna og lawas sa mga mensahe og gahom sa Dios. Ang epekto niini mao nga makatindog og makalakaw ikaw aron sa pag-atubang sa kalibotan pinaage sa gahom sa Dios nga naglihok diha kanimo. Busa, magmabungahon ka!

Kung dili ka makalakaw, dili ka makadungog o masakiton ka, napuno ka ba og mga problema, sulti lang og mga lahi nga pinulongan. Masinati nimo ang epekto niini. Masinati nimo ang tinuod nga milagro ug gahom sa Dios.

15

ANGAY KITA NGA MOAPIL SA MGA PANAGTIGUM

Mateo 16:18

Busa sultihan ko ikaw: ikaw si Pedro ug ibabaw niining bato tukoron ko ang akong simbahan ug bisan gani ang kamatayon dili gayod makabuntog niini.

1 Corinto 12:12-14

12 Si Cristo sama sa usa ka lawas nga may daghang bahin. Bisan kon nagkalainlain ang mga bahin niini, usa ra gihapon kini ka lawas. 13 Ang uban kanato mga Judio, ang uban dili. Ang uban mga ulipon ug ang uban usab dili. Apan kitang tanan gibunyagan diha sa usa ka lawas pinaage sa mao gihapong Espiritu ug kitang tanan nakig-ambit pag-inom sa usa ka Espiritu. 14 Kay ang lawas dili usa ra ka bahin kondili daghan.

Ang simbahan o iglesia mao ang lawas ni Cristo ug si Hesus mao ang ulo. Ang simbahan mao ang pundok sa mga magtotoo ni Hesus. Ang tanang mitoo og midawat ni Cristo Hesus membro sa lawas ni Cristo ug kabahin sa usag-usa (1 Corinto 12:27). Sama nga ang nagkalain-laing bahin sa lawas sa tawo dili makalihok kung nahibulag kini sa lawas, mao usab kita ingon nga bahin sa lawas ni Cristo. Dili ta mahimong epektibo kung dili maghiusa.

Ang rason niini mao nga ang Amahan naghatag og nagkalainlaing mga gasa og mga abilidad ngadto sa matag-usa aron nga ang tibook lawas ni Cristo mabulahan og makabenepisyo. Dili pwede nga puros kamot lang ang atong lawas. Lahi ang kamot, lahi ang tiil, lahi ang kuko ug lahi pud ang tuhod. Unsaon pagsinati sa pagkagamit niini kung mag-inusara ang matag bahin. Ikaw, dili ka magamit sa lawas ni Cristo kung dili ka moapil og makighiusa sa tapok og tigom sa Lawas ni Cristo.

Ayaw PAG-INUSARA SA IMONG PAGKA ANAK SA DIOS. APIL SA PAMILYA SA DIOS.

1 Corinto 12:18-24

18Ang Dios nagpahimutang sa nagkalainlaing bahin sa lawas sumala sa iyang pagbuot. 19Wala untay lawas kon usa lamang kini ka bahin. 20Apan sumala sa atong nasayran, may daghang bahin ang usa ka lawas.

21Busa dili makaingon ang mata ngadto sa kamot, "Wala ako magkinahanglan kanimo!" Dili usab makaingon ang ulo ngadto sa tiil, "Wala ako magkinahanglan kanimo!" 22Gikinahanglan hinuon nato ang mga bahin nga atong giisip nga huyang. 23Kadtong mga bahin nga giisip natong dili kaayo mahinungdanon mao hinuon ang atong giatiman pag-ayo. Ug ang mga bahin sa lawas nga dili angayang makita sa uban gihatagan nato sa talagsaong pagtagad. 24Ang mas matahom nga mga bahin sa atong lawas wala magkinahanglan sa maong talagsaong pagtagad. Ang Dios mismo nagpahaom sa mga bahin sa atong lawas aron paghatag ug dugang dungog niadtong mga bahin nga nakulangan niini.

Efeso 4:11-13

11Ang mga gasa niya mao nga ang uban iyang gihimong mga apostoles, ang uban mga propeta, ang uban mga tigsangyaw sa Maayong Balita, ang uban mga pastor ug mga magtutudlo. 12Gihimo niya kini aron sa pag-andam sa tibuok katawhan sa Dios alang sa buluhaton sa Cristohanong pag-alagad aron motubo ang lawas ni Cristo 13hangtod magkahiusa kitang tanan diha sa pagtuo ug sa atong kahibalo mahitungod sa Anak sa Dios. Unya mahingkod kita sama sa kahingkod ni Cristo.

Ang pag-apil og mga tigom sa mga anak sa Dios usa ka timaan nga kita nitoo og nituman sa tambag sa Dios alang sa atong kaayohan. Makapatubo, makapalig-on og makapabulahan kini kanimo tungod kay magtinabangay man ang tanan og adunay pagpaambit sa mga gasa og abilidad ang matag usa nga igsoon diha sa pagtoo. Makaabit ka sa gasa sa ubang mga anak sa Dios sama sa gasa sa paghimo og milagro, mga gasa sa pag-ayo sa mga sakit, gasa sa pagpropesiya, gasa sa paghatag sa pulong sa kahibalo ug daghan pa.

Daghan ikaw nga madungog nga mga testimonyo o mga pagpamatuod sa gahom sa Dios nga naglighok sa kinabuhi sa uban. Mas daghan ka og masabtan sa Pulong sa Dios. Adunay mga tawo nga moingon nga dili lang sila moapil sa mga tigum sa kristohan kay naluya sila. Mao bitaw nga moapil ka aron madasig ka. Naa puy moingon nga dili ra sila moapil kay dasig og lig-on na sila. Mao gani pud nga moapil ka kay daghan pang mga angay nimo nga dasigon og lig-onon.

Ang pag-ampo og pagsimba kanunay kining magkuyog; ug sekreto kini sa pagpagawas o pagpadayag sa hiniusang spirituhanong kusog sa mga anak sa Dios. Busa, mas sayon og mas epektibo ang pagministeryo o pagserbisyo sa Amahan ngadto sa matag nanginahanglan tungod kay dili man kalihok ang tawhanon nga mga kinaiya og batasan.

Hebreo 10:25

Dili nato undangon ang batasan sa panagtigom sama sa gibuhay sa uban. Magdasigay hinuon kita labi na kay nasayod kamo nga hapit na moabot ang Adlaw sa pagbalik sa Ginoo.

Mga Buhay 1:14

nagtigom kanunay aron mag-ampo. Uban usab kanila ang mga babaye ug si Maria nga inahan ni Jesus ug ang iyang mga igsoon lalaki.

Salmo 133:1-3

1 Pagkaayo ug pagkaanindot kon magkahiusa pagpuyo ang katawhan ingon nga mga igsoon. 2 Sama kini sa bililhon nga lana nga gidihog diha sa ulo ni Aaron ug midagayday ngadto sa iyang mga bungot ug midaligdig sa kuwelyo sa iyang sotana!


Ang pagkinabuhi diha sa Pulong nga mag-inusara ka lang daw habog nga bukid nga imong sakaon o katkaton. Hangat og kapoy kini. Apan sayon kini kung ikaw natanom diha sa usa ka SIMBAHAN NGA PUNO sa Spiritu sa Dios. Motubo og mohamtong ka gayod diha sa spirituhanong bahi sa kasayon; busa sigurado ang imong pagkamabunganon og kalamposan. Isipa kono ang imong kaugalingon nga usa ka nga anak apan walay yutan-ong pamilya nga kaduolan, diba laay, pait og looy ang

imong kahimtang. Lahi ra kung naa kay yutan-ong pamilya. Lahi ra usab kung naa gyud kay spirituhanong pamilya.

Ingon nga usa ka kristohanon, kinahanglan nga mailhan ikaw uban sa usa ka pundok. Gitawag kini og Local Church. Adunay Universal Church- mao kini ang tawag sa tanang magtotoo sa pagka Manluluwas og pagka Ginoo ni Hesu-Kristo bisan asa pa sila nga su-ok sa tibook kalibotan. Lahi-lahi man og ngalan sa pundok o karatola sa tigomanan, apan usa ra gihapon ang Ginoo og Manluluwas nga gitooan-Si Hesu-Kristo, busa apil usab sila sa Universal Church. Apan lahi ang local church, tungod kay pundok kini nga diin anha ka patuboon sa Ginoo sa imong pagtoo, kahibalo, kaalam, panabot, gugma ug sa tanan nimong batasan.

Busa, ayaw katingala kung naa kay kabiklan, kay sila mismo ang imong bairan. Sama nga ang sundang dili mohait kung walay bairan, mao usab ang tawo kung dili mabangga og laing tawo. Unsa may diay ang kailan kung dili ka mag-apil sa pundok og sa tigum sa mga anak sa Dios? Tabla ra nga imong gihikaw ang imong kaugaligon sa mga gikahatag na nga mga pagpadayag sa mga panalangin sa atong Amahan. Sama lang kini nga daw gipriso nimo ang imong kaugalingon.

Busa, apil sa tanang mga bulohaton sa lawas ni Kristo kay importante ka nga bahin niini.



16

ANG KAMATUORAN SA PAGKA-KRISTOHANON

2 Corinto 3:2-3

2Kamo mismo ang among sulat nga nasulat sa among kasingkasing aron maila ug mabasa sa tanan. 3Klaro nga si Cristo gayod maoy nagsulat niining sulata ug gipadala niya kini pinaagi kanamo. Nasulat kini dili pinaagi sa tinta diha sa mga papan nga bato kondili diha sa kasingkasing sa mga tawo pinaagi sa Espiritu sa Dios nga buhi.

Daghang mga tawo nga may sayop nga pagtoo mahitungod sa pagka-kristiyano. Ang uban nag-ingon nga mao kini ang pagsimba sa Dios. Ang uban pud moingon nga mao kana ang pagtoo ngadto ni Hesu-Kristo; ug may nag-ingon nga kung moadto ka og tigumanan og nabautismohan na ka kristohanon na kono ka.

Bisan tuod nga ang mga kristohanon mosimba sa Dios, motoo ni Hesu-Kristo, moadto sa mga tigumanan sa pag-ampo og pagsimba og ang uban nabautismohan na, wala niini nga mga kahulogan ang tinuod sa gipasabot kung unsa gayod ang PAGKA-KRISTOHANON.

Ang pagka-kristohanon mao kini ang pagpagawas, pagpadayag sa gahom og trabaho sa Spiritu sa Dios pinaage diha sa lawas sa tawo. Mao kini ang paglihok sa Dios pinaage sa tawo nga may Spiritu ni Cristo, nga dili pinugngan sa bisan unsa nga tawhanong prinsipyo og pagbati. Mao kini ang pagkinabuhi sa pamaagi, prinsipyo og gahom sa Dios diha sa tawhanon nga lawas. Si bisan kinsa nga tawo nga nagkinabuhi sa prinsipyo, pamaagi og gahom sa Spiritu sa Dios mao ang tinuod og matuod nga Kristiyano.

Sa unsa nga pamaagi nga mahitabo kini? Sa dihang ang PULONG SA DIOS makita na sa atong kinabuhi. Mao kini ang pagpapadayag sa dili makita nga Pulong pinaage sa makita sa tawo. Tungod kay ang Kristiyano mao ang ekspresyon sa Pulong sa Dios. Ang Kristiyano nga matuod mao ang sulat ni Kristo ngadto sa dili magtotoo.

Busa, ang imong stilo og pamaagi sa kinabuhi magtug-an kung kinsa gyud ka. Kung dili ba ka looran, biliklon og utok, reklamador, dili palupig o paalkansi, tabian o hilabtanon sa apan og kaluyahon sa laing tawo ug daghan pa. Ang buhi nga mensahe sa Dios dili lang sa papel kondili anaa sa tawo nga mitoo og midawat niini. Mas basahon ang kinabuhi sa usa ka Kristiyano, dili ang unsay iyang gisulti o gisangyaw.

Ang Kristiyano mao ang buhing saksi nga si Hesu-Kristo nabanhaw gikan sa kamatayon pinaage sa himaya sa Langitnong Amahan, ug nabuhi hangtod karon.

Si Apostol Pablo nagpahibalo kanato niini pinaage sa iyang sulat nga sa mga Kristohanon didto sa Corinto. Busa, inplowensiyaha ang imong palibot og kalibotan uban sa grasya sa atong Ginoong Hesu-Kristo ug sa himaya sa pagka-anak sa Dios.

Nahiusa kana diha sa Spiritu sa Dios, busa mahimo nimo pinaage sa Iyang Spiritu ang mga butang nga gusto sa Dios nga buhat dinhi sa kalibotan.

2 Corinto 13:13

Ang grasya sa Ginoong Jesu-Cristo, ang gugma sa Dios ug ang pagpakig-ambit sa Espiritu Santo mag-uban kaninyong tanan.

2 Corinto 8:9

Kay nasayod kamo sa grasya sa atong Ginoong Jesu-Cristo. Bisan siya dato, nagpakakabos siya tungod kaninyo aron madato kamo pinaagi sa iyang kakabos.

Mabag-o ang imong pamilya, mga higala og mga silingan kung makalihok ang Spiritu sa Dios pinaage sa imong pagkatawo. Mao kini ang imong pinaka una nga tawag, pinaka una nga katuyoan nganong giluwat og gibalaan ka sa Dios. Mao kini ang imong tinuod nga kinabuhi og angay nga pagkinabuhi dinhi sa kalibotan. Mao kini ang matuod nga Kristiyanidad!



17

PAG-PUASA: MAG-IMPLUWENSIYA KANIMO, DILI SA DIOS

Exodo 34:28

Si Moises nakig-uban sa Ginoo sulod sa 40 ka adlaw ug 40 ka gabii ug wala siya mokaon o moinom. Gisulat niya diha sa mga papan ang mga pulong sa kasabotan nga mao ang Napulo ka Sugo.

Daniel 10:2-3

*2Niadtong panahona, ako, si Daniel, nagbangotan sulod sa tulo ka semana.
3Wala ako mokaon bisan sa lamiang mga pagkaon o motilaw ug bino o magdihog ug lana sa akong lawas sulod sa tulo ka semana.*

Daniel 10:12

Unya iya akong giingnan, “Daniel, ayaw kahadlok kay sukad gayod sa unang adlaw nga ikaw nagtinguha sa pagsabot sa kahulogan sa panan-awon ug nagpaubos atubangan sa Dios, gidungog sa Dios ang imong mga pangaliya ug ania ako karon tungod niini.

Mga Buhat 13:2

2 Usa ka adlaw niana, samtang nagsimba sila sa Ginoo ug nagpuasa, miingon kanila ang Espiritu Santo, “Igahin alang kanako si Bernabe ug si Saulo alang sa buluhaton nga maoy hinungdan sa pagtawag ko kanila.” 3 Busa nagpuasa sila ug nag-ampo ug gipandongan nila sa ilang mga kamot si Bernabe ug si Saulo ug unya ilang gipalakaw sila.

Mga Buhat 14:23

Nagpili sila ug mga pangulo sa matag simbahan ug uban sa mga pag-ampo ug pagpuasa ilang gitugyan sila ngadto sa Ginoo nga ilang gisaligan.

Ang pinaka-importante sa pagpuasa mao ang “TUMONG o KATUYOAN NGANONG NAGPUASA”. Naay mga nagpuasa nga ang ilang gihatagan og kwentada og pagtagad ang gitas-on lang sa adlaw sa pagpuasa. Dili man daotan ang tag-as nga adlaw sa pagpuasa kay gani ang atong Ginoo, si Propeta Elias og si Moises gapuasa man gani pud sila og 40 ka adlaw o diyas.

Ang kalidad sa puasa (fasting) dili angay ibasi sa pila ka adlaw, kondili sa katuyoan. Daghan ang naghuna-huna nga kung taas ang ilang puasa mas malooy ang Dios kanila og molihok na Siya kay taas na ang puasa. Dili kini mao nga tinuohan. Ang Dios dili mausab sa puasa. Ang puasa maoy mousab nato.

Ang pagpuasa motabang kanato nga makaamggo sa diosnong kinaiyahan nga ania na kanato. Ang puasa nga insakto dili tong puasa nga wala ra gihapon kay napamalandongan nga Pulong sa Dios ug gubot ra gihapon ang palibot og hunahuna. Ang puasa nga insakto mao nga imong gipitol ug gidisiplina ang imong unod gikan

sa bisan unsang gusto nga buhaton og kaonon aron maandam kini sa pagdawat sa dugay nang gikahatag sa Dios nga pagpadayag og mga lamdag para kanimo.


Naghisgot ako sa puasa nga imong gipahimolag ang imong kaugalingon gikan sa kalibotanan nga mga pangandoy og kalihokan ug nga igasto nimo ang imong panahon diha sa pag-ampo, pagtuon og pagpamalandong sa Biblia ug sa pagdeklara kanunay sa mga maayo og positibo nga mga butang, bulohaton og mga panan-awon.

Nianang panahona, mas sayon sa Ginoo sa pagkuha sa imong panahon o attention, ug makatudlo Siya kanimo, ug makapausab ug makapatubo kanimo tungod kay imo mang gisentro ang imong panahon og panghuna-huna diha sa Dios og sa Iyang mga Pulong.

Pinaage niining puasa nga may klarong katuyoan, ang imong spiritu motindog nga daw higante; ug ang imong tawhanon nga panghuna-huna mapitol og magapos. Sa ingon niini, mahimo na sa spiritu ang gusto Niyang buhaton pinaage kanimo. Ang pagpuasa usa ka maayo nga pamaagi sa pagpaugnat sa imong spirituhanong bahin.

1 Timoteo 4:7-8

Apan likayi ang mga hinimu-himong sugilanon nga dili angay isugilon. Hinunoa, bansaya ang imong kaugalingon sa kinabuhing diosnon. 8 May kapuslanan ang pagpaugnat sa lawas. Apan ang espirituhanong pagpaugnat mapuslanon alang sa tanang butang kay makahatag man kini kanatog kinabuhi karon ug sa umaabot.



18

ANG HUSTONG PANAHAON SA PAG-AMPO UG PAGPUASA

Mateo 9:14-15

*14 Unya miadto kang Jesus ang mga tinun-an ni Juan nga Magbubunyag ug nangutana, "Nganong kami ra man ug ang mga Pariseo ang nagpuasa kanunay apan ang imong mga tinun-an wala?" 15 Si mitubag, "Naghuna-huna ba diay kamo nga magsubo ang mga dinapit sa kombira sa kasal samtang ang pamanhonon uban pa kanila? Dili gayod! Apan moabot ang panahon nga ang pamanhonon kuhaon gikan kanila ug **MAGPUASA NA UNYA SILA**.*

Sa pagtudlo sa atong Ginoo ngadto sa Iyang mga disipolo mahitungod sa puasa, Siya nagpahimangno, "Sa inyong pagpuasa ayaw ipakita nga nagsubo kamo sama sa gibuhay sa mga tigpakaaron-ingnon. Gipasundayag nila ang gutom nilang panagway aron mailhan gayod nga nagpuasa sila. Sultihan ko kamo nga nakadawat na sila sa ilang ganti." (Mateo 6:16)

Duha ang igo sa tubag sa atong Ginoo. Una, pangtay-og sa huna-huna. Ikaduha, panglamdag sa ilang salabotan. Sa **Mateo 9:15**, ang atong Ginoo mitubag, "Naghuna-huna ba diay kamo nga magsubo ang mga dinapit sa kombira sa kasal samtang ang pamanhonon uban pa kanila? Dili gayod! Apan moabot ang panahon nga ang pamanhonon kuhaon gikan kanila ug **MAGPUASA NA UNYA SILA**.

Niini nga bahin, ang atong Ginoo nagpasabot nga Siya mobalik na ngadto sa Amahan didto sa langit. Bisan pa man, gikan adtong panahona sa Iyang pagkayab, ang Iyang mga tinun-an og mga magtutuo nagpuasa. Ang pag-ampo ug ang pagpuasa kabahin kini sa spirituhanong bulohaton sa mga Kristiyano. Magpuasa gayod kita kung kinahanglanon. Apan kanus-a man kini kinahanglanon? Mao kini ang pangutana sa uban.

Una, sa dihang ang imong lokal nga simbahan o ang alagad sa Ginoo nga nangulo mopahibalo nga adunay pinasahe nga buhaton alang sa PAG-AMPO ug PAGPUASA, mao kana ang panahon nga magpuasa ka. Ayaw palahi og ayaw ibulag ang imong kaugalingon sa lawas kay dili kana makahatag og kahimsog kanimo. Bisag unsa nga parti sa lawas, kung mahimulag kini, madunot og malata gayod kini. Kuhai og pagtulon-an ang kumingking: kung maputol kini og dili na mabalik sa kamot, dili na kini magamit pa kay madunot, mabaho og uloron kini.

Busa, ayaw gayod pagsupak sa mga awhag nga sama niini. Daghan kaayong mga kristohanon nga wala nihamtong diha sa spirituhanong kinabuhi tungod kay bisag gibalik-balik na og pahibalo sa ilang mga pangulo sa simbahan nga mag-abot aron sa pag-ampo og sa pagpuasa, apan sekreto ra sila nga dili magpatoo og hinok lang nga mangaon ug tapolan pa gyud mag-ampo. Makaguol kini. Alang man unta kini sa ilang kaayohan og dili sa Dios.

Adunay mga bulohaton nga angay natong buhaton diha sa panaghiusa, sama sa **HINIUSANG PAGSIMBA, HINIUSANG PAG-AMPO, HINIUSANG PAGPUASA, HINIUSANG PAG-AWIT** ug daghan pa nga makapatubo ug makapalig-on kanato sa atong spirituhanon bahin.

IKADUHA nga panahon nga angay kitang mag-ampo uban sa pagpuasa mao ang **PINASAHE NGA GIYA sa SPIRITU SA GINOO** diha sa imong kinasuloran. Busa, kung madungog mo kini, ayaw kini ibaliwala. Lahi na usab kana nga oportunidad labi na nga ang Spiritu sa Ginoo na mismo ang nag-aghat kanimo. Masayran mo gayod nga Siya kana tungod kay gisugo gud ka nga magpuasa. Dili malipay ang yawa nga magpuasa ka.

Ang ubang mga tawo pud naghimo og kaugalingon nilang skedyul alang sa pag-ampo uban sa pagpuasa; NINDOT GAYUD KINI. Busa, sa dihang magpuasa kana, seryosoha kini nga bulohaton. Daghan akong nakita nga mga tawo nga gapuasa konohay sila apan sigeg dula sa ilang mga cellphones o ang uban sige og laag og ang uban sigeg lantaw og TV shows.

Buhata kini uban sa pagpamalandong sa Pulong sa Dios ug pangita og dapit nga dili ka matugay. Himoa usab kini nga parti sa imong kinabuhi, dili lang kay tungod gisugo ka sa imong pangulo sa simbahan.

Kung adunay pagpahibalo nga ang tibook simbahan nga imong giapilan mag-ampo uban sa pagpuasa, ayaw pagduha-duha og apil kay sigurado gayod ako nga mahabilin ka gayod sa pag-uswag, pagtubo og pag-abante o paglupad sa simbahan. Maoy hinundgan nga ang uban karaang mga Kristohan naapsan sa mga bag-o pa lang nga mitoo.

Ayaw usab pagbuot-buot nga mohunong ka og kalit nga wala ka nananghid sa imong pangulo. Sayop kana. Timan-i ang gisulti ni Apostol Pablo:

“Gilansang na ako uban kang Cristo didto sa krus busa dili na ako ang nabuhi kondili si Cristo na nga ania kanako. Ug kining kinabuhi ko karon akong gikinabuhi diha sa akong pagtuo sa Anak sa Dios nga nahigugma ug nagtugyan sa iyang kaugalingon alang kanako.” (Galatia 2:20)

“May kapuslanan ang pagpaugnat sa lawas. Apan ang espirituhanong pagpaugnat mapuslanon alang sa tanang butang kay makahatag man kini kanatog kinabuhi karon ug sa umaabot.” (1 Timoteo 4:8).

Timan-i usab kini: Nga pinaage sa pag-ampo uban sa pagpuasa, ang imong PAGKAEPIKTIBO sa mga buholaton nga Spirituhanon mga bansay og mabaid. Ang imong abilidad sa pagpamati sa tingog sa Dios og sa pagdawat og pagsabot sa Iyang mga mensahe mas mohait og molantip pa kini ug mas matunong ang imong kaugalingon sa “signal” og sa “frequency” sa tingog sa Spiritu nga maoy imong gikinahanglan aron ka mosaka sa mas habog nga ang-ang sa kinabuhi. Daghan ang kusog moampo, apan pipila lang ang nagpuasa.

ISUGID KINI:

Ako sensitibo sa giya sa Spiritu sa Ginoo alang sa akong pagtubo og paghamtong sa spirituhanong bahin. Ang akong pagsanong, pagkomitar ug pagpangalagad diha sa pamilya sa Dios modasig og mopalig-on sa daghang mga bata pa diha sa pagtoo. Ug dili na unya ako mahimong kapandolan kanila, sa ngalan sa Ginoong Hesu-Kristo. Amen.

Alang sa dugang nga reperensiya, pwede nimo basahon ang:
Ester 4:16; Nehemias 1:4; Mateo 26:38-44; Mga Buhat 13:1-3



19

ANG PAG-AMPO DILI HAGO

Lucas 12:32

“Ayaw kahadlok, gamayng panon! Kay ang inyong Amahan nahimuot sa paghatag kaninyo sa Ginharian”.

Usahay, kung mamati ka sa ubang mga kristohanon nga mag-ampo, maklaro nimo nga wala gayud sila kasabot sa Maayong Balita nga gihatag sa atong Manuluwas nga si Ginoong Hesu-Kristo. Ganahan sila mopakita og hulagway sa usa ka layog diha sa mga pag-ampo; usa ka idea o pagtoo nga nakat-onan nila gikan sa Unang Kasabotan. Apan anaa na kita nailalom sa Ikaduha (Bag-o) nga Kasabotan karon, ug si Hesus, nga atong gisunod wala gyud to galayog og naghago diha sa iyang mga pag-ampo.

Matag higayon nga si Hesus mag-ampo, ang Iyang mga pulong yano lang apan may igong punto, puno sa pagtoo ug masaligon. Nag-ampo Siya diha sa panghuna-huna og baroganan nga Siya nahiya sa Amahan. Wala Siya anang kabalaka nga makulangan sa bisan unsa; ug gusto Siya nga mao pud kini ang imong panghuna-huna kanunay ingon nga anak sa Dios.

Pamalandongi ba gud ang iyang gitudlo:

“Ayaw kahadlok, gamayng panon! Kay ang inyong Amahan nahimuot sa paghatag kaninyo sa Ginharian”. **Lucas 12:32**

Ngano ba gud kono nga ang usa ka tawo nga nakabasa og nasayod na niini nga bersikulo sa Biblia maglayog lang gihapon diha sa mga pag-ampo? Dayon, kung buot gani nimong sabton nga gihimo naman gani Niya kining iyang gipasalig-**GIKAHATAG NA GAYUD DIHA KANIMO ANG GINGHARIAN SA DIOS.** Kung motoo ka niini nga kamatuoran, mohatud kini kanimo sa mas anindot nga kasinatian og kahimtang sa kinabuhi.

Sabta nga ang mas gamay og bili naapil na diha sa mas dako og bili. Gikahatag naman ang Ginharian sa Dios diha kanimo, bugas, sud-an, kwarta, panalangin pa kaha? Kini ra ba nga klase nga ginharian kay ang tanan nga gipangita sa tawo anaa na, ug madawat pinaage sa pagtoo kay kini grasya man sa Dios alang sa tawo.

Niini nga Ginharian, adunay tinuod nga kinabuhi, libre nga pagkamatarong, adunay tinuod nga gugma, tinuod nga kalipay, tinuod nga bahandi og kadato, maayo nga panglawas, kalinaw o pakigdait, tinuod nga panalangin og pabor sa Dios. Kining tanan imoha na kay imo man kining panolondon ingon nga anak sa Dios. Nagpasabot kini nga ang paghago og pakiglayog aron lamang madawat nimo kining mga butanga wala na kinahanglana. Wala ako nag-ingon nga dili na kita mag-ampo.

Ang akong gipasabot, mag-ampo og magpuasa kita **ARON MAANDAM, MABANSAY OG MAKASAGANG KITA** sa dihang madawat na nimo kini. Sama ba sa usa ka adunahan nga yutan-on nga amahan. Ang mga salakyan o mga aircraft pwede kining magamit sa iyang mga anak. Apan ang pangutana: **KAHIBALO SILA MOGAMIT NIINI?** Ang pag-ampo maoy pagpahibalo kanimo nga mogamit naka sa

imoha nang bahin. Ang pag-puasa maoy pagbansay kanimo aron dili ka madaot o madisgrasya tungod kay dili pa kahibalo modala sa mga hinatag o mga gasa nga gikan sa Langitnong Amahan.

Busa, dili gani ka mangayo pa niini kung mag-ampo ka. Igo ka na lang mo deklarar nga gamiton nga nimo.

Dugang pa nga pananglitan:

Kung maghatag ka og katungod sa usa ka tawo nga mosulod sa imong balay, diba wala man nimo dalha ang balay aron ihatag mo kaniya? Wala gayod og dili gayod! Ang buhaton hinoon mao ang paghatag kaniya sa MGA YAWI sa imong balay. Sa sama nga paagi, gihatagan ka na sa Langitnong Amahan sa MGA YAWI sa Iyang Gingharian, ug nagpasabot kini nga aduna kanay katungod sa tanang panalangin sa langit og sa yuta.

Mateo 16:19

“Ihatag ko kanimo ang mga yawi sa Gingharian sa langit: ang imong idili sa yuta, idili usab didto sa langit. Ug ang imong itugot dinhi sa yuta, itugot usab didto sa langit.”

Ang imong gikinahanglan mao ang pagkinabuhi matag adlaw diha sa kamatuoran nga ang tanang butang gikahatag na sa Dios diha kanimo. Ug ang Iyang Gingharian nga gikahatag diha kanimo dili kini basiyo; apan napuno hinuon og daghang mga kaayohan og kadagaya. Sa dihang masabtan nimo kini, siguradong mausab ang imong pamaagi sa kinabuhi; adunay pinasahe nga kaisog sa imong kasing-kasing nga dili naka mahadlok sa bisan unsa nga kalisdanan og katalagman niining kalibotana. Unya, sama ni Apostol Pablo, mapuno hinoon ka sa pagpasalamat sa Amahan nga maoy naghimo kanimong takos nga makaambit sa tanang panulondon sa gingharian (Colosas 1:12).

HIMOA KINI NGA PAGPASALAMAT:

NAGPASALAMAT AKO KANIMO MANGGIHATAGON NGA AMAHAN SA LANGIT TUNGOD KAY ANG IMONG GINGHARIAN GIKAHATAG MO KANAKO. BUSA, WALA NAY MAKULANG KANAKO. GIKAHATAG MO NA KANAKO ANG TANAN ARON MAGKINABUHI AKO SA KADAGAYA SAMA SA KINABUHI SA DIOS. MOSIDLAK OG MAGMABUNGAHON AKO DIHA SA TANANG MAAYO NGA BUHAT, SA NGALAN SA AKONG GINOONG HESU-KRISTO. AMEN.

20

PADAYON SA PAGTUBO PINAAGI SA PULONG

Hebreohanon 5:13-14

12Dugay na unta kamong nahimo nga mga magtutudlo apan hangtod karon nagkinahanglan pa kamog motudlo kaninyo sa unang mga leksiyon mahitungod sa mensahe sa Dios. Gahi na unta ang angay ninyong kan-on apan hangtod karon nagkinahanglan gihapon kamog gatas.

13Ang nagkinahanglag gatas bata pa ug walay kasinatian bahin sa maayo ug sa daotan. 14Apan ang gahing pagkaon alang sa mga hamtong na nga nakabansay ug nakagamit sa ilang igitilaw aron pag-ila sa kalainan tali sa maayo ug sa daotan.

1 Pedro 2:2

2Sama sa mga bata nga masuso, pangandoy kamo sa lunsayng gatas nga espirituhanon aron sa inyong pag-inom niini motubo kamo ngadto sa kaluwasan

Ang pagtubo sa spirituhanong bahin nagkinahanglan kini og Pulong kay mao man kini ang tinuod nga pagkaon sa kalag sa tawo. Gani, sumala sa gisulat ni Apostol Pedro, kinahanglan mangandoy ang mga bata pa sa spirituhanong bahin og lunsay o pure nga gatas aron nga motubo sila.

Adunay mga panahon nga nabuhi ka pinaage sa gatas, apan dili pwede nga magpabilin ikaw niana nga kahimtang. Kinahanglan gayod nga mohunong ka sa pagsalig sa gatas aron sa paghatag og insakto nga mga pagkaon sa imong lawas.

Kinahanglan nga magsugod ikaw sa spirituhanong gatas, apan kinahanglan pud ka nga mopadayon diha sa gahing pagkaon nga Pulong sa Dios. Ang gahing pagkaon alang sa mga hamtong na nga nakabansay ug nakagamit sa ilang igitilaw aron pag-ila sa kalainan tali sa maayo ug sa daotan.

Unsa may sinultihan sa mga ministro sa Ginoo ngadto sa mga bata pa sa pagtoo? Sama niini: “Igsoon, ayaw kabalaka sa imong sakit. Ayohon lagi ka sa Ginoo.” Tungod kana kay wala pa man kaayo siyay nahibal-an sa pagkamatarong sa Dios. Ang hamtong sa pagtoo, kasabot unsay tinuod nga punto sa gisulti sa ministro sa Ginoo tungod kay nabuhi man siya sa DIOSNON NGA KLASSE SA PANGLAWAS.

Ang tinuod nga hamtong na sa Pulong dili na maghulat sa Dios nga ayohon siya sa iyang sakit. Siya mismo kahibalo mogamit sa Pulong sa Dios nga anaa sa iyang kasing-kasing og baba. Sama niini ang Iyang sinultihan: Bisag unsay nitapot og nisulod nga dili maayo sa akong tibook lawas, karon dayon akong gihinginlan na mohawa. Ug ang tanan nga nasakit og nadaot nga parte sa akong lawas mauilian og maayo kini ingon nga ako anak sa Dios sa ngalan sa akong Manluluwas og Ginoo nga si Hesu-Kristo. Ako himsug og dili masakiton. Amen!”

Ang hamtong sa pagtoo dili malumos og maguol sa matag problema nga iyang madunog. Hinuon, iya kining tugbangan o banggaon sa Pulong sa Dios o sa sinultihan sama sa Ginoo.

Busa, pangandoya ang pagkahamtong sa pagpanabot sa mga pamaagi sa Spiritu sa GINOO ug sa Gingharian sa Dios. Si Apostol Pablo nag-ingon sa ***Efeso 4:13-15*** “*13hangtod magkahiusa kitang tanan diha sa pagtuo ug sa atong kahibalo mahitungod sa Anak sa Dios. Unya mahingkod kita sama sa kahingkod ni Cristo. 14Dili na unya kita sama sa mga bata nga maanod-anod sa mga balod ug mapadpad ngadto-nganhi sa nagbalibali nga hangin sa pagtulon-an sa malimbongong mga tawo nga magpasalaag sa uban pinaagi sa mga tanghaga nga ilang binuhat. 15Kinahanglan hinuong motubo kita sa tanang paagi ngadto kang Cristo nga mao ang ulo pinaagi sa pagsulti sa kamatuoran uban ang gugma.*”

Ang matuod nga paghamtong sa spirituhanon wala nagbasi kung pila naka katuig sa usa ka tiguman o unsa naka kadugay ingon nga kristohanon. Dili kini maoy basihan. Ang matuod nga hamtong mao kadtong:

1. ***Nagpailalom sa awtoridad sa PULONG SA DIOS;***
2. ***Nabansay ang iyang sinultihan sa pagtunong kung unsay sinultihan sa Dios.***
3. ***Dili na matandog pa sa bisan unsa nga pulong nga gikan sa tawo og sa yawa.***
4. ***Dili na siya mobalos og sakit nga sinultihan ngadto sa mga tawo nga nagpasakit kaniya.***
5. ***Ang manggawas sa iyang baba mao ang pulong sa gugma, pagtuo, paglaom, kalipay, pagdayag sa Dios, pagsangyaw sa Maayong Balita og pagdasig hinoon sa uban.***

Kung magpabilin ikaw nga bata, imong gilimbongan ang imong kaugalingon ug dili ka makatagamtan sa kanindot nga giandam nga para kanimo. May gahom ang Pulong, busa pagtuon kanunay sa insakto nga Pulong sa Dios. Pamati kanunay sa imong pastor, magtutudlo o tinuod nga alagad sa Ginoo.

Galatia 4:1

Ang buot kong ipasabot mao kini: samtang bata pa ang anak nga maoy manununod sa katigayonan sa iyang amahan, sama siya sa usa ka ulipon bisan kon siya ang tag-iya sa tanan.

Kini ni nagpasabot nga dili hamtong sa spirituhanong bahin dili pa kapiyalan og dili pa kahibalo modumala sa iyang katigayonan bisan tuod og siya manununod sa iyang Langitnong Amahan. KA SAYANG BA!

Mao kini ang hinungdan nga angay ka gayod nga mohamtong ingon nga anak sa Dios. Apil kanunay og ginagmay og dinagko nga tigom sa mga anak sa Dios ug pagbasa kanunay sa Biblia. Kung may nabasahan ka nga wala ka nakasabot, pahibalo ang imong magbalantay (pastor) o magtutudlo.

Dugang nga mga reperensiya:


Mateo 4:4 Mitubag si Jesus, “*Ang Kasulatan nag-ingon, ‘Ang tawo mabuhi dili sa pan lamang, kondili sa matag pulong usab nga isulti sa Dios.’ ”*

Santiago 1:22-23 *Ayaw limbongi ang inyong kaugalingon pinaagi sa pagpamati lamang sa pulong sa Dios; hinuon, tumana kini. 23Ang mamati sa iyang pulong apan dili magtuman niini, mahisama sa usa ka tawo nga manamin ug makakita sa iyang tinuod nga hitsura.*

1 Corinto 13:11 *Sa bata pa ako, ang akong sinultihan, pagbati ug panghunahuna binata; apan karon nga hamtong na ako, dili na ako magbinata.*

PAG-AMPO:

Mahigugmaong Amahan, nagpasalamat ako kanimo sa imong Pulong nga naghatag kanako sa tinuod nga paagi sa kinabuhi aron ako magmalamposon og magma-uswag, sa ingon niini ikaw mahimaya ug mapasidunggan pinaage sa akong kinabuhi. Gitanom mo ako sa spirituhanong yuta busa kanunay ako nga magmabungahon og magmalamposon kay ang nagkat-on man ako sa paglito og pagsulti sa imong sinultihan. Busa, walay circunstansya og mga problema nga dili mausab kay ang akong direksyon sa kinabuhi mao lamang ang pag-abante og pag-uswag. Salamat Amahan, ingon nga imong anak sa ngalan ni Hesus. Amen.



21

ANG PRINSIPYO SA PAGHATAG OG PAGDAWAT

Filipos 4:15

Nasayod kaayo kamong mga taga-Filipos nga sa pagbiya ko sa Macedonia, sa bag-o pang gisangyaw ang Maayong Balita, walay laing simbahan nga nakig-ambit kanako pinaagi sa paghatag ug sa pagdawat gawas kaninyo.

Usahay, adunay mga tawo nga moingon,”sa paghatag nato sa Dios dili basihan ang gidaghanon sa atong binhi nag gipugas”. Apan, ang Biblia nagkanayon, *”Timan-i nga ang nagpugas ug diyutay, mag-anig diyutay. Apan ang nagpugas ug daghan, mag-anig daghan.” (2 Corinto 9:6).*

Sa laing mga pulong, kung tihik ikaw sa pagpugas, mag-ani ka gayod og gamay lang. Apan, kon daghan ang imong gitanom makadahom ikaw og daghan nga abot gikan sa imong natanom. Pulong ka na sa Dios. Prinsipyo kini nga dili malalis. Wala si bisan kinsa nga mag-uuma nga wala kahibalo niini nga kamatuoran. UNSAY GIPUGAS MAOY MAANI. DIYUTAY NGA GIPUGAS, DIYUTAY ANG MAANI.

Kung atong sabton ang gisulat ni Apostol Pablo ngadto sa mga santos o mga magtotoo ni Hesu-Kristo didto sa Filipos, siya nag-ingon nga,...”walay laing simbahan nga nakig-ambit kanako pinaagi sa PAGHATAG ug sa PAGDAWAT gawas kaninyo.”

Igsoon, maayo og importante sa anak sa Dios ang pag-ampo. Apan, bisag sige pa ka og ampo nga daghan ka og maani, apan kung wala kay gitanom wala ka gayoy maani. Ang PAGDAWAT, resulta kini sa PAGHATAG. Ang PAG-ANI, resulta kini sa PAGPUGAS. Dili gayod mapuslan ang imong mga pag-ampo kon dili ka magsubay niini nga prinsipyo. Universal kini nga Prinsipyo- sa Langit man o Kalibotan, mao na gayod kini. Nganong moani man ikaw og pagdayeg sa mga tawo kung ikaw usa ka hinawayon? Pananglitan lamang kana.

Ang Dios og Amahan nato, naghatag na sa tanang mga prinsipyo o gitawag kini sa SCIENCE og “LAWS” o MGA BALAO. Kung kini nga mga balaod o prinsipyo, sa dihang maaplikar o gigamit sa husto, mohatag gayod kini o maayo nga epekto. Ayaw pasanginli ang Dios nganong wala kay naani. Yano lang ang tubag niana, wala kay napugas. Ang bisan unsa nga balaod kung wala kini nimo nagamit sa insakto, moguba kini kanimo.

Daghang mga butang nga dili kana angay pa nga mag-ampo sa Dios aron mahitabo ang imong gusto. Diskobreha lang ang mga prinsipyo o balaod niini ug e-aplikar sa imong kinabuhi, sigurado gayod ako nga mahitabo gayod ang imong gitinguha o gibungat sa imong baba. Klaro kaayo sa sambingay nga gitudlo sa atong Ginoo. Sa Marcos 4:26-28, wala Siya nag-ingon nga sa tapos na ang pagpugas ngadto sa yuta, ang tawo nag-ampo og nag-puasa aron nga ang mga binhi motubo; wala

gayod! Hinuon, natulog gani ang magpupugas ug sa ilang kaugalingon ang mga binhi mitubo kini kay natanom naman sa yuta og namunga pa og daghang mga bunga.

Sa dihang kahibalo naka mo aplikar sa prinsipyo sa pagtanom ug gibuhat na nimo kini, sa walay lalis, moani gyud ka. Sa **Genesis 8:22**, “*22Samtang ania pa ang kalibotan, dili gayod matapos ang panahon sa tingtanom ug ang panahon sa ting-ani, ang tingtugnaw ug ang ting-init, ang tinghulaw ug ang ting-ulan, ang adlaw ug ang gabii.*”

Samtang anaa pay panahon sa pagtanom, sigurado gyud na ang ani. Ang Dios nga Amahan dili mangunay sa pag-ani. Ang Iya lamang buhaton mao ang paggamit og bisan unsa og bisan kinsa aron mahitabo ang imong pagpangani. Gitawag kana kini og “CHANNEL”.

2 Corinto 9:8-*Ug ang Dios makahimo pagbubo sa tanang grasya nganha kaninyo aron kahatagan ug katagbawan ang tanan ninyong panginahanglan ug makahatag kamo nga madagayaon alang sa tanang maayong buhat.*

Lucas 6:38-*Panghatag kamo sa inyong isigkatawo ug kamo hatagan. Madawat ninyo ang hustong takos ug sobra pa gani nga mag-awas kini! Ang sudlanan nga inyong gamiton alang sa uban mao usab ang gamiton alang kaninyo.*”

Ecclesiastes 11:6-*Pananom sa buntag ug sa hapon, kay dili mo man masiguro hain sa imong gipugas ang motubo—kini ba o kana o sila bang tanan.*

PAG-AMPO:

LANGITNONG AMAHAN, nagpasalamat ako Kanimo sa pribilihiyo nga imong gihatag sa pagsabot sa imong prinsipyo nga maoy Maayong Balita alang kanako. Gipanalangin Mo na ako sa imong mga Pulong, busa ako mag-uswag og magmabungahon sa tanang bahin tungod kay ako usa na ka mag-pupugas, manggihatagon og dili dalo. Sa kanunay ako motanom nga walay tihik-tihik tungod kay gusto man ako og ani nga walay nay igong kasudlan, sa ingon niini magamit ko ang tanang abot alang sa pagpauswag sa imong bulohaton dinhi sa kalibotan, sa ngalan sa akong Ginoong Hesu-Kristo. Amen.

22

ANG TINUOD NGA KATAGBAWAN

Lucas 12:22-31

22Unya miingon si Jesus sa iyang mga tinun-an, “Mao kini ang hinungdan nga nag-ingon ako kaninyo: Ayaw kamo kabalaka sa pagkaon nga inyong gikinahanglan aron kamo mabuhi o mahitungod sa sapot nga inyong gikinahanglan alang sa inyong lawas. 23Kay ang kinabuhi mas mahinungdanon pa kaayo kay sa pagkaon ug ang lawas mas mahinungdanon pa kaayo kay sa sapot. 24Tan-awa ang mga uwak: wala sila magpugas ni mag-ani. Wala silay tigomanan o kamalig apan ang Dios nagpakaon kanila! Labaw pa kamo kaayog bili kay sa mga langgam!

25Kinsa ba kaninyo ang makadugang sa gitag-on sa iyang kinabuhi pinaagi sa pagkabalaka mahitungod niini? 26Kon dili kamo makadumala bisan niining gamayng butang, nganong mabalaka man kamo sa ubang mga butang? 27Tan-awa giunsa pagtubo sa mga ihalas nga kabulakan: wala sila magbudlay o maghabol alang sa ilang kaugalingon. Apan sultihan ko kamo nga bisan si Solomon nga dato na kaayo walay sapot nga ingon katahom sa usa niining mga bulaka. 28Kon gibistihan sa Dios ang mga sagbot nga karong adlaw ania pa apan ugma wala na kay isugnod man sa hudno, unsa pa kaha kamo? Pagkadiyutay sa inyong pagsalig! 29“Busa ayaw kamo kabalaka sa inyong pagpangitag kan-on ug imnon. 30(Kay ang mga tawo nga wala magtuo sa Dios kanunayng nangita niining tanan.) Nasayod ang inyong Amahan nga nagkinahanglan kamo niining mga butanga. 31Unaha hinuon pagpahari ang Dios diha sa inyong kinabuhi ug magsangkap siya kaninyo niining mga butanga.

Aduna pay mas importante sa imong sulod nga parte sa imong kinabuhi kaysa pagkaon alang sa imong tiyan, adunay mas importante sa imong lawas kaysa imong bisti o sinina nga sul-obon. Ang kinabuhi may mas masinati pa kini nga pinakamaayo o pinakaanindot nga kalipay nga labaw pa sa bisan unsa nga kahilayan, bahandi, salapi, bulawan, kwarta, mga gadgets, kabtangan, salakyan og bisan unsa pa.

Daghang mga tawo nga nakaangkon na niining kalibotanong kabtangan og nakasinati na niini yutan-ong kalipay, apan dili gihapon sila matagbaw og wala gihapon kanila ang matuod nga kaanindot sa kinasoloran nga bahin sa kinabuhi.

Daghan ang nagtoo nga kung daghan na sila og kwarta ug mga bahandi, naa na silay daghan nga tinuod og mounong nga mga higala, nga pwede na pud sila makabaton og daghang mga anak og mahimo na silang sikat o ilado sa katilingban. Apan, sa tumoy sa ilang mga pagpaningkamot, ilang maamgohan nga dili diay kini ang tinuod nga makahatag og kalipay.

Ang matuod nga katagbawan og katumanan sa imong pagkatawo niining kalibotana mao ang pagdiskobre sa katuyoan sa Dios alang kanimo og sa pagbuhat niini samtang buhi pa ikaw niining kalibotana.

Juan 4:34- Si Jesus miingon kanila, “Ang akong pagkaon mao ang pagtuman sa kabubut-on sa nagpadala kanako ug sa paghuman sa buluhaton nga iyang gipabuhat

kanako.” Mao kini ang gikinahanglan nimo nga tumong, kalipay, katagbawan ug kaangayan sa imong pagkinabuhi. Angay ka masayod nga ang tawo usa ka spiritu nga binuhat, busa ang makahatag gayod nimo og matuod nga kalipay mao ang mga sprituhanon mga butang og dili ang mga yutan-on.

Nakapangutana ka na ba sa imong kaugalingon,”Unsa ba gyud ang plano og gusto sa Dios sa akong kinabuhi?” Sa dihang masayran na nimo ang iyang damggo og pangandoy alang kanimo, mapuno ka gayod sa kalipay, ug imo kining angkonon ug mapuno ka sa katagbawan. Dili tanang tawo interesado sa masayod mahitungod sa kabubut-on sa Dios sa ilang kinabuhi, apan kung ikaw may panghuna-huna nga spirituhanon, interesado ka gayod niini.

Kung gusto ka og matuod, dili gastoso og dili peke nga kalipay og katagbawan, desisyoni nga makakat-on ka sa Diosnon nga katuyoan og sa mga butang nga iyang itudlo kanimo.

Unsa may angay nimong sugdan nga buhaton?

Sa imong pagbasa og pagtuon sa Biblia, uban sa pakighiusa sa Spiritu sa Ginoo ug sa imong pagtapo o tipon og paglihok uban sa lawas ni Cristo nga mao ang imong local church kung asa ka gibutang sa Ginoo, masugdan nimo sa pagdiskobre ang mga katuyoan sa Dios nganong naa ka niining kalibotana.

Niaana nga paagi, makita og masabtan nimo ang tinuod nga kahulogan sa imong kinabuhi.

PAG-AMPO:

Mahigugmaon nga Langitnong Amahan, salamat sa pagpasabot mo kanako mahitungod sa matuod nga katagbawan nga nagsandig lamang sa imong katuyoan. Ikaw naglihok sa akong kinasuloran. Ang imong kabubot-on og katuyoan mao nga ako magkinabuhi sa imong mga damggo alang kanako. Salamat sa paggiya sa direksyon sa imong hingpit nga kabubot-on. Ang akong pag-uswag, promosyon, kadaugan ug kalipay sigurado sa dihang ako magtuman sa imong katuyoan, sa ngalan ni Ginoong Hesu-Cristo. Amen.

23

ANG DAMGO SA DIOS ALANG KANIMO

Genesis 26:12-13

12Unya nag-uma si Isaac sa maong dapit ug niadtong tuiga usa ka gatos ka pilo ang iyang naani sa iyang pinugas kay gipanalanginan man siya sa Ginoo.

13Nagpadayon siya sa pag-uswag hangtod nadato siya pag-ayo.

Genesis 3:26-29

26Pinaagi sa pagtuo kamong tanan nahimong mga anak sa Dios sa pagpakighiusa ninyo kang Cristo Jesus. 27Gibunyagan kamo aron mahiusa kang Cristo busa nakaambit kamo sa kinaiya ni Cristo. 28Busa wala nay kalainan sa mga Judio ug sa mga dili Judio, sa mga ulipon ug sa mga gawasnon, sa mga lalaki ug sa mga babaye kay nahiusa na man kamong tanan kang Cristo Jesus. 29Kon kamo iya na ni Cristo, mga kaliwat kamo ni Abraham ug madawat ninyo ang gisaad sa Dios.

Genesis 22:17-18

17Isaad ko usab kanimo nga hatagan ko ikawg mga kaliwat nga sama kadaghan sa bituon sa langit ug sa balas sa baybayon. Buntogon sa imong kaliwat ang ilang mga kaaway. 18Ug mohangyo kanako ang tanang mga nasod nga panalanginan sila ingon nga akong gipanalanginan ang imong mga kaliwat—kay imo mang gituman ang gisugo ko kanimo.”

Ang mga bersikulo nga atong nabasa sa ibabaw nagpahibalo kanato sa atong panulondon tungod kay kita usab mga kaliwat ni Abraham pinaage sa atong pagtoo kang Ginoong Hesu-Cristo. Busa, gigahin ka daan alang sa kabantogan ug ang panalangin alang usab kanimo; busa mahimo kang panalangin sa imong palibot og katilingban.

Ang Dios nga Amahan nagbuot og nagpili kanato nga Iyang mga anak nga mahimo kitang mga bantogan, banggiitan ug panalangin alang sa uban; ug Iyang dakong pangandoy nga gamiton ang matag-usa kanato sa pinasahe, dinagko, kahibulongan og katingalahan nga paagi aron matoman ang Iyang kabubut-on dinhi sa kalibotan.

Ang tanan nga naanak sa Spiritu (Juan 3:3) anaa na kaniya ang binhi sa pagkabantugan og pagkabanggiitan. Nahimo kang anak sa Bantugan og Halangdon nga Dios, busa liwat pud ka Niya. Ayaw na gayod pagdahom og pagtoo nga ang imong pagkabantugan nakapende sa imong kaugalingon nga mga binuhatan, kay ang Biblia nag-ingon: “ 8 Kay pinaagi sa pagtuo naluwas kamo tungod sa grasya sa Dios. Dili kini inyong buhat kondili gasa sa Dios. 9 Busa walay makapasigarbo niini sanglit dili man kini bunga sa inyong mga paningkamot. (**Efeso 2:8-9**).

Angay ka masayod sa imong tinuod og matuod nga ikaw diha kang Cristo. Ikaw anak sa Dios, may kinaiya sama ni Cristo ug gipaanak nga madaugon og kusgan.

Bantayi pagbalik ang bersikulo, lantawa ang ideya sa Dios: Miingon Siya ngadto kang Abraham, “*Hatagan ko ikaw ug daghang kaliwat ug mahimo silang dakong nasod. Panalanginan ko ikaw ug himoon kong bantogan ang imong ngalan aron*

mahimo kang panalangin alang sa uban. (Genesis 12:2). Dili si Abraham ang nihagad nga himoon siya nga bantogan. Hinuon, ideya kini sa Dios. Ang imong pagkabantogan pagpili kini sa Dios kay bisag kapila pa mamugos ang tawo nga panalanginan sa Dios, kung dili ganahan ang Dios mopanalangin, wala gayod siyay mahimo.

Nagpasabot kini nga bisag tuyo mo pa o dili nga mahimo kang bantogan, damgo og tinguha na gayod sa Dios nga ang Iyang mga anak mahimong bantogan tungod kay kaliwat man ikaw ni Abraham og labaw sa tanan, liwat ka sa Dios. Dili na kinahanglanon pa nga maglayog og mag-antos ka og maayo aron ka mahimong bantogan; ang pagkabantogan maoy imong kinabuhi.

Lantawa usab ang gibuhat sa Dios ngadto kang Moises. *“3Gihimo sa Ginoo nga ang mga Israelita tahoron sa mga Ehiptohanon. Si Moises giila sa mga opisyal sa hari ug sa mga Ehiptohanon nga usa ka mahinungdanong tawo.” (Exodo 11:3)*

Busa, pagkinabuhi matag adlaw uban sa mentalidad o panghuna-huna sa usa ka bantogan og banggiitan. Tugoti kini nga madayag sa imong mga sinultihan, panghuna-huna, pamaagi og stilo sa kinabuhi.

PAG-AMPO:

Salamat buotan nga Amahan sa paghatag mo kanako sa kinabuhi nga bantogan og halangdon. Busa, magbuhat ako og mga maayo og dagkong butang sa akong kinabuhi og sa kinabuhi sa uban, pinaage sa gahom sa Imong Pulong ug sa abilidad sa Imong Spiritu nga imong gikahatag diri kanako. Sa magtuon ako sa Imong Pulong, makita ko kanunay ang akong pagkabantogan og pagkabanggiitan! Motindog og molakaw ako diha sa Imong panabot, kahibalo og kaalam aron akong maakomplisar ang mga dagko og kahibulongan nga mga buhat og ministryo alang sa pagpalapad, pagpadako og pagpauswag sa Diosnon nga gingharian, sa ngalan ni Hesu-Cristo nga akong Ginoo og Manluluwas. Amen!

24

MGA SEKRETO SA KALAMPUSAN

Panultihon 24:3-4

3Pinaagi sa kaalam, gitukod ang panimalay ug ang maayong panabot mao ang patukoranan niini.

4Pinaagi sa kahibalo, ang mga lawak gisangkapan sa mahalon ug matahom nga mga butang.

Sa bersikulo nga atong nabasa makita nato ang tulo ka mga importante nga elemento sa pagtukod og malampuson nga kinabuhi:

- 1. KAALAM**
- 2. PANABOT**
- 3. KAHIBALO**

Nagaingon kini,”pinaage sa KAALAM, “GITUKOD ANG PANIMALAY”. Ang panimalay dinhi gipakasama sa imong kinabuhi, negosyo, pangita, pamilya og bisan unsa nga patigayon.

Nagpadayon ang bersikulo nga nag-ingon: “ang MAAYONG PANABOT mao ang PATUKORANAN niini.” Ug unya pinaage sa KAHIBALO, ang mga LAWAK masangkapan sa mahalon ug matahom nga mga butang.

Ang kaalam mao ang bilihon nga ideya nga imong makuha, masuyop og magamit gikan sa imong kahibalo alang sa mga bulohaton. Kini nga ideya giisip sa uban nga mga sekreto o misterio sa kinabuhi.

Nag-ingon usab ang Biblia,” *7Ang pagbaton ug kaalam mao ang labing maayong butang nga imong mahimo. Ang ikaduha mao ang pagbaton ug maayong panabot. 8Higugmaa ang kaalam ug himoon ka niyang bantogan. Hupti kini ug pasidunggan ka niya. 9Siya ang labing dakong dungog nga imong mahuptan.” (Panultihon 4:7-9).*

Ang KAALAM mao ang LABING MAAYONG BUTANG! Lantawa. Wala pud kini mihunong sa kaalam lamang, hinuon nagpadayon kini sa pagtudlo kanato nga angay diay kita magbaton ug MAAYONG PANABOT. Ang spirituhanong panabot mao ang maayong panabot. Pareho ang kaalam og maayong panabot nga gikinahanglan aron matukod kita sa atong kinabuhi nga malampuson. Naa man tingale kay kaalam sa pagsugod sa pagtukod sa usa ka bulohaton, apan nagkinahanglan gyud ka og maayong panabot ingon nga patukoranan, ug idugang pa gayod ang kahibalo kung unsaon ang pagpadayon og pag-abante sa imong nasugdan og natukod aron makita gikan sa himaya ngadto sa laing dapit sa himaya ang imong kinabuhi. Pinaage niini, malipay gayod ang atong Langitnong Amahan.

Sa Colosas 1:9, ang Espiritu, pinaage ni Apostol Pablo, nag-ampo alang sa mga magtotoo ni Ginoong Hesu-Cristo nga mapuno sa Kahibalo sa kabubot-on sa Dios uban sa kaalam og spirituhanong panabot.

Colosas 1:9

“Nag-ampo gayod kami kanunay alang kaninyo sukad sa pagkasayod namo niini. Gipangayo namo sa Dios nga masayod unta kamo sa iyang kabubut-on uban sa tanang kaalam ug kahibalo nga gihatag sa iyang Espiritu”

Ang kahibalo nga gihisgutan ni Apostol Pablo mao ang KINATIBUK-AN NGA KAHIBALO SA DIOS. Busa, pinaage niini nga kahibalo, ang imong panimalay (kinabuhi) mapuno sa tanang mga mahalon og maayo nga mga butang.

Ang tulo: KAALAM, MAAYONG PANABOT, ug KAHIBALO kinahanglan nga dili magbulag. Hinuon, kanunay silang magkuyog. Nagkinahanglan ka niining tulo aron mahimo kang epektibo, ug makinabuhi sa dili ordinaryo nga kalamposan, pagmando, kadaugan og pinakaanindot nga kalidad o ekselente.

Kung gusto ka og dugang nga mga pagtuon mahitungod niini, pwede ka nga magbasa sa Panultihon o Proverbio 8:1-14.

PAG-AMPO:

MAALAMON NGA AMAHAN, angay Ka nga pasalamatan sa pagbubo mo kanako sa imong Espiritu nga naghatag sa gasa sa KAALAM, MAAYONG PANABOT, ug KAHIBALO. Karon, ako puno sa kahibalo sa imong kabubot-on, diha sa tanang kaalam uban sa maayong panabot aron nga bisag unsay gusto mo nga akong buhaton og himoon makita gayod ang pinakaanindot nga kalidad kay ako liwat man nimo, sa ngalan ni Hesu-Cristo nga akong Ginoo. Amen.

25

PAMAAGI SA DIOS SA PAGLIMPYO KANIMO**Juan 15:3***Kamo nahinloan na pinaage sa pulong nga akong giingon kaninyo.*

Adunay lig-on nga koneksyon tali sa dautan nga naandan o pamatasan (habit) ug sa impluwensiya sa demonyo. Kining duha gasumpay og nagkasinabot. Ang tawo usa ka spiritu nga nagpuyo sa lawas og may kalag nga konektar sa spiritu og lawas. Tungod kay ang tawo spiritu man, ang iyang nabatasan spirituhanon usab kini. Ang batasan mao kini ang resulta sa imong naandan nga lihoc o aksyon nga gibalik-balik sa makanunay.

Adunay mga maayo nga batasan, aduna puy daotan nga mga batasan o mga naandan. Kung sigohon nimo ang daotan nga mga aksyon o lihoc, moresulta gyud na og daotan nga pamatasan o habit. Kung ang imong lihoc kada adlaw mobangon ka dayon og dili magdeklara og mga maayong pulong alang imong kinabuhi, pamilya, komyunidad og kalibotan og dili pud ka mobasa og Biblia, hangtud nga magulang ka dili na gyud na nimo buhaton kay nabatasan naman nimo. Gawas kung adunay tinuod nga pagbag-o sa imong hunahuna og mao kini ang tinuod nga kahulogan sa pulong HINULSOL (sa English: *Repentance* ug sa Greek: *METANOIA*).

Si satanas mangitag oportunidad og mosakay sa tanang higayon sa batasan sa tawo aron lang maulipon og mamandoan niya ang tawo. Bisan pa man niana, dili lang gihapon siya kapugos sa desisyon sa tawo nga mosubmitar niya; kondili, ang tawo mismo maoy ni desisyon nga magpailalom siya sa yawa o dili magpailalom. Walay mahimo ang yawa sa tawo nga dili magpaimpluwensiya kaniya. Apan sa tawo nga mo desisyon nga magpailalom siya sa yawa, sakyan gyud dayon na sa kaaway.

Daghan kaayong mga tawo nga nagpailalom sa yawa apan sila mismo wala makabantay nga yawa na diay ang gadiktar sa ilang utok. Busa, nailalom na sila sa kaaway bisan tuod og moingon pa sila nga “dili gyud ko ganahan og yawa oi”. Dili lagi. Apan ang kinaiya og batasan kay pareho man sa yawa. Dako kaayo ni nga problema. Ngano? Kay mao ni sila ang makabantay sa apan sa uban, pero sila sa ilang kaugalingon wala nila nabantayi. Ang tinuod nga Diosnon, dili maglantaw sa apan og kaluyahon sa uban. Hinuon, moampo pa sa Dios nga Amahan aron matabangan, mabag-o og malig-on ang iyang nakita nga mga tawo nga anaa sa pagmando ni satanas.

Juan 8:32 (APSD)- *“Masayran ninyo ang kamatuoran, ug ang kamatuoran mao ang maghatag kaninyo ug kagawasan.”*

Salmo 119:9 (APSD)- *“Unsay buhaton sa usa ka batan-on aron mahimong putli ang iyang kinabuhi? Ang iyang himuon mao ang pagsunod sa imong pulong.”*

Busa, unsa may pinakamaayo nga solusyon para sa mga tawo nga nagtoo nga sila wala kono nayawaan o naimpluwensiya sa yawa, gawas sa pag-ampo nga imong

gibuhat alang kanila? Ang pagkinabuhi diha pinaage sa Spiritu sa Dios ug sa kahibalo sa Pulong gikinahanglan sa matag tawo alang sa madaugon nga kinabuhi.

Nisulti ang Ginoo ngadto sa Iyang mga disipolo, “*Kamo nahinloan na pinaage sa pulong nga akong giingon kaninyo.*” Nagpasabot kini nga ang Pulong sa Dios ang makalimpyo og makahinlo sa matag tawo. Mao lamang kini ang maghimo kanimo nga putli og balaan. Sa dihang imong paminawon, dawaton og pamalandongan ang Pulong sa Dios, mopahigawas kini kanimo sa tanang kabalaka, kalagot, kahiubos, kasuko, kahadlok, kahugawan, kangil-aran og kangitngitan. Tugoti ang Pulong sa Dios nga mobag-o kanimo. Apil kanunay og mga Bible studies og mga ginagmay og dinagko nga mga pagtoon sa Pulong sa Dios.

Dili ka na magkinahanglan pa og sige og paampo og paghingilin og yawa sa imong lawas. Ang kulang lang sa mga tawo nga naulipon sa problema mao ra gayod ang insaktong kahibalo og panabot sa Pulong sa Dios. Walay yawa nga makaagwanta sa tawo nga puno sa Pulong sa Dios. Ang Pulong sa Dios, Dios usab (*Juan 1:1*). Busa, kung puno ikaw sa Pulong sa Dios, puno usab ikaw sa Dios. Hallelujah!

ISUGID KINI:

INGON NGA ANAK SA DIOS, ako magadawat sa putli og tinuod nga Pulong sa Dios sa akong kinabuhi. Ang Pulong maoy akong kagawasan. Magpatudlo ako sa akong magtutudlo o magbalantay nga gigasa sa Ginoo alang kanako. Maglakaw ako diha sa kahingpit og pinaka-anindot nga kahimtang sa kinabuhi aron mamunga ako og Diosnong bunga og aron makita ang pagkamatarong sa Dios pinaage kanako. Sugod karon ako sensitivo na nga mamati sa Pulong sa Dios ug ang Spiritu sa Ginoo nga naglihok diri kanako maghari sa akong mga desisyon aron nga walay palpak og mga bati nga kahimtang nga akong masinati, sa ngalang ni Ginoong Hesu-Cristo. Amen.

26

ANG ADLAW NGA IGPAPAHULAY

Hebreohanon 4:4-10

6Kadtong unang nakadungog sa Maayong Balita wala makasulod ug makaangkon sa kapahulayan sa Dios tungod kay wala man sila motuo. Busa may pipila diay nga makasulod ug makaangkon sa kapahulayan sa Dios.

7Ug nagtagal siyag adlaw nga ginganlag “Karong Adlaw.” Nagsulti siya niini tapos ang daghang katuigan pinaagi ni David diha sa Kasulatan nga gihisgotan na: Kon makadungog kamo sa tingog sa Dios karong adlaw, ayawg pagahia ang inyong kasingkasing.”

8Kay kon nakahatag pa kanilag pahulay si Josue dili na unta ang Dios maghisgot sa ulahi ug lain pa nga adlaw. 9 Busa dunay adlaw sa pahulay alang sa katawhan sa Dios. 10Kay bisag kinsa nga makadawat sa kapahulayan nga gisaad sa Dios, mopahulay siya sa iyang mga buhat sama nga mipahulay ang Dios.

Colosas 2:16-17

16Busa ayaw ninyo itugot nga may magsaway kaninyo mahitungod sa pagkaon o ilimnon o mahitungod sa mga adlaw nga balaan o sa kasaulogan sa bag-ong bulan o bahin sa Adlaw nga Igpapahulay. 17Kining tanan mga anino lamang sa mga butang nga umaabot, apan ang katumanan mao si Cristo.

Ang pagpahulay importante sa tanan, ug ang Dios maoy modelo niini sa sinugdanan pa aron adunay kitay sumbanan. Sa Genesis 1, ang Dios nagbuhat sa kalibutan sulod sa unom ka adlaw, ug sa ikapito nga adlaw nipahulay Siya. Dili kay kana lang, bantayi usab nga kanus-a nabuhat ang tawo. Diba sa ikaunom nga adlaw. Sa homan na ang tanan sa kalibotan nga nabuhat sa Dios, ang tawo maoy Iyang ulahi nga gibuhay ug iyang gibutang sa tanaman dili aron maghago, kondili magdumala o magbuot sa kaanindot nga giandam alang sa tawo. Gibuhay ba sa Dios si Adan og Eva aron tabangan ang Dios sa Iyang gibuhay? Wala! Gibuhay ba Niya ang tawo aron dugangan ang mga binuhay sa Dios? Wala!

Nakita na sa Dios nga ang Iyang tanan nga gibuhay maayo ug nalipay Siya niining tanan. Kitang tanan giimbitahan sa Dios dili aron maghago; hinuon, aron nga magmaya, magkalipay, magsadya, magpahulay diha sa Iyang natapos na nga gibuhay ni Ginoong Hesu-Cristo didto sa krus.

Ang Ikaduhang Kasabotan naghatag kanato og ehemplo sa hingpit nga gibuhay sa Ginoo. Sa sulod sa tulo ka adlaw. Si Ginoong Hesus namatay alang sa atong sala, nalubong Siya, ug nabanhaw gikan sa kamatayon.

Giimbitahan ba ang tawo sa Dios nga tabangan Siya aron makaluwas Siya kanato? Wala gayod! Giimbitahan ba kita sa Dios nga dugangan pa nato ang Iyang gibuhay aron maluwas kita? Wala gayod! Nakita na sa Dios ang Iyang gibuhay, ug kini maayo og nakapahimuot Kaniya. Giimbitahan kita sa pag-ambit sa kalipay og bankiti sa Dios tungod sa Iyang mga maayo nga nahimo aron masinati nato ang pagkabuotan og pagkamaayo sa Dios alang sa tanan.

Nakita ba nimo ang kapareho (parallel) sa gibuhay ni Ginoong Hesus og ang nabuhay sa panahon sa Genesis 1? Una, si Adan og si Eva giimbitahan sa Dios aron makatagamtam sa mga bunga sa giugmad og gibuhay sa Dios. Gibuhay sila sa Dios dili aron maghago og tanom og magtrabaho, kondili aron moambit sa kaanindot og sa kapahulayan sa Dios gikan sa tanan nga Iyang gibuhay para sa tawo. Karon, kita usab giimbitahan Niya nga mosinati sa mga bunga sa Iyang hinagoan pinaage sa Iyang kamatayon ug pagkabanhaw. **Giimbitahan kitang tanan nga mopahulay sa spirituhanong kapahulayan diha kang Cristo.**

Nganong makapahulay na kita og dili na maghago-hago pa aron malipay ang Dios kanato? Una, tungod kay ang atong mga kasal-anan gipapas na og gikuha palayo gikan kanato kausa kini buhaya ug alang sa tanang panahon og sa tanang tawo. Makasayod kita nga dili na kita sad-an pa sa atong pagtindog atubangan sa trono sa Dios, ug dili na Niya hinumdoman pa ang tanan tang kasal-anan nga nabuhay dinhi sa kalibotan. Dili ba mogaan ang imong paminaw niini nga kamatuoran og may tinuod kitang kapahulayan sa kalag?

Ikaduha, ang atong pakigrelasyon sa Dios nga binasi og gibasi sa pagtuman sa mga Balaod og pagbinuotan pinaage sa kaugalingong paningkamot gitapos og gisulbad na sa atong Manluluwas nga si Hesu-Cristo. Ang Dios wala gadala og taas nga listahan kon unsay angay natong buhaton aron mabatonan nato ang kaluwasan.

Busa, atong nasayran nga ang Dios wala nagsukod kanato basi sa atong unsay mahimo og mabuhay, apan sa atong pagsalig sa Iyang nahimo og nabuhay. Iya kitang gidawat ug wala kitay ibayad niini. Si Hesus mismo ang nibayad para kanato. Kita may bag-o na nga kasing-kasing; may bag-o nga spiritu; bag-o na ang atong pagkatawo tungod kay mitoo kita nga namatay, nalubong og nabanhaw pud kita uban ni Cristo bisan og wala kita anang panahona sa pisikal nga bahin. Apan pinaage sa pagtoo, ato kining gidawat nga kamatuoran.

Nagpasabot kini nga dili na kita maghago og magbudlay sa pag-ayo, pagtarong og sa pagdagmal sa atong kaugalingon aron lamang mahimo kitang balaan sa mata sa Amahan. Diba kapahulayan kana?

Katapusan, ang Dios nahigugma kanato sa walay kondisyon. Dili Niya bawion ang Iyang presensya nga nagpuyo na sa sulod kanato kay nasayod Siya nga mas nagkinahanglan ta Kaniya. Ang tawo walay mahimo kung wala ang Dios, busa Siya mismo ang mopuyo sa sulod kanato aron sugdan Niya og trabaho, pag-ayo, pag-usab og pagpaanindot sa ang atong kinabuhi. Ang pagbag-o sa Dios kanato wala nagsugod sa gawas sa atong lawas, apan sa kinasuloran.

Gikuha Niya ang atong patay og dunot nga spiritu kaniadto ug giilisan Niya og spiritu nga sama sa Iyaha. Mao na ang Spiritu, Spiritu sa Dios. Tinuod kanang giingon nga **“MAY SPIRITU KANA SA DIOS”**. Ang imong spiritu anak sa Dios. Busa, 100% o sienta persento nga pareho Ka Niya. Mao kini ang mag-mando, magdasig, magbadlong, magtudlo, maglig-on, maggiya, maghimo og mohatag kanimong og gugma, kalipay, kalinaw, pailob, kaluoy, kaayo, pagkamatinud-anon, pagkamapaubsanon ug pagkamapinugnganon sa kaugalingon.

Ang Spiritu sa Dios nga nagpuyo kanato maoy atong Manlalaban (Abogado), Magtatambag, ug Giya sa tanang kamatuoran. Diba mas makahatag kini kanato og KAPAHULAYAN? Busa, unsa man diay ang gipasabot diha sa Hebreohanon 4:11 nga *“Busa maninguha kita sa pag-angkon sa gisaad nga kapahulayan aron walay usa kanato nga mapakyas sama sa nahitabo kanila (mga Israelita) tungod sa ilang pagkamasupilon”?*

Nagpasabot kini nga atong ipahiuyon ang atong panghuna-huna niining makahatag og kapahulayan nga mga kamatuoran ug mopahulay kita sa tinuod nga kapahulayan nga mao si Hesu-Cristo- ang Ginoo sa Igpapahulay. Ang Hebreohanon kapitulo 4 naghisgot kini og spirituhanong kapahulayan, dili pisikal nga kapahulayan. Sa kasing-kasing og huna-huna sa Dios, ang mas importante mao kapahulayan diha kang Hesu-Cristo ug ang tanan nga Iyang mga pag-antos labi na didto sa krus og ang epekto sa Iyang pagkabanhaw.

Ang Hebreohanon 4:1 nagtudlo kanato, ***“Busa samtang nagpadayon ang saad sa Dios nga makasulod kita aron makaangkon sa iyang pahulay, magmatngon kita nga walay usa kanato nga mapakyas sa pagdawat nianang maong kapahulayan.”*** Kini nga bersikulo nag-awhag kanato nga mopahulay kita diha sa Ginoo. Sa panahon nga makadungog kita sa Maayong Balita, importante gayod nga motoo kita niini og mopahulay sa spirituhanong kapahulayan nga gigasa ni Ginoong Hesus kanato. Mao kanay giingon sa mga sunod nga bersikulo (2-3).

Karong adlaw og ang matag adlaw mao ang Adlaw nga magmaya, magkalipay ug magsaulog sa kapahulayan (bersikulo 7). Ang nagsulat (author) sa Hebreohanon naghatag og ehemplo mahitungod sa mga Israelita nga nahatagan unta sa kapahulayan didto sa YUTA NGA GISAAD (PROMISED LAND). Apan tungod kay dili man sila motoo sa gisaad sa Dios kanila kay mga sigurista nga wala namao, nag-antos hinoon sila sa diserto sulod sa kuwarenta (40) ka tuig. Ang nagsulat sa Hebreohanon nag-aghat kanato nga dili na unta nato usbon ang dakong sayop sa mga Israelita nga dili motoo sa nindot nga gisaad sa Ginoo diha sa mensahe sa Ikaduha (Bag-o) nga Kasabutan.

Ang kasagaran nga sayop nga nahimo sa dihang magbasa sila sa Hebreohanon 4 mao ang pagdahom nga kini ang Kapahulayan nga gihisgotan diri naghisgot sa Una (Karaang) Kasabotan. Dinhi sila nasayop. Tungod sa pagkailalom sa Balaod sa mga Israelita, sila gibalaoran nga ang adlaw nga ikapito sa semana igahin kini alang sa pisikal nga kapahulayan. Sa ilang panahon (dili sa atong panahon karon), ang Dios gadili gyud sa mga Israelita nga magtrabaho o adunay buhaton basta adlaw sa igpapahulay.

Apan alang kanato nga magtotoo nga ilalom sa IKADUHA (BAG-O) NGA KASABOTAN, ang kapahulayan nga gihisgotan sa Hebreohanon 4 walay labot o kalambigitan sa literal nga adlaw sa semana. Spirituhanon ang gihisgotan diri og dili pisikal nga kapahulayan. Ingon nga magtotoo, patay na kita sa Balaod.

Roma 7:4- “Kamo usab, mga igsoon, patay na sa Balaod kay bahin man kamo sa lawas ni Cristo. Karon iya na kamo ni Cristo nga gibanhaw aron magkinabuhi kita nga mapuslanon alang sa Dios.”

Galatia 2:19 - *“Kay kon ipasikad nato sa Balaod, ako patay na- gipatay pinaagi sa Balaod aron nga magkinabuhi ako alang sa Dios.”*

Dili na kita ilalom sa Balaod.

Roma 6:14- *“Kinahanglan nga dili na kamo magpaulipon sa sala kay dili na man kamo ilalom sa balaod kondili ilalom na sa grasya sa Dios.*

Galatia 5:18- *“Kon ang Espiritu maoy nagmando kaninyo, dili na kamo ilalom sa Balaod.”*

Si Hesu-Cristo mao ang kataposan sa Balaod alang niadto mitoo sa kaniya nga maoy manluluwas. Siya ang mituldok sa Balaod.

Roma 10:4- *“Kay si Cristo mao ang kataposan sa Balaod aron himoong matarong sa Dios ang tanan nga may pagtuo.”*

BUSA, dili na kita obligado pa nga motuman sa gipangayo sa Balaod mahitungod sa literal nga Adlaw nga Igpapahulay.

Colosas 2:16-17- *“Busa ayaw ninyo itugot nga may magsaway kaninyo mahitungod sa pagkaon o ilimnon o mahitungod sa mga adlaw nga balaan o sa kasaulogan sa bag-ong bulan o bahin sa Adlaw nga Igpapahulay. 17 Kining tanan mga anino lamang sa mga butang nga umaabot, apan ang katumanan mao si Cristo.”*

Ang Adlaw nga Igpapahulay nga gitahod sa mga Israelita anino o simbolo lamang kini sa spirituhanong kapahulayan nga atong mapahimuslan matag adlaw diha kang Cristo. Sa dihang nakaila kita ni Hesu-Cristo ug ang Iyang Espiritu mao nay atong Espiritu, wala na kitay panahon pa nga mobalik o molingi sa mga anino. Anaa na kanato ang REYALIDAD o KAMATUORAN, nga mao si HESU-CRISTO. Giimbitahan kita nga mopahulay diha sa Ginoo sa tanang oras og adlaw sa atong kinabuhi.

27

ANG MGA GASA NI GINOONG HESUS ALANG SA PAGDUMALA SA SIMBAHAN

Efeso 4:11-13

11 Ang mga gasa niya mao nga ang uban iyang gihimong mga apostoles, ang uban mga propeta, ang uban mga ebanghelista o tigsangyaw sa Maayong Balita, ang uban mga pastor ug mga magtutudlo.

12 Gihimo niya kini aron sa pag-andam sa tibuok katawhan sa Dios alang sa buluhaton sa Cristohanong pag-alagad aron motubo ang lawas ni Cristo

13 hangtod magkahiusa kitang tanan diha sa pagtuo ug sa atong kahibalo mahitungod sa Anak sa Dios. Unya mahingkod kita sama sa kahingkod ni Cristo.

Pagkahoman nga namatay ang atong Manluluwas didto sa krus, gilubong, nabanhaw, nikayab Siya ngadto sa Langit aron maglingkod sa trono nga giandam sa Langitnong Amahan alang Kaniya.

Buhat 1:9-10

9 Human niya isulti kini, gibayaw siya ngadto sa langit samtang nagtan-aw sila kaniya. Unya gisalipdan siyag panganod ug wala na nila siya makita.

10 Samtang nagtutok sila sa langit sa pagkayab ni Jesus, may duha ka tawo nga nagbistig puti nga mitungha pagkalit ug mibarog tupad kanila. 11 Miingon sila, “Mga taga-Galilea, nganong nagbarog man kamo dinhi ug nagsigig hangad sa langit? Si Jesus nga gibayaw ngadto sa langit mobalik sa samang paagi sa iyang pagkayab ngadto sa langit.”

Efeso 1:20-22

20 iyang gigamit sa pagbanhaw ug pagpalingkod kang Cristo sa iyang tuo didto sa langit. 21 Didto naghari si Cristo labaw sa tanang mga hari ug sa mga anaa sa gahom ug sa mga namunoan ingon man sa mga pangulo. Labaw gayod siya sa tanan dili lamang niining panahona kondili sa umaabot usab. 22 Gibutang sa Dios ang tanan ubos sa pagmando ni Cristo ug alang sa simbahan gihimo siyang pangulo nga labaw sa tanan.

Gikan niana nga dapit sa awtoridad ni Hesus naghatag Siya og mga gasa sa pagdumala o pagpangulo sa simbahan o Iglesia. Ang Ginoo mismo ang mamili og mohatag ngadto sa mga katawhan kung kinsay iyang ibutang ingon nga mga: APOSTOLES, PROPETA, EBANGHELISTA, PASTOR, ug MAGTUTUDLO aron sa pag-andam sa tibuok katawhan sa Dios alang sa buluhaton sa Cristohanong pag-alagad aron motubo ang lawas ni Cristo.

Sa Griego nga teksto aning pulong nga “PAG-ANDAM” mao ang “**katartismos**”. Kini nga pulong nagpasabot og

1. “*repair*” o ayohon ang nadaot o na-damage nga nakaplagan diha sa mga magtotoo tungod sa pagkakulang sa kasayoran og pagsabot sa Pulong sa Dios.

2. “*prepare*” o pag-andam.

3. “*equip*” o pagsangkap.

Busa, atong masabtan gikan sa ikaduha og ikatulo nga kahulogan sa pulong **“katartismos”** nga ang mga magtotoo gipadalhan og lima ka mga gasa nga maoy modumala o mangulo aron dili lamang nga ayohon ang ilang kinabuhi, kondili andamon og sangkapan usab ang tanang magtotoo alang sa buluhaton sa Cristohanong pag-alagad aron motubo ang lawas ni Cristo.

Ang mga pangulo sa simbahan maoy motudlo og mobansay o mo-train sa mga magtotoo aron nga sila makahimo sa mga buluhaton sa pagpangalagad sa ingon niini matoman nila ang pangandoy ni Dios kanila alang sa simbahan. Looy ang simbahan kung ang matag-usa dili kalihok sa angayan nga buhaton.

Nganong mang tudloan og bansayon sa mga Lima ka klase o lima ka pilo nga mga alagad (o Fivefold Ministers) ang mga sakop sa simbahan?

1. ARON SILA MAKALAGAD SA GINOO

Buhat 13:1-2 *“1 Sa simbahan sa Antioquia dihay mga propeta ug mga magtutudlo nga si Bernabe, si Simeon nga gianggaag Negro, si Lucio nga taga-Cirene, si Manaen nga namatuto uban ni Gobernador Herodes, ug si Saulo. 2 Usa ka adlaw niana, samtang nagsimba sila sa Ginoo ug nagpuasa, miingon kanila ang Espiritu Santo, “Igahin alang kanako si Bernabe ug si Saulo alang sa buluhaton nga maoy hinungdan sa pagtawag ko kanila.”*

2. ARON SILA MAKALAGAD SA USA’G-USA.

Buhat 2:44-46 - *“44 Ang tanang mga magtutuo nagpadayon sa ilang panagkauban ug ang mga kabtangan sa matag usa kanila gipakig-ambitan nilang tanan. 45 Ug gipamaligya nila ang ilang mga katigayonan ug ang halin ilang giapod-apod ngadto sa tanan sumala sa gikinahanglan sa usag-usa. 46 Nagpadayon sila sa pagtigom matag adlaw didto sa Templo ug naghiusa sila pagpangaon uban sa malipayon ug mapaubsanong kasingkasing didto sa ilang mga balay.*

3. ARON SILA MAKALAGAD SA DILI MAGTUTUO.

Buhat 2:47 - *Gidayeg nila ang Dios ug gikahimut-an sila sa katawhan. Ug sa matag adlaw gidugangan sa Ginoo ang ilang pundok ug mga tawo nga nangaluwas.*

Marcos 16:15 - *Miingon siya kanila, “Panglakaw kamo sa tibuok kalibotan ug isangyaw kining Maayong Balita ngadto sa tanang mga tawo.*

28

ANG MGA APOSTOLES SA SIMBAHAN

Ang pulong “apostol” gikan kini sa Griego nga “**apostolos**”, nagpasabot “usa ka pinadala” o “siya nga pinadala (ingon nga usa ka embahador o “ambassador”). Ang Ginoo Hesus Siya mao ANG PINADALA o ANG APOSTOL (Hebreohanon 3:1). Siya ang gatukod sa Iglesia.

I. ANG TULO KA GRUPO SA MGA APOSTOLES DIHA SA IKADUHA NGA KASABOTAN.

Ang Ikaduha (0 Bag-o) nga Kasabotan nagpakita og tulo (3) ka grupo nga mga Apostoles.

A. Mao kadto ang “Dose (12) ka mga apostoles sa Nating Karnero sa Dios (nga mao si Hesus)”.

Sa dinhi pa si Ginoong Hesus sa kalibotan, nagpili Siya og dose ka tawo aron himoon niya mga studyante o tinun-an o disipolo aron nga sa dihang nihamtong na sila, sila usab gipadala sa Ginoo (Mateo 10:16).

Mateo 10:1-5

1 Gitigom ni Jesus ang iyang napulog-duha ka tinun-an ug gihatagan niya silag gahom sa paghingilin sa mga daotang espiritu ug sa pag-ayo sa tanang sakit ug balatian. 2 Mao kini ang mga ngalan sa napulog-duha ka apostoles: una si Simon (nga ginganlag Pedro) ug ang iyang igsoon nga si Andres; si Santiago ug ang iyang igsoon nga si Juan, mga anak ni Sebedeo; 3 si Felipe ug si Bartolome; si Tomas ug si Mateo, ang kobrador sa buhis; si Santiago, ang anak ni Alfeo ug si Tadeo; 4 si Simon nga Patriyota ug si Judas Iscariote, ang nagbudhi kang Jesus. 5 Gidala ni Jesus kining napulog-duha ka apostoles uban niining mga pahimangno: “Ayaw kamo pag-adto sa kayutaan sa mga dili Judio ug sa bisan unsang lungsod sa Samaria.

Revelation 21:14

Ang paril gitukod sa siyudad ibabaw sa 12 ka sukaranang bato nga gisulatan sa ngalan sa 12 ka apostoles sa Nating Karnero.

Sila ang mga may pinasahe nga relasyon ngadto sa nasod sa Israel.

Pinadayag 21:12

Kini may dako ug habog nga paril ug may 12 ka ganghaan nga gibantayan sa 12 ka anghel. Diha sa mga ganghaan, nahisulat ang mga ngalan sa 12 ka banay sa Israel.

Sa umaabot nga panahon, kadtong Dose (12) ka mga apostoles molingkod didto sa dose (12) pud ka trono aron sila ang mahimo nga maghuhukom (pangulo) alang sa mga Israelita nga makasulod sa gingharian sa Langit.

Mateo 19:28

Si Jesus miingon kanila, “Isulti ko kini kaninyo: iniglingkod unya sa Anak sa Tawo sa iyang mahimayaang trono diha sa Bag-ong Kalibotan, kamong napulog-duha ka tinun-an molingkod usab sa mga trono aron pagmando sa napulog-duha ka banay sa Israel.

B. Mao kadtong mga apostoles sa homan nang mikayab ang Ginoo.

Kini sila ang adunay pinasahe nga relasyon ngadto sa mga Hentil nga mga magtoo. Ang Hentil nga mga magtotoo mao kadtong mga tawo nga dili Judio o Israelita apan mitoo ni Ginoong Hesu-Cristo.

Ang usa sa mga dose ka disipolo sa Ginoo nga si Judas ang mibudhi, nailisan ni Matias sa wala pa ang Adlaw sa Pentecostes (Buhat 1:26; 2:14), mao nang nabalik pagkadose ang MGA APOSTOLES SA NATING KARNERO.

Ang mga nahisgutan sa Ikaduhang Kasabotan nga mga apostoles sa homan na nga mikayab ang Ginoo mao sila si Pablo ug Bernabe (Buhat 14:13-14), Adronico ug Junias (Roma 16:7), Santiago ang igsoon ni Hesus (Galatia 1:19), Silas ug Timoteo (1 Tesalonica 1:1; 2:6) ug daghan pa (1 Corinto 9:5; 2 Corinto 8:23).

PABLO ug BERNABE

Buhat 14:13-14 13 Ang templo ni Zeus atua sa gawas sa lungsod ug ang pari niini nagdalag mga baka ug mga bulak ngadto sa ganghaan. Buot niya ug sa mga tawo nga ihalad kini ngadto sa mga apostoles.

14 Sa pagkasayod ni Bernabe ug ni Pablo sa buot nilang buhaton, gigisi nila ang ilang mga bisti ug midagan ngadto sa taliwala sa katawhan ug misinggit,

ADRONICO ug JUNIAS

Roma 16:7 Ipangomusta usab ako kang Andronico ug kang Junias nga mga kauban kong Judio nga nabilanggo uban kanako. Inila sila sa mga apostoles ug nahimong Cristohanon una pa kanako.

SANTIAGO (Ang igsoon sa Ginoo sa Iyang pagkatawhanon)

Galatia 1:19 Walay laing apostol nga akong gipakigkitaan gawas kang Santiago, ang igsoon sa Ginoo.

SILAS ug TIMOTEO

1 Tesalonica 1:1 Gikan ni Pablo, ni Silas ug ni Timoteo—Alang sa simbahan sa Tesalonica nga iya sa Dios nga Amahan ug sa Ginoong Hesu-Cristo: Mainyo ang grasya ug ang kalinaw sa Dios.

1 Tesalonica 2:6-7 Wala kami tuyo nga daygon ni bisan kinsa 7 bisag mahimo namong gamiton ang among awtoridad ingon nga mga apostoles ni Cristo aron ipabuhat kaninyo ang among gusto. Apan sa diha pa kami uban kaninyo, nagmalumo kami kaninyo sama sa usa ka inahan nga nagmatuto sa iyang mga anak.

UG UBAN PA....

1 Corinto 9:5 *Wala ba akoy katungod sa pagdalag asawa nga Cristohanon sa akong mga panaw sama sa gihimo sa ubang mga apostoles ug sa mga igsoon sa Ginoo ug ni Pedro?*

2 Corinto 8:23 *Mahitungod kang Tito, kauban ko siya sa pagtabang kaninyo ug ang kaigsoonan nga mikuyog kaniya mao ang mga pinadala sa mga simbahan ug nagpasidungog sila kang Cristo.*

C. Mao kadtong mga MINI NGA MGA APOSTOLES.

Kini sila mao ang nanghinambog nga sila kono mga apostoles apan dili diay.

2 Corinto 11:13

Kay sila mga mini nga apostoles, limbongan nga mga magbubuhay ug nagtakuban pagkaapostoles ni Cristo.

Gipadayag 2:2

Nasayran ko ang imong nabuhat, ang imong paghago ug ang imong pailob. Nasayran ko usab nga dili ka gusto sa daotang mga tawo ug giusisa mo kadtong nagpakaapostol ug nakaplagan mo nga sila mga mini.

Ang timailhan nga mini nga mga apostoles mao nga nanghinambog sila sa ilang pagpatuo nga sila apostol o mga apostoles. Ang tinuod nga apostol o mga apostoles dili na tigpagawal sa ilang titulo; dili sila magsuroy-suroy aron nga ilhon og tawagon sila nga apostoles, apan mapaubsanon hinoon nga moalagad ingon nga ulipon (sa Griego: *doulos* ug sa Hebreo: *ebab*) sa Ginoong Hesus pinaage sa pagsangyaw og pagtudlo sa Maayong Balita tahoron man o dili; respetohon man o bugal-bugalan.

Ang “**duolos**” nga klase sa pagka-ulipon mao kini ang nahimong ulipon pinaage sa iyang kaugalingon nga gusto. Niboluntaryo siya nga moalagad sa iyang amo o agalon tungod kay nahigugma man siya sa iyang amo og sa pamilya niini tungod sa pagkabuotan o maayo nga kinaiya. Busa, ipaad ang iyang dalunggan sa haligi sa pultahan aron bangagan og butangan og ariyos isip ebidensiya nga ulipon tuod siya pero sa iyang kaugalingon nga kagustohan. Busa, kita nag-alagad sa Ginoo dili tungod kay napugos kita, kondili tungod kay ato kining kagustohan. Busa, bulahan kaayo kita kay ang atong gialagaran mao ang Ginoo nga buotan og gamhanan labaw pa sa tanan.

Roma 1:1

Gikan ni Pablo nga ulipon ni Cristo Jesus, gipili sa pagkaapostol ug gitawag sa Dios aron magsangyaw sa Maayong Balita.

1 Corinto 1:1

Gikan ni Pablo nga sa pagbuot sa Dios gitawag aron mahimong apostol ni Cristo Jesus ug gikan usab sa atong igsoon nga si Sostenes.

II. MGA TIMAILHAN SA TINUOD NGA MGA APOSTOLES

A. Diosnon nga kinaiya ug batasan.

2 Corinto 12:12 *Gibuhat ko diha kaninyo uban sa bug-os nga pagpailob ang mga timailhan nga ako usa ka matuod nga apostol pinaagi sa mga timailhan, sa mga katingalahang butang ug sa mga milagro.*

B. Mga Timailhan, Katingalahan ug mga Milagro.

Buhat 2:43

Daghang mga milagro ug mga buhat nga katingalahan ang nahimo pinaagi sa mga apostoles ug tungod niini ang tanan giabot ug katingala uban ang kahadlok.

Buhat 4:30

Ituy-od ang imong kamot aron sa pag-ayo ug itugot nga mahimo unta ang mga butang nga katingalahan ug ang milagro pinaagi sa ngalan sa balaan mong Sulugoon nga si Jesus.”

Buhat 5:12

Daghang mga milagro ug mga butang nga katingalahan nga gibuhat sa mga apostoles diha sa mga tawo. Nagtiguman ang tanang mga magtutuo didto sa Beranda ni Solomon.

Buhat 14:3

Nagpabilin didto ang mga apostoles sulod sa taas nga panahon. Sa walay kahadlok nagwali sila mahitungod sa Ginoo. Ug ang Ginoo nagmatuod nga ang ilang mensahe mahitungod sa iyang grasya tinuod gayod pinaagi sa paghatag kanilag gahom sa pagbuhat ug mga milagro ug mga katingalahan.

Hebreohanon 2:2-4

Ang mensahe nga gihatag pinaagi sa mga anghel namatud-an nga tinuod gayod ug ang wala magtuman o ang misupak niini gisilotan sa Dios sa angay kaniya. 3Unsaon man nato paglikay sa silot kon dili kita magtagad niining dakong kaluwasan? Ang Ginoo mismo maoy unang nagbutyag sa maong kaluwasan ug sila nga nakadungog kaniya nagpamatuod kanato niini. 4Ug gipamatud-an usab kini sa Dios pinaagi sa pagbuhat ug mga timaan sa gahom, mga katingalahan ug daghang mga milagro. Nanghatag usab siya sa mga gasa sa Espiritu Santo sumala sa iyang kabubut-on.

C. Nagwali sa Maayong Balita. Ang ilang kinabuhi gikomitar sa pagwali sa maayong balita alang niadtong wala pa nakadungog niini.

Roma 15:20

Gitinguha ko gayod kanunay ang pagsangyaw sa Maayong Balita sa mga dapit diin wala pa ikasangyaw si Cristo aron dili ako magtukod diha sa sukaranan nga gipahimutang na sa uban.

2 Corinto 10:16

Unya makasangyaw na kami sa Maayong Balita sa uban pang kanasoran. Dili kami mangangkon sa buhat nga nahimo na sa uban sa dapit nga gihatag sa Dios kanila.

D. Andam nga moantos para sa pag-alagad.

Ang ilang kinasingkasing nga kabubot-on aron mosakripisyo, ang paglahutay taliwala sa mga lutos og insulto, ug ang kaisog sa pagpamuhat bisan pag mag-atubang og pisikal nga kamatayon, maoy ikaupat nga ebidensiya nga sila tinuod nga mga pinili nga mga apostoles ni Cristo. (Buhat 9:16; 1 Timoteo 1:16; 2 Corinto 11:18-28).

Ang pundok o panon sa mga apostoles maoy gitahasan og responsabli sa mga mosunod:

- i. Paghatag sa mga doktrina sa Simbahan o Iglesia. (Buhat 2:42; 15:1-35; 1 Corinto 14:37)*
- ii. Pagtudlo sa angay nga buhaton sa simbahan labi sa panahon sa panagtigom.*
- iii. Pagtudlo sa kristohanong pagkinabuhi.*
- iv. Pagsangkap aron mahimo usab nga mga ministro ang uban.*

Bisan pa man niana, ang ilang mga gipangtudlo ilalom lang gihapon kini sa pagkompara sa BALAANG KASULATAN og isalikway gihapon kini kung dili motakdo (Buhat 17:10,11).

Ang mga apostoles gipili og gipahimutang sa Ginoo alang sa Iglesia kauban sa mga propeta, magtutudlo, tigdumala ug ang uban pang mga GASA sa Spiritu (1 Corinto 12:28), sama nga ang mga magtotoo o miyembro gipahimutang usab diha sa LAWAS NI CRISTO nga mga ang SIMBAHAN o IGLESIA (1 Corinto 12:18).

Ang Griego nga pulong sa “gipahimutang” mao ang “**tithemi**” nga gihubad usab kini diha sa Hebreohanon 1:2 ingon nga “appointment” o “gipili (aron manag-iya sa tanang butang). Busa, atong makita nga ang atong Ginoo gipili sa Amahan ingon nga manununod hangtud sa kahangtoran, ug dili temporaryo lang.


Ang bulohaton sa mga apostoles ingon nga pinadala ni Ginoong Hesus mao ang pag-pioneer o pagsugod sa usa ka lugar, magpahimutang sa pundasyon, tukoron ang mga iglesia (1 Corinto 3:10) sumala sa han-ay nga gitudlo sa kasulatan (sama sa 1 Corinto 14), magabantay (oversee) usab sa mga kasimbahan nga iyang nasugdan ug motabang sa pag-atiman niini, dili biyaan sa dayon. Malayo man siya sa usa ka simbahan, apan dili mawala ang iyang paghigugma og pag-atiman niini. (Buhat 26:15-18). Ang bunga sa ilang ministeryo mao ang mga tawo nga nabag-o ang kinabuhi, ug mao usab kini ang pinakado nga ebidensiya nga sila mga apostoles sa Ginoo (1 Corinto 9:1-2), bisan pa og dili sila ilhon sa mga sikat nga organisasyon (Galatia 1:1).

III. NAA PAY MGA APOSTOLES SA ATONG PANAHAON.

Ingon nga ang Dios Amahan nagpili og nagpahimutang sa atong Ginoong Hesu-Kristo og kini molungtad hangtod sa kahangtoran, ang Iya usab nga plano og desinyo sa simbahan mao nga pinaage sa awtoridad sa Ginoo, aduna gihapoy pagpili og pagpahimutang sa mga lima ka klase nga mga ministro o lima ka gasa alang sa pag-atiman sa Iyang mga katawhan sa matag henerasyon. Apil na niini ang mga apostoles og mga propeta. Kini dili temporaryo, hinuon permanente kini og molungtad hangtod sa kahangtoran.

Dili pwede nga ang una og orihinal nga simbahan adunay mga apostoles og mga propeta, apan ang mga kasimbahan sa atong panahon karon wala na hinoon. Walay bersikulo sa Biblia nga nagkanayon o nagsuporta sa doktrina nga ang bulohaton sa mga apostoles og mga propeta nahoman na nahoman og nahunong na sa unang siglo o century sumala sa gipasiatab sa ubang “theologians” o mga tawo nga nagtoon mahitungod sa Dios og sa Iyang mga pagtulon-an.

Kung imo bayang usisahon ang mga kasimbahan nga natukod sa lain-laing mga dapit, natukod kini nga mga pundok sa mga Cristohanon tungod kay naay ministryo sa mga apostoles o apostolic ministry. Dili sila motoo og apostoles apan motoo sila og mga misyonaryo. Kung atong striktohon, mas mabasa pa gani sa Ikaduhang (Bag-ong) Kasabotan ang pulong “apostoles” kaysa mga “misionaryo”.



29

ANG MGA PROPETA SA SIMBAHAN

Ang Griego nga pulong sa “propeta” mao ang “**prophetes**”. Gikan kini sa duha ka Griego nga pulong: “Pro” nga nagpasabot nga “atubang o sa una” ug ang “Phemi” nga nagpasabot “pagpadayag o pagapahibalo sa huna-huna sa lain”; “magsulti lamang sa unsay gisulti sa lain”. Busa, kung imo kining tapoon ang duha ka Griego nga mga pulong “Pro og Phemi”, ang kahulogan niini “Usa ka binuhat nga makasulti mahitungod sa huna-huna sa Dios o sa ubang tawo”.

Ang mga propeta kaniadto sa unang siglo nga simbahan mga aktibo sa ministryo didto sa Antioquia (Buhat 13:1), didto sa Tiro (Buhat 21:4), ug didto pud sa Caesarea, diin tua didto ang upat ka mga anak nga babae ni Felipe nga nagpropesiya (Buhat 21:8-9).

Ang propesiya ingon nga usa ka gasa sa Spiritu sa Ginoo, gihatag sa Iglesia aron maayo, maandam ug masangkap ang LAWAS NI CRISTO. Niila og nidawat ang unang simbahan kaniadto sa importansya sa propesiya. Basaha ang Roma 12:6; 1 Corinto 12:7-11; 14:1-40; Efeso 4:11; Buhat 19:1-7; 1 Timoteo 1:18 ug 1 Tesalonica 5:19-22).

I. ANG MGA PROPETA MOALAGAD UBAN SA MGA APOSTOLES.

Ang mga mosunod nga mga bersikulo nagpahibalo kanato nga kauban sa buhat o ministryo ang mga propeta og mga apostoles.

Lucas 11:49 (APSD) - *Mao gani nga sumala sa kaalam sa Dios nagaingon siya, ‘Magpadala ako kanila ug mga **propeta** ug mga **apostoles**; ang uban sa akong ipadala ilang patyon, ug ang uban ilang lutoson.’*

1 Corinto 12:28 (APSD) - *Ug niini nga lawas ang matag tumutuo gihatagan sa iyang buluhaton. Una sa tanan mga apostoles; ikaduha, mga propeta; ikatulo, mga magtutudlo; dayon ang mga nagahimo ug mga milagro, mga nagaayo sa mga masakiton, mga nagatabang sa mga nanginahanglan, mga magtatambag, ug mga nagasulti sa pinulongan nga wala nila matun-i.*

Efeso 2:20 - *Gitukod kamo diha sa sukaranan nga gipahimutang sa mga apostoles ug sa mga propeta, ug ang bato nga gisukaran mao si Cristo Jesus.*

Gipadayag 18:20 - *Paglipay, O langit, kay nalaglag na siya! Paglipay kamo, katawhan sa Dios, mga apostoles ug mga propeta! Kay gisilotan na siya sa Dios tungod sa iyang gibuhay kaninyo!*

Ang ministryo sa mga propeta mapadayon nga may balansi kung matimbangan kini og mga apostoles.

II. ANG MGA PROPETA MAKASULTI OG MGA UMAABOT NGA PANGHITABO UG MAKAPAHIMANGNO ARON ADUNAY PAGPANGANDAM.

Ang ministryo sa mga propeta sa unang siglo nga simbahan nikuyanap o tinahod sa mga apostoles. Makita nimo nga adunay pundok sa mga propeta nga gikan sa Jerusalem miadto sa Antioquia, ug usa niadto mao si Agabo (Agabus sa English), mitindog og pinaage gahom sa Spiritu nagpropesiya nga adunay dakong gutom moabot sa tibuok kalibotan. Ang gutom nahitabo samtang si Claudio mao ang Emperador. (Buhat 11:28).

Atong nabasa nga pinaage sa Spirit sa Ginoo (Juan 16:13), ang mga propeta sa Ikaduha nga Kasabotan sama ni Agabo nagtagna og mga panghitabo bisag layo pa (Buhat 11:28); ug naghatag pud ug ilustrasyon nga propesiya nga nagpahibalo sa umaabot nga kakuyaw sama sa gibuhay ni Propeta ngadto kang Apostol Pablo (Buhat 21:10-11).

Ang ubang mga propeta nga ginganlan sa Ikaduhang Kasabotan mao silang: Judas og Silas (Buhat 15:32); ug Anna (Lucas 2:36-38). Ang uban mga apostoles nga may gasa sa pagpropesiya.

III. ANG MGA PROPETA MOKONPIRMA O MOPALIG-ON SA MGA PULONG NGA NASULTI SA DIOS.

1 Tesalonica 5:19-20

19Ayaw ninyo santaang Espiritu Santo. 20Ayaw tamaya ang mga mensahe gikan sa Dios. (Basaha sa English nga hubad). Ang mensahe gikan sa Dios mao ang propesiya.

Si Apostol Pablo nagsulat sa taga Tesalonica nga ayaw tamaya ang propesiya, apan siya mismo nakasinati nga wala mopatoo sa propesiya og giya sa mga propeta (ikompara ang Buhat 20:23; 21:4; 11-14).

Ang pinakauna nga bulohaton sa mga propeta sa Ikaduha nga Kasabotan mao ang pagkonfirmar sa mga nasulti sa Dios ngadto sa matag-usa nga nitoo.

Buhat 13:1-2

1 Sa simbahan sa Antioquia dihay mga propeta ug mga magtutudlo nga si Bernabe, si Simeon nga gianggaag Negro, si Lucio nga taga-Cirene, si Manaen nga namatuto uban ni Gobernador Herodes, ug si Saulo. 2 Usa ka adlaw niana, samtang nagsimba sila sa Ginoo ug nagpuasa, miingon kanila ang Espiritu Santo, “Igahin alang kanako si Bernabe ug si Saulo alang sa bulohaton nga maoy hinungdan sa pagtawag ko kanila.”

Nabasa nimo? Kaila naman ang Ginoo kanila; ug gipili na sila sa Ginoo. Apan, gigamit sa Ginoo ang mga propeta aron sa pagkonfirma sa ilang opisina o bulohaton.

IV. ANG MGA PULONG SA PROPETA KINAHANGLAN PUD NGA SUSIHON og IKOMPARA SA AKTUWAL NGA NAHITABO og SA BALANG KASALUTAN.

Deuteronomio 18:22

Kon moangkon ang usa ka propeta nga gisugo siya sa Ginoo sa pagsulti sa usa ka mensahe ug unya wala kini matuman, kana nagmatuod nga wala siya sugoa sa Ginoo. Nagsulti siya sa iyang kaugalingong awtoridad busa ayaw kamo kahadlok kaniya.

Jeremias 28:9

Apan ang propeta nga managna nga adunay kalinaw mailhan lamang nga sinugo siya sa Ginoo kon matinuod ang iyang gipanagna.”

1 Corinto 14:29

Duha o tulo lamang kanila nga gihatagan sa mensahe sa Dios ang pasultihon ug ang uban maoy magtimbangtimbang sa ilang gipanulti.

1 Tesalonica 5:19-21

Ayaw ninyo santaa ang Espiritu Santo. 20Ayaw tamaya ang mga mensahe gikan sa Dios. 21Sutaa ninyo ang tanan; ampingi ang maayo 22ug isalikway ang daotan.

Ang mga propeta kung dili sila magmatngon sa pagpaminaw sa mensahe sa Ginoo, pwede silang masayop. Sama sa mga apostoles, pananglitan si Pedro, nakasab-an siya ni Apostol Pablo bisan tuod og pinaage sa iyang usa ka wali nakakabig siya og 3,000 ka tawo. Dinhi makita nato ang ka importante sa pagpahari sa Spiritu sa Dios sa atong kinabuhi.

Santiago 3:2 *Kitang tanan masayop. Ang tawo nga dili masayop sa iyang pagpanulti hingpit ug makahimo sa pagpugong sa iyang kaugalingon.*

Kung ang mga nasulti sa propeta dili motakdo sa mga nasulat sa Biblia, angay kini nga hinuktokan og hatagan og panahon sa pagtuon, kung masuta nga nagkontra kini sa Pulong sa Dios og ebanghelyo sa Ginoo, angay kini isalikway (Deuteronomio 13:1-5).

30

ANG MGA EBANGHELISTA SA SIMBAHAN

Ang mga ebanghelista mao sila ang mga magsasangyaw sa Maayong Balita ni Giinoong Hesu-Cristo mahitungod sa Paghari sa Dios dinhi sa kalibotan. Mao kini sila ang mga gihatagan sa Ginoo sa Iyang Spiritu sa pagsangyaw sa Maayong Balita ug nag-alagad sa Ginoo pinaage sa pagtabang sa uban nga modawat og magpailalom sa pagka Ginoo og Manluluwas ni Hesu-Cristo.

Ang pulong “EBANGHELISTA” nagpasabot kini og “MAGWAWALI SA MAAYONG BALITA”. Kini nga ministryo maoy pinakasayon sabton sa lima ka mga gasang pag-alagad o (ministry-gifts) sa Iglesia. Wala ra kaayo ni lalisi sa daghang mga simbahan kung naa bay ebanghelista ang simbahan o wala.

Ang nailhan nga ebanghelista sa Biblia nga nasakop sa Ikaduhang Kasabotan mao si Felipe. Busa, matawag nato siya og “**PATTERN EVANGELIST**” o Ebanghelista nga sumbanan. (Buhat 8:5-13; 8:26-40; 21:8). Si Felipe miadto sa Samaria ug giwali ang Maayong Balita. Daghan ang mitoo ug adunay mga timailhan og mga kahibulongan nga nagpamatuod sa iyang bulohaton o ministryo.

Naghingilin siyag mga yawa ug giaayo niya ang mga paralitiko og mga bakol (Buhat 8:7). Gibunyagan sila ni Felipe sa tubig, ug gitugyan sila ngadto sa mga apostoles nga mao si Pedro og si Juan aron maatiman. Miadto usab si Felipe sa deserto aron nga masangyawan ang usa ka yunuko nga taga Etiopia ug gibunyagan niya sa tubig (Buhat 8:26-40).

Adunay dili maayo nga nanghitabo sa bulohaton sa mga ebanghelista sa atong panahon karon. Tungod kini kay napakyas ang daghang mga magtotoo sa pagdawat og pag-ila sa kinaiya og matampo sa mga ebanghelista sa ilang pundok isip simbahan sa Dios. Adunay mahimo ang mga ebanghelista nga dili mahimo sa mga pastors, magtutudlo, propeta ug mga apostoles.

Naa puy mga ebanghelista sa atong panahon apan gapundo lamang sa usa ka lugar. Tungod kay ang Dios nagpanalangin man sa bulohaton sa ebanghelista, ang ubang mga ebanghelista dili na molakaw sa ubang dapit ug sila na ang moatiman sa mga magtotoo, busa giilog na nila ang trabaho sa mga pastor, magtutudlo, apostoles, ug propeta, Tungod niana, daghan pang mga tawo nga wala nakadungog o nakasabot sa Maayong Balita ang wala maabot sa kaanindot sa ilang ministryo. Dili kini maayo.

Adunay pay mas dako og kadaot ang mahitabo niana nga desisyon sa mga ebanghelista. Tabla lamang kini nga iyahang gipugngan ang mga magtotoo sa pagtubo sa spirituhanong kinabuhi tungod kay dili naman ka ministryo ang mga apostoles, mga propeta, mga pastor og mga magtutudlo sa iyang mga nasangyawan. Nahimo na siyang 5 in 1 niana kahimtanga. Dili ka na maoy gusto sa Ginoo.

Efeso 4:11-12

Ang mga gasa niya mao nga ang uban iyang gihimong mga apostoles, ang uban nga propeta, ang uban nga tigsangyaw sa Maayong Balita, ang uban nga pastor ug

mga magtutudlo. 12Gihimo niya kini aron sa pag-andam sa tibuok katawhan sa Dios alang sa buluhaton sa Cristohanong pag-alagad aron motubo ang lawas ni Cristo.

Efeso 2:20

Gitukod kamo diha sa sukaranan nga gipahimutang sa mga apostoles ug sa mga propeta, ug ang bato nga gisukaran mao si Cristo Jesus.

Hinumdomi, ang SIMBAHAN wala gitukod og gipahimutang sa mga ebanghelista, kondili sa mga apostoles ug mga propeta. Gawas kon ang mga apostoles ug mga propeta makaministeryo sa mga agi sa ebanghelista, dili mahitabo nga mapundar og mapahimutang ang mga nasangyawan sa ebanghelista ingon nga usa ka matuod nga simbahan sa Ginoo. Sakit man kini nga kamatuoran apan kinahanglan kini nga dawaton.

Ang ebanghelista mao ang “bukton” sa Ginoo sa pagkab-ot sa mga tawo niining kalibotana nga nailalom pa sa pagmando ni satanas. Ang resulta sa iyang ministeryo kinahanglan nga tapokon og usa ka balay ug tawagon sila og **“house church”** aron sa panagtigom diin buhaton ang pagsimba, pag-ampo og pagpamati sa Pulong sa Dios. Sa ingon niini, dali ra silang mapadalhan og mga uban pang mga gasa sa ministeryo nga mao ang mga propeta, apostoles, pastors og mga magtutudlo (teachers).

Bisag lantawon pa nimo sa libro sa mga Buhat (sa Biblia), gawas kon ang mga mitoo, midawat og nangakabig agi sa mga apostoles og mga propeta, gikinahanglan gayod nga ang agi sa ebanghelista iyang ipiyal ngadto sa mga apostoles og mga propeta. Mao kini ang maka pausab sa mga ordinaryo nga mga magtotoo ngadto sa USA KA KUSGAN, LIG-ON, IMPLUWENSYADO ug GAMHANAN NGA SIMBAHAN SA GINOO.

Basaha ang Buhat 11:19-27. Daghan ang mitoo. Dayon si Apostol Bernabe niabot. Nibiya siya aron sa pagkuha ni Saulo (ang karaang ngalan ni Pablo) aron mouban kaniya didto sa Antioquia. Wala magdugay, ang mga propeta nangabot napud sumala sa bersikulo 27. Makasusubo lang sa atong panahon kay wala na kini hatagi og pagtagad sa mga kasimbahanan. Busa, nabutang sa dilikado ang daghang mga magtotoo, labi na gayud ang mga bag-o pa gyud sa ilang pagtoo kang Hesu-Cristo. Mokubol, mahimong unano sa spirituhanon tungod kay usa lang ka gasa ang gaatiman kanila.

ANG MGA TIMA-ILHAN SA EBANGHELISTA:

- 1. Molakaw o mobyahe sila sa bisan asa nga dapit aron magwali sa gugma sa Dios. (Buhat 8:5)***
- 2. Makita usab ang mga Timaan, Kahibulongan ug mga Milagro. (Buhat 8:6-13)***
- 3. Maghimo siya og tigom nga dinagko diha sa tibook lungsod o siyudad. (Buhat 8:5)***
- 4. Manangyaw usab sila og binagsa ra (one on one). (Buhat 8:26-40)***
- 5. Pwede pud siya nga motabang sa pagsangkap sa mga magtotoo uban sa laing upat ka mga gasa sa ministeryo aron maandam pud ang mga ubang magtotoo. (Efeso 4:11-12)***

31

ANG MGA PASTOR SA SIMBAHAN

Ang pulong nga “**pastor**” pareho kini og kahulogan sa “**shepherd**” o magbalantay og karnero. Ang Griego nga pulong sa pastor mao ang “poimen” ug mao kana ang magbalantay sa karnero. Mao kini sila ang mga magbalantay sa mga karnero sa Ginoo. Ang mga pastor mao ang mga guwardiya, giya og tigpakaon sa mga karnero. Gawas pa niaana nga bulohaton, ang mga pastor mao ang moatiman, modisiplina, moampo para sa ilang kaayohan og kabulahanan, mohigugma, moalagad sa lokal nga congregasyon o pundok sumala sa gipiyal ngadto kanila (Buhat 20:28).

Dili pud manghilabot ang pastor sa dili niya mga karnero o congregasyon, apan pwede siya makawali kon giimbitar siya sa lawas ni Cristo. Ang mga pastor adunay angay nga tan-awon nga mga kwalipikasyon sumala sa gisulat ni Apostol Pablo ngadto Timoteo ug Tito. 1 Timoteo 3:1-13 ug Tito 1:5-9.

Ang ministryo sa pastor halos kapareho sa mga “elder” o anciano o kadagkoan sa simbahan. Ang kalainan sa elder o anciano mao nga gulang gayod sila edad. Pilon ni sila sa mga fivefold ministers (lima ka gasa: Apostol, Propeta, Ebanghelista, Pastor ug Magtutudlo).

Ang pagkapangulo (eldership) sa iglesia og ang pagkapastor dili pareho apan gadug-ol ang ilang bulohaton. Ang mga elder alang lang sa usa ka simbahan. Apan ang pastor para sa tibook lawas ni Cristo. Pananglitan: kung ikaw gipili ingon nga usa ka elder, ang imong bulohaton mao ang pagsuportar sa trabaho sa pastor sa usa ka simbahan. Samtang ang imong pastor pwede siya moatiman pud og laing anak nga simbahan. Busa, kadto anak nga simbahan, dili ka elder didto. Magpili napud ang pastor og laing elder didto aron nga kung molakaw og dugay ang pastor kay mobisita sa mga kasimbahanan, ang elder maoy pwede niya nga piyalan sa iyang bulohaton.

Si Timoteo ug Tito adunay gasa sa pagkapastor. Kining duha ka mga batan-on nag-alagad sa Ginoo ilalom sa pagbantay og pag-atiman ni Apostol Pablo. Gitahasan usab sila nga mopili og modihug og mga elder (o kasaligan nga hamtong sa simbahan). Tito 1:5.

Ang tanang five-fold ministers (apostoles, propeta, ebanghelista, pastors ug magtutudlo) matawag usab sila nga mga pangulo sa lawas ni Cristo. (1 Pedro 5:1).

32

ANG MGA MAGTUTUDLO SA SIMBAHAN

Ang Griego sa pulong “magtutudlo” mao ang “**DIDASKALOS**” ug nagkahulogan kinig “instructor” o maestro ug gihubad kini sa English nga “doctor” og “master”. Ang mga magtutudlo nga gipili sa Ginoo gihatagan sa Dios sa Iyang Spiritu, busa gigamhan og gisangkapan sila sa Ginoo sa tanang mga gikinahanglan aron nga mahimo silang epektibo sa ilang ministryo nga mao ang pagtabang sa uban aron nga makasabot sa Pulong sa Dios labi na sa mga nahisulat sa Biblia ug ang Plano sa Dios. Ang gasa sa pagtudlo kasagaran magkuyog sa trabaho sa pastor og sa elder sa simbahan. (1 Timoteo 3:2; Tito 1:9).

Ang magtutudlo moalagad nga may pakigdait og duol nga spirituhanong relasyon sa mga pastor og mga pangulo (elders) sa simbahan kay ang ilang pinakauna nga trabaho mao man ang pagpakaon og pagtudlo sa mga karnero sa usa ka local nga simbahan sa Pulong sa Dios.

Sa bulohaton sa pagtudlo, usahay adunay magsapaway (overlapping). Maglibog ang uban kay ang apostol, propeta, ebanghelista og pastor motudlo man usab. Si Apostol Pablo adunay daghang gasa aron sa pagpangalagad.

1 Timoteo 2:7

*“Mao kini ang hinungdan nga gipadala ako nga **apostol** ug **magtutudlo** ngadto sa mga dili Judio aron sa pagsangyaw sa mensahe sa pagtuo ug kamatuoran ug wala ako magbakak.*

2 Timoteo 1:11

*“Gisugo ako sa Dios sa **pagsangyaw ug pagtudlo** sa Maayong Balita ingon nga apostol”*

Si **Bernabe** usa ka **apostol**, apan gitawag usab siya nga **magtutudlo**. Mabasa kana sa Buhat 13:1.

UNSAY KALAHIAN ANI SA UBANG BULOHATON?

1. Ang mga **apostoles** maoy **pinakaguwardiya** sa simbahan gikan sa mga magwawali nga nagtudlo sa mini nga mga pagtulon-an.

2. Ang mga **propeta** maoy **pinakagiya** paghan-ay sa simbahan aron pagpadala kong kinsa ang angayan sa pagsabwag sa maayong balita, pagtanom og bag-o nga mga simbahan ug sa angay nga piyalan sa mga bulohaton.

3. Ang mga **ebanghelista** maoy **mopatapok** sa mga dili pa magtotoo pinaage sa pagpahibalo o pagsangyaw sa Maayong Balita uban sa pagpangayo og mga masakiton, paghingilin og mga yawa o daotang espiritu ug pagpakita sa mga milagro. Bisan tuod og mahimo usab kini sa ubang mga gasa, apan ang ebanghelista maoy magpunay og himo niini tungod kay sige man siya og sangyaw sa mga tawo nga dili pa magtotoo.

4. Ang mga **pastor** maoy **mopatobo** og **mopahamtong** sa mga magtotoo hangtud mamunga kini og mga bag-o nga mga magtotoo.

5. Ang mga **magtutudlo** maoy **mosuportar** sa upat ka mga gasa aron mapalalom ang mga magtotoo diha sa maayo nga yuta nga mao si Hesu-Cristo. Sila ang magsige og diskobre og mga research sa mga tinuod nga mga panghitabo o facts og motahag og mga impormasyon nga gikinahanglan sa ministryo aron dili mahimong ignorante ang simbahan. Kasagaran aning mga magtutudlo mga magsusulat (author) og mga libro. Timan-i, ang facts mao ang mga tinuod o katinuoran samtang ang truths mao ang mga matuod o kamatuoran. Ang mga tawo nga may gasa sa pagtudlo ganahan kaayo motudlo.

SI GINOONG HESU-KRISTO MAO ANG MODELO

1. Siya Apostol (Hebreohanon 3:1)
2. Siya Propeta (Lucas 24:19; Juan 4:19; Buhat 3:22-26)
3. Siya Ebanghelista (Lucas 4:18)
4. Siya Pastor (Juan 10:2; Hebreohanon 13:20; 1 Pedro 5:4)
5. Siya Magtutudlo (Juan 3:2)

ANGAY NGA BANTAYAN NGA DILI ANG TITULO MAOY IMPORTANTE, KONDILI MAO ANG MGA BULOHATON NGA GISANGON SA GINOO.

Ang mga pangulo nga gipili sa Ginoo may gasa usab nga motabang kanila sa pagbuhat sa ministryo nga makaingon ka: “trabaho man kana sa laing alagad sa Ginoo apan nganong kahibalo pud siya ana?” Tungod kana kay gitugotan sa Ginoo nga adunay kombinasyon sa mga gasa o opisina. Naay uban nga EBANGHELISTA-PASTOR. Ang uban PROPETA-PASTOR. Ang uban pud PASTOR-MAGTUTUDLO o APOSTOL-MAGTUTUDLO.

Sa Biblia, diha sa Ikaduhang Kasabotan, kining lima ka gasa sa Ginoo sa Iglesia wala kini gamita nila ingon nga titulo, apan deskripsiyon sa ilang mga bulohaton. Gigamit nila kini sa pagtawag kanila kon unsay ilang kapuslanan “function” o pulos. Sama nga tawagon nila og carpentero ang nagbuhat og balay; tawagon sila sama nga gitawag ang pintor, dancer, singer, musikero, electrician, farmer ang mga tawo nga maoy ilang nakita nga nagbuhat niini.

Busa, dili kinahanglan nga mag-apas ang usa ka tawo niini nga mga tawag kay *dili titulo ang gipangita sa Ginoo, kondili ang natampo sa pagtukod sa Iyang hinigugma nga simbahan*. Ang gusto nga motudlo sa Pulong sa Dios angay nga magbantay, dili kay mag-apas nga tahoron sa mga tawo.

Santiago 3:1

Mga igsoon, pipila lamang kaninyo ang angay mahimong magtutudlo kay nasayod kamo nga kitang mga magtutudlo hukman sa mas higpit nga paghukom kay sa uban.

33

ANG PAGKA PARI SA IKADUHANANG KASABOTAN

I. ANG KALAHIAN SA PAGKAPARI SA UNANG KASABOTAN UG SA IKADUHANANG KASABOTAN

Dili kita makasabot sa sumbanan sa KRISTIYANO NGA SIMBAHAN kung dili nato masabtan ang dakong kalahian sa pagkapari sa Unang Kasabotan og sa Ikaduhang Kasabotan.

A. Ang pagkapari sa banay ni Aaron.

Ang Dios sa karaang panahon, naghatag og kahigayonan sa mga Israelita nga mahimo silang “HARIANONG PARI” (Exodo 19:6). Apan, napakyas sila sa pagtindog niining dako nga pribiliheyo, uban sa resulta nga ang Ginoo nagpili og mga pari sa banay o kaliwat ni Aaron. (Exodo 28:1). Ang Unang Kasabotan mismo nagsaysay sa kapakyasan niini nga ministeryo sa pag-alagad sa Ginoo nga matinud-anon og nga moalagad ingon nga maoy morepresenta sa mga Israelita ngadto sa Ginoo. (Exodo 22:26).

B. Ang pagkapari sa mga magtotoo ni Hesu-Cristo.

Kung magbasa kita sa sinulat ni Apostol Pedro sa 1 Pedro 2:5,9, atong madiskobrehan nga ang pagkapari diay usa ka pribilihiyo sa matag magtotoo ni Ginoong Hesu-Cristo. Pinaage niana, aduna na kitay mahimayaong katungod nga atong mapahimoslan kay makaduol na kita diretso sa Dios tungod sa gibuhay sa atong pinakapangulo sa pari nga mao si Hesu-Cristo (Hebreohanon 3:1).

Ang dakong katungod sa matag magtotoo nga makaduol og makasulod dapit sa Dios Amahan mabasa sa **Hebreohanon 10:19-22**:

“19 Busa, mga igsoon, may hingpit kitang kagawasan sa pagsulod sa Labing Balaang Dapit pinaage sa dugo ni Hesus. 20 Gibuksan niya alang kanato ang usa ka bag-ong agi-anan, usa ka buhing agianan lahos sa tabil, nga sa ato pa, pinaage sa iyang kaugalingong lawas. 21 Duna kitay usa ka gamhanang pari nga nagdumala sa balay sa Dios. Busa manuol kita sa Dios uban sa maminatud-ong kasingkasing ug lig-ong pagtuo. Duolon nato siya uban sa kasingkasing nga pinaage sa pagbisibis nahinloan gikan sa konsensya nga sad-an ug sa mga lawas nga nahinloan pinaage sa tubig nga putli.

Sa atong panahon, adunay mga pundok nga ang tawag nila sa ilang lider o pangulo sa simbahan kay PARI. Dili kini suportado sa Ikaduhang Kasabotan. Gani, ni alkontra kini sa tibuok patukoranang prinsipyo sa gipadayag diha Ikaduhang Kasabotan para sa iglesia. Sabta ang gisulat ni Apostol Pedro:

1 Pedro 2:5-9

*5 Sama sa mga batong buhi, panuol kamo ug ipagamit ang inyong kaugalingon aron pagtukod sa espirituanong templo diin mag-alagad kamo ingon nga **balaang mga pari** nga maghalad sa espirituanon ug makapahimuot nga mga halad ngadto sa Dios pinaage kang Jesu-Cristo. ...*

9 Apan kamo mao ang piniling katawhan, ang mga harianong pari ug ang balaang nasod. Gipili kamo sa Dios aron maiya ug aron magsangyaw sa mga kahibulongang buhat sa Dios. Gitawag kamo niya gikan sa kangitngit ngadto sa iyang katingalahang kahayag.

Mao kini ang pinakataas nga pribilihiyo sa atong pagka Cristohanon. Makasulod na kita sa PINAKABALAAN NGA DAPIT diin ana ang PRESENSYA SA DIOS tungod ni Hesu-Cristo. Sa dihang namatay ang atong Manluluwas didto sa Kalbaryo, ang tabil sa templo napikas kini gikan sa pinakataas hangtod sa pinakaubos nga bahin. Nagpasabot kini nga ang tanan pwede na moduol sa trono sa pinakabalaan nga Dios.

Sa pundok sa mga magtutuo ni Hesu-Cristo, ang Dios Amahan nagtagbo og nagkadaiya nga mga ministeryo, uban sa mga pastor ug uban pang mga alagad sa Ginoo nga motambag og motudlo sa mga katawhan. Apan, bisag unsa pa kadaghan ang mga alagad ni Ginoong Hesus, dili kini makatupong o makailog sa posisyon sa atong Manluluwas nga maoy nagbuhat og dalan alang sa tawo nga makaduol ngadto sa Dios nga Amahan.

Hebreohanon 4:16

Busa dili kita magpanuko sa pagduol sa trono sa Dios diin anaa ang grasya. Dinha madawat nato ang kaluoy ug ang grasya nga atong gikinahanglan.

II. ANG MGA SAKRIPISYO SA MGA MAGTOTOO-PARI

Ingon nga ang mga pari sa Unang Kasabotan maghalad og mga sakripisyo ngadto sa Dios, kita usab, ingon nga mga pari nga ilalom sa Ikaduhang Kasabotan, maghimo kita og mga halad og sakripisyo ngadto sa Dios. Lisud ba kini? Dili tungod kay nahimo kini nato nga atong kalipay tungod sa presensya sa Spiritu sa Ginoo sa atong kinasuloran. Tulo ang atong ihalad:

1. ANG ATONG LAWAS.

Roma 12:1- *Busa, mga igsoon, tungod sa dakong kaluoy nga gipakita sa Dios kanato, hangyoon ko kamo sa pagtugyan sa inyong kaugalingon ngadto sa Dios ingon nga buhing halad, balaan ug makapahimuot kaniya. Mao kini ang matuod nga pagsimba nga angay ninyong ihalad.*

Atong makita ang balaan og halangdon nga parianong sakripisyo diha sa **1 Juan 3:16**: *“16Gihatag ni Cristo ang iyang kinabuhi alang kanato. Pinaagi niini atong maila ang tinuod nga gugma. Busa angay usab kita nga maghalad sa atong kinabuhi alang sa atong isigkatawo!*

Ang sukaranon nga kamatuoran sa dihang gusto kitang moalagad sa Ginoo mao ng ang atong mga lawas maoy mga templo sa Spiritu sa Dios.

1 Corinto 6:20 *Gipalit na kamo niya. Busa gamita ang inyong lawas alang sa himaya sa Dios.*

2. ANG ATONG PAGDAYEG O PAGPASALAMAT

Hebreohanon 13:15 *Busa himoon ta kanunay ang halad ngadto sa Dios pinaagi kang Jesus. Mao kini ang halad sa pagdayeg gikan sa mga ngabil nga nagsugid sa iyang ngalan.*

Ang mga pari sa Unang Kasabotan mag-alagad sa Ginoo didto sa lawak sa templo nga gitawag og “ANG BALAANG DAPIT”. Gikan sa Halaran sa Insenso ang aso nga nagdala sa kahumot mosulbong o mosaka og mopahumot kini sa tibook lawak. Gikan sa Balaan nga Dapit, ang kahumot sa sinunog nga insenso motuhop sa tabil (kurtina nga nag-ulang) sa PINAKABAALAN NGA DAPIT diin tua ang didto ang arka sa kasabotan nga nagrepresentar sa PRESENSYA SA DIOS.

Usa kini ka tipo (type o hulagway sa umaabot) kanato ingon nga mga pari sa Ikaduha nga Kasabotan nga maghalad sa atong mga pagdayeg ug pagpasalamat ingon nga humot nga sakripisyo nga makahimoot sa Ginoo. Ang Ikadaduhang Kasabotan wala lang nag-inbita kanato nga modayeg ug magpasalamat sa Ginoo isip pagpadayeg sa pagbati lang, apan sa paghimo niini ingon nga ministeryo nga sakripisyo. Mao ra ni ang sakripisyo nga hilabihan ka sayon, gaan og nindot kay igo lamang kita modayeg og mopasalamat sa Ginoo.

Prophetic kini! Buot ipasabot nga bisag unsay imong kahimtang sa kinabuhi, dayega o pasalamat lang ang Ginoo ug makita nimo ang kadaogan og kahibulongan nga trabaho sa Ginoo. Ang sakripisyo sa pagdayeg dili kini ihalad tungod kay gibuhat kini sa uban, o hayahay na ang imong kahimtang o gisugo ka sa imong spirituhanong ginikanan, apan buhaton nimo kini samot na og daghang ka og mga problema og mga sirkumstansya. Nagpaila kini nga mitahod ka sa pagka Ginoo og pagkagamhanan sa Dios. Malipay Siya niini.

3. ANG ATONG YUTAN-ONG BAHANDI O SALAPIANONG BAHIN

Hebreohanon 13:16 *Ayaw kalimot pagbuhat og maayo ug pagtinabangay kamo kay mao kini ang makapahimuot sa Dios.*

Kini nga bersikulo og ang uban pang nahisulat sa Biblia nagtudlo kanato nga ang matinud-anong pari nga mao ang magtotoo ni Ginoong Hesu-Cristo angay nga maghalad sa iyang mga maayo nga nabatonan pinaage sa pag-atiman sa ubang mga kaigsoonan sa pagtoo nga adunay mga panginahanglan ug alang sa bulohaton sa simbahan.

34

ANG IGLESIA GIPAKASAMA SA BUILDING

Sa Ikaduhang kasabotan, ang simbahan (o mga tawo nga magtotoo ni Hesu-Cristo) gipakasama sa Gambalay o Building, Panimalay, Lawas sa Tawo, ug Asawa. Atong mabantayan ang Cristohanong Pundok wala gideskriber (described) ingong mga buildings, apan building. Buot ipasabot ana, usa lang ka building nga tukoron kay singular form man lang kini. Aduna lamay usa ka tinuod nga katawhan ang Ginoo, bisan tuod og anaa kini sa lain-laing dapit sa tibook kalibutan.

Atong mabasa diha sa 1 Corinto 3, nga gipakasama ni Apostol Pablo ang simbahan ingon nga balay-tinukod o building.

1 Corinto 3:9-11 “9 Kay sa Dios kami isigkamagbubuhay ug kamo mao ang uma sa Dios. Kamo mao usab ang balay sa Dios. 10 Sumala sa hiyas nga gihatag sa Dios ngari kanako ug sama sa usa ka batid nga magtutukod, gipahimutang ko ang patukoranan ug lain na ang magtukod sa balay dinhi niini. Apan kinahanglan magmatngon ang tagsatagsa unsaon niya kini pagtukod. 11 Kay wala nay laing patukoranan nga ikapahiluna ni bisan kinsa gawas sa napahiluna na nga mao si Jesu-Cristo.

Sa bersikulo nga atong gibasa, si Apostol Pablo nagtukod o nagpanday og usa ka building nga mao ang mga katawhan nga mitoo sa Ginoo didto sa Corinto. Niangkong siya nga usa siya ka batid nga magtutukod. Nag-ingon pa gani siya nga lain na ang magtukod sa balay dinhi niini. Sa bersikulo 11, ang patukoranan nga iyang gipahiluna mao si Jesu-Cristo.

Mitakdo kini sa mga pulong mismo sa atong Ginoo diha sa Mateo 16:13-18. Naghisgot kana sa pagka-Dios ni Hesus. Sa dihang si Simon gipadaygan sa Langitnong Amahan sa tinuod nga pagkatawo sa atong Manluluwas, nakasulti siya nga si Hesus mao ang Cristo o Mesiyas (Dinihugan o Gibuboan sa Spiritu sa Dios), ang Anak sa buhi nga Dios. Nisulti ang Ginoo: Ibabaw niining bato (patukoranan) tukoron ko ang akong iglesia o simbahan.

Busa, atong masabot ang ang mga magtotoo ni Hesu-Cristo sama diay kini sa usa ka building nga nagkinahanglan og panday o magtutukod, architect og engineer. Gipatindog kini sa usa ka lig-on nga pundasyon nga mao si Hesu-Cristo mismo.

Sa 1 Corinto 3, atong mabasa diha sa bersikulo 16 ug 17 nga nagpadayon siya sa iyang tema nga ang simbahan mao ang TEMPLO SA DIOS diin anhi magpuyo ang Spiritu sa Dios aron sa Iyang paglihok niining kalibotan. Kini nga analoyiha og paghisama sa usa ka building makita lang gihapon sa Efeso 2:20-22. Niana nga mga bersikulo, si Apostol Pablo nga nagsulat niini alang sa mga balaang katawhan sa Dios sa Efeso, nag-ingon: “20 Gitukod kamo diha sa sukaranan nga gipahimutang sa mga apostoles ug sa mga propeta, ug ang bato nga gisukaran mao si Jesu-Cristo. 21 Diha kaniya gitukod ang tibook balay hangtod nga mahimo kining balaan nga templo sa Ginoo. 22 Uban sa tanang magtutuo, kamo usab nahiusa ngadto kaniya diin nagpuyo ang Dios pinaage sa iyang Espiritu.”

Si Apostol Pedro usab, gipakasama pud niya ang simbahan sa Ginoo sa usa ka building. *“Sama sa mga batong buhi, panuol kamo og ipagamit ang inyong kaugalingon aron pagtukod sa espirituhanong templo diin mag-alagad kamo ingon nga mga balaang mga pari nga maghalad sa espirituhanon ug makapahimoot nga mga halad ngadto sa Dios pinaage kang Jesu-Cristo.” 1 Pedro 2:5.*

Ang katuyoan sa Dios niining atong kapanahonan mao ang paghingpit sa pagtukod sa usa ka dako og lig-on nga spirituhanong edipisyo o building nga mao ang mga magtutuo ni Hesu-Cristo nga gitawag pud nato og IGLESIA o SIMBAHAN aron nga sa umaabot nga panahon, ang simbahan mismo maoy magpakita, magpadayag og magdemonstrar sa pagdayeg og himaya sa Dios.



35

ANG IGLESIA GIPAKASAMA SA PANIMALAY

Ang simbahan gihulagway ingon nga usa ka panimalay o pamilya sumala sa mga mosunod nga bersikulo:

Mateo 10:25

*Busa angayng malipay ang tinun-an kon mahisama siya sa iyang magtutudlo ug ang ulipon mahisama sa iyang agalon. Kon ang pangulo sa **panimalay** ginganlag Beelsebul, unsa pa kaha kangil-ad ang ihingalan sa iyang mga sakop!”*

Galatia 6:10

*Busa samtang may kahigayonan kita, buhaton ta ang maayo ngadto sa tanang mga tawo labi na gayod sa atong **isigkamagtutuo**.”*

Ang isigkamagtutuo niini nga bersikulo mabasa sa English nga hubad nga household o panimalay.

Efeso 2:19

*Busa kamong mga dili Judio dili na mga langyaw o mga dumuduong kondili mga kauban na sa katawhan sa Dios ug mga **sakop na sa iyang banay**.”*

Hebreohanon 3:3

*Ang nagtukod sa usa ka **balay** mas dakog dungog kay sa maong **balay**. Sa samang paagi, si Jesus takos sa labaw pa kaayong himaya kay kang Moises.”*

Hebreohanon 3:6

*Apan si Cristo masinugtanon sa iyang pagka-Anak nga maoy gipiyalan sa **balay** sa Dios. Kita mao ang iyang **balay** kon ampingan nato ang atong pagsalig ug magmapasigarbohon kita sa atong gilaoman.”*

Sumala sa mga bersikulo nga atong gibasa, atong makita nga ang Iglesia o simbahan usa diay ka pamilya o panimalay o banay o balay sa Dios ug nga si Ginoong Hesu-Cristo mao ang gipiyalan og nagdumala niini.

36

ANG IGLESIA GIPAKASAMA SA LAWAS SA TAWO

Daghang mga reperensiya sa Ikaduhang Kasabotan alang sa simbahan nga gihulagwayan ingon nga Lawas ni Cristo.

Roma 12:5

*Kita usab, bisan daghan, usa lamang ka **lawas** nga nahiusa diha kang Cristo ug nalambigit kita sa usag-usa ingon nga nagkalainlaing bahin sa usa ka lawas.”*

1 Corinto 12:12-13

*Si Cristo sama sa usa ka **lawas** nga may daghang bahin. Bisan kon nagkalainlain ang mga bahin niini, usa ra gihapon kini ka lawas. 13 Ang uban kanato mga Judio, ang uban dili. Ang uban mga ulipon ug ang uban usab dili. Apan kitang tanan gibunyagan diha sa usa ka lawas pinaagi sa mao gihapong Espiritu ug kitang tanan nakig-ambit pag-inom sa usa ka Espiritu.”*

1 Corinto 12:27

*Busa kamong tanan **lawas** ni Cristo ug ang usag-usa bahin niini.”*

Efeso 1:22-23

*Gibutang sa Dios ang tanan ubos sa pagmando ni Cristo ug alang sa simbahan gihimo siyang pangulo nga labaw sa tanan. 23 Ang simbahan mao ang **lawas** ni Cristo, ang kahingpitan niya nga mao ang naghingpit sa tanang butang.*

Efeso 4:4

*May usa lamang ka **lawas** ug usa ka Espiritu ingon nga may usa lamang ka paglaom ug alang niini gitawag kamo sa Dios.”*

Efeso 4:12

*Gihimo niya kini aron sa pag-andam sa tibuok katawhan sa Dios alang sa buluhaton sa Cristohanong pag-alagad aron motubo ang **lawas** ni Cristo”*

Efeso 4:16

*Diha kang Cristo magkahaom ang tanang mga bahin sa **lawas** ug magkadugtong ang tibuok **lawas** pinaagi sa tagsatagsa ka lutahan niini. Busa kon molihok ang tagsatagsa ka bahin sumala sa katungdanan niini, ang tibuok **lawas** motubo ug molig-on sa iyang kaugalingon pinaagi sa gugma.”*

Ang lawas sa tawo, nga naporma sumala sa pagtinabangay sa matag bahin niini sama sa kamot, tiil, tuhod, hawak, panit, tina-e, ug daghan pa, gigamit usab ni Apostol Pablo aron sa pagpasabot kon unsa ang simbahan nga giatiman sa atong Ginoo.

Nagpasabot kini nga ang matag usa ka tawo sa simbahan importante og gikinahanglan. Ang matag-usa kanato nagkinahanglan sa usa'g-usa. Busa, kon dili

kita mohigugma sa atong isigkamagtutuo, tabla ra kini nga wala ka nahigugma sa imong kaugalingon.

Juan 13:34-35

“34 Maghatag ako kaninyog bag-ong sugo: paghigugmaay kamo. Ingon nga ako nahigugma kaninyo, paghigugmaay usab kamo. 35 Kon maghigugmaay kamo, mahibalo ang tanan nga kamo akong mga tinun-an.”



37

ANG IGLESIA GIPAKASAMA SA USA KA PANGASAW-ONON

Sa Efeso 5:22-23, si Apostol Pablo naghulagway sa relasyon sa magtiayon nga bana og asawa aron sa pagpasabot kon unsa pud ang relasyon sa Iglesia o simbahan ngadto kang Ginoong Hesus. Niini nga mga bersikulo, atong mabasa nga ang simbahan daw usa ka pangasaw-onon ni Ginoong Hesu-Cristo.

Efeso 5:22-23

“22 Mga asawa, tahora ug sunda ninyo ang inyong bana sama nga nagtahod ug nagsunod kamo sa Ginoo. 23 Kay ang bana mao ang ulo sa iyang asawa ingon nga si Cristo maoy ulo sa simbahan ug si Cristo mismo mao ang Manluluwas sa simbahan nga mao ang iyang lawas.”

Daghang magwawali nga naglisud og sabot sa kamatuoran nga ang pag-atiman ni Ginoong Hesu-Cristo sa simbahan daw iya kining asawa og iyang lawas. Apan, klaro man ang sinulat ni Apostol Pablo ngadto sa mga santos sa Efeso nga ang simbahan lawas (Body) og pangasaw-onon (Bride).

Obserbari kon giunsa pagkuyog ni Apostol Pablo ang duha diha Efeso 5:30-32.

*“30 kay mga bahin man kita sa iyang lawas. 31 Sumala sa giingon sa kasulatan, “Tungod niini ang lalaki mobiya sa iyang amahan ug inahan ug motipon sa iyang asawa ug silang duha mahimong usa.” 32 May dakong kahulogan kining bahina sa kasulatan ug sa akong hunahuna nagpasabot kini kang **Cristo ug sa simbahan.**”*

Gikan sa lamdag sa bersikulo, makita nato nga ang dako og kinatibok-an og Universal nga simbahan ni Ginoong Hesu-Cristo napresentar sa Ikaduhang Kasabotan ingon nga:

- A. Edipisyo o building nga gipatindog diha sa sukaranan nga mao si Hesu-Cristo;**
- B. Panimalay nga gidumala og giatiman ni Hesu-Cristo;**
- C. Usa ka lawas diin si Hesu-Cristo mao ang ulo; ug**
- D. Pangasaw-onon (Bride) ni Ginoong Hesu-Cristo nga mao ang pamanhunon (Bridegroom).**

Ato usab nga makita nga adunay lamay usa ka tinuod og universal nga simbahan- usa ka edipisyo o building, usa ka panimalay, usa ka lawas, ug usa ka pangasaw-onon - bisan tuod og ang mga katawhan tungod sa nagkadaiyang mga rason, nagkabahin-bahin, may panaglahi sa mga doktrina og may daghang denominasyon sulod sa usa ka tinuod nga simbahan ilalom sa Ikaduha nga Kasabotan. Dili kini makaayo sa usa ka lawas ni Cristo. Gani, ang nahitabo lang nga pagbahin-bahin sa unang siglo nga simbahan sa Ginoo mao lang ang pagtugot nga may organisasyon sa mga pundok nga nagtigom sa mga kabalayan sa nagkalain-laing lugar tungod kay dili man kaayo sila maatiman sa mga apostoles tungod sa kalayo.

Apan, wala kadto nagpasabot nga nibulag sila og wala na nagpailalom sa mga apostoles og mga propeta.

Sa atong panahon, nganong dali ra ang sip-ak og panagbulag sa mga magtutuo? Tungod kay halos ang tanang mga ministro puro lamang mga pastor; ug wala silay gitahod nga mga propeta og mga apostoles nga may awtoridad nga gihatag sa Ginoo aron sa paghan-ay sa Iglesia og pagdihug kon kinsay angayan ibutang sa mga ministeryo.



38

ANG MATAG-USA INGON NGA BAHIN SA LAWAS NI CRISTO

Sayon lamang sabton ang tinuod nga kinaiyahan sa simbahan kon nabasahan na nimo ang nag-una niini nga upat ka topiko. Gikan sa upat ka mga analohiya, mas maklaro pa gayud nato ang atong kaimportante ingon nga sakop sa simbahan. Sumala sa mga gipakita ni Apostolo Pablo nga mga analohiya, atong nasabtan nga ang simbahan diay sama sa usa ka:

-Edipisyo o building (gambalay) nga gipatindog diha sa sukaranan nga mao si Hesu-Cristo;

-Panimalay nga gidumala og giatiman ni Hesu-Cristo;

-Usa ka lawas diin si Hesu-Cristo mao ang ulo; ug

-Pangasaw-onon (Bride) ni Ginoong Hesu-Cristo nga mao ang pamanhunon (Bridegroom).

Daghan ang nagdahom sa atong panahon nga kon ang makadawat na sila og titulo sa ilang lokal nga tigom mao na kini ang maghatag nila og kasigurohan nga sila sakop gayud sa kinatibok-an nga simbahan sa Ginoong Hesu-Cristo. Dili kini ingon-ani ang pamaagi. Kung gusto kita makasiguro nga sakop kita sa universal church (kinatibok-an o kinahupngan nga iglesia) bisan tuod og naa ra kita niapil og tigom sa mga anak sa Dios diha sa usa ka sitio, atong basihan ang upat ka analohiya kung aduna ba kitay relasyon o partisipasyon niini.

1. MGA BUHING BATO KITA DIHA SA GAMBALAY (edipisyo o building)

Natudlo-an na kita ni Apostol Pablo nga ingon nga magtutuo ni Hesu-Cristo, ***“Efeso 2:20*** *Gitukod kamo diha sa sukaranan nga gipahimutang sa mga apostoles ug sa mga propeta, ug ang **bato nga gisukaran** mao si Jesu-Cristo. 21 Diha kaniya gitukod ang tibook balay hangtod nga mahimo kining balaang templo sa Ginoo. 22 Uban sa tanang magtutuo, kamo usab nahiusa ngadto kaniya diin nagpuyo ang Dios pinaage sa iyang Espiritu.*”

Ug si Apostol Pedro usab nag-ingon, ***“Paduol kamo sa Ginoo, ang buhing bato*** *nga gisalikway sa mga tawo apan gipili sa Dios ug iyang giisip nga bililhon. Sama sa mga **batong buhi**, panuol kamo og ipagamit ang inyong kaugalingon aron pagtukod sa espirituhanong templo diin mag-alagad kamo ingon nga mga balaang mga pari nga maghalad sa espirituhanon ug makapahimoot nga mga halad ngadto sa Dios pinaage kang Jesu-Cristo.*” **1 Pedro 2:5**

Busa klaro ang kamatuoran nga mahimo lamang kita nga sakop sa simbahan sama sa usa ka gambalay o building kon kita mismo nitoo nga buhing bato usab kita nga gikinahanglan ihalad og ipagamit ang atong kinabuhi aron matukod ang usa ka maayo og lig-on nga edipisyo (building) pinaage sa atong pagduol sa Ginoo ingon nga mao ang CHIEF CORNERSTONE o BATO NGA GISUKARAN.

2. NATAWO KITA DIHA SA PANIMALAY

Sa Galatia 4:6-7, si Apostol Pablo nagsulat: *“6 Aron sa pagpaila nga kamo iyang mga anak, gipadala sa Dios ang Espiritu sa iyang Anak nganhi sa atong kasingkasing, ang Espiritu nga nagtuaw, “Amahan ko!” 7 Busa dili na kamo ulipon kondili anak na. Ug tungod kay kamo iya nang anak, ang Dios maghatag kaninyo sa tanan nga anaa kaniya.”*

Ang panimalay pwede nga naay makapuyo nga mga ulipon o mga sulogoon, pwede pud nga modawat og mosaka lang o mga boarders nga mopuyo sa makadiyot og mawala ra pud sumala sa ilang gusto; apan kita naapil sa panimalay sa Dios tungod kay gianak ta sa Dios pinaage ni Ginoong Hesu-Cristo. Nahisakop kita sa panimalay sa Dios diin Siya mismo ang atong Amahan; ug ingon nga mga anak sa Dios, naka-ambit kita sa tanang panulondon sa sakop sa panimalay.

3. NAMIYEMBRO KITA SA LAWAS NI CRISTO

Nahimo kitang apil sa Lawas ni Cristo pinaage nianang tanan apan sa kasayon nga paagi nga mao ang atong pagbunyag diha sa Espiritu sa Dios nga maoy pinaka-importante, ulahi nalang ang bautismo sa tubig. Mao kini ang atong pagpaila og kita magtutuo og sakop sa Ginoo.

*1 Corinto 12:13- “Ang uban kanato mga Judio, ang uban dili. Ang uban mga ulipon ug ang uban usab dili. Apan kitang tanan **gibunyagan** diha sa usa ka lawas pinaagi sa mao gihapong Espiritu ug kitang tanan nakig-ambit pag-inom sa usa ka Espiritu.”*

Nahimo kitang **“miyembro ni Cristo”** tungod kay mituo og midawat kita sa iyang Espiritu nga nagpuyo na diri kanato. Buhi og mahinungdanon kini nga pagkahiusa; ug si Hesus mao ang ulo sa lawas.

4. KABAHIN KITA SA PANGASAW-ONON NI CRISTO

Ang relasyon sa matag magtutuo ni Ginoong Hesus ngadto kaniya gipasabot diha sa 1 Corinto 6:17, *“Apan siya nga nahiusa sa Ginoo, nahiusa kaniya diha sa espiritu.”*

Ang sama nga punto mabasa pud sa **2 Corinto 11:2-** *“Nangabubho ako alang kaninyo sama gayod sa Dios kay sama man kamo sa putli nga dalaga nga akong gisaarang ipakasal sa usa lamang ka lalaki nga mao si Cristo.”*

Busa, ingon nga kabahin sa pangasaw-onon ni Cristo sa espirituhanon, kita iyang giampingan, gimahal, giatiman ug giisip nga nahiusa na kaniya. Hallelujah!

Gikan sa mga ilustrasyon mahitungod sa relasyon sa simbahan ngadto kang Hesu-Cristo nga atong nakat-onan, tataw kaayo nga ang pagkamiyembro sa matag-tawo diha sa simbahan dili diay kini resulta sa atong pormal nga apil-apil og mga tigom sa mga Cristohanon o tungod ba kay naa ang atong ngalan sa listahan sa mga nag-apil sa ministry o sa pag-alagad diha sa mga Cristohanong bulohaton; apan diha tungod diay sa atong pakigpersonal nga pagsinati sa pagtuo ni Hesu-Cristo, pagdawat sa Espiritu sa Ginoo ug pakighiusa kaniya sa kasingkasing og huna-huna

pinaage sa pagpailalom sa awtoridad sa Iyang Pulong. Sa kasayon, gitawag kini nato og **PERSONAL NGA KALUWASAN o ANG PAGPAKATAWO DIHA SA ESPIRITU.**

Sa laing bahin, posible usab sa usa ka tawo nga nituo na siya ni Ginoong Hesus, midawat na sa Espiritu sa Ginoo, ug mituo pud siya nga ang Pulong sa Dios mas importante kaysa pulong sa tawo, apan tuyoon gyud niya nga dili siya moapil sa pundok sa mga ubang magtutuo nga adunay regular nga tigom o tapok. Dili kini makaayo ingon nga apil sa lawas ni Cristo. Hunahunaa, unsay mahitabo sa imong tudlo o kidney kon mabulag sa lawas? Madaot og makadaot kini.

Si Apostol Pablo nagsulat kang Timoteo, *“19Apan ang lig-on nga sukaranan nga gipahimutang sa Dios dili gayod matarog ug niini nahisulat kining mga pulonga: “Nakaila ang Ginoo sa mga iya” ug “Ang tanan nga nagsangpit sa ngalan sa Ginoo kinahanglan dili na magbuhat ug daotan.” (2 Timoteo 2:19).*

Ang pagpahisakop sa tanang maayo nga paagi sa usa ka lokal nga simbahan o (local/house church) kinahanglan kini nga mosunod dayon homan nga ang usa ka magtutuo nahisakop sa usa ka kinatibok-an nga lawas ni Cristo (Universal church). Gani ang **Hebreohanon 10:25** nag-ingon, *“25Dili nato undangon ang batasan sa panagtigom sama sa gibuhat sa uban. Magdasigay hinuon kita labi na kay nasayod kamo nga hapit na moabot ang Adlaw sa pagbalik sa Ginoo.”*

Ang matag-usa kanato nagkinahanglan nga matapo og matipon sa usa’g-usa ingon nga parti sa lawas ni Cristo aron nga matukod, maporma, malig-on, magdinasigay, mag-alagaray, magtinabangay, mag-uban sa pagsimba, matudloan ug mapanton o madisipina ilalom sa awtoridad sa mga pinili sa Ginoo nga mao ang mga apostoles, propeta, ebanghelista, pastor og mga magtutudlo. Kay ang tinuod nga nagpasakop o nagpailalom sa Ginoo, nagpailalom pud sa pinadala sa Ginoo. Adunay daghang mga kasimbahan o mga magtutuo nga kusog mosukol og mga alagad sa Ginoo. Gatuo man gud sila nga material o pisikal ang gibasihan sa Dios. Apan dili, ang kasingkasing o espiritu sa usa ka tawo maoy gibasihan sa Dios. Mapaubsanon ang iya sa Dios.

39

UNSAON PAGTUKOD SA IMONG KINABUHI?

MATEO 7:24-27

24“Busa ang tanan nga nakadungog sa akong gisulti ug nagtuman niini mahisama sa usa ka maalamong tawo nga nagtukod sa iyang balay diha sa bato. 25Sa dihang mibundak ang ulan ug mibaha ang mga suba ug ang hangin mihapak ug mikusokuso niadtong balaya, wala kini matumba kay natukod man diha sa bato.

26“Apan ang tanan nga nakadungog sa akong gisulti ug dili motuman niini, mahisama sa usa ka tawong buangbuang nga nagtukod sa iyang balay diha sa balas. 27Sa dihang mibundak ang ulan ug mibaha ug ang hangin mihapak ug mikusokuso niadtong balaya, natumba kini ug nagun-ob!”

Sumala sa atong nabasa, ang Ginoong Hesus nagstorya mahitungod sa duha ka magtutukod: ANG MAALAMON ug ANG BUANGBUANG. Ang buangbuang nga tawo nagtukod sa iyang balay diha sa balas. Unsay may dangatan niini nga balay? Sigurado gayod nga kung adunay tubig mabungkag ug mabanlas kini sa madali. Samot na kung adunay baha ug hangin nga mukusokuso sa balay nga iyang gitukod.

Adunay puy mga tawo nga gidayeg sa Ginoo tungod kay maalamon sila sa pagtukod sa balay. Sama sila sa usa ka magtutukod nga gihisgotan sa Ginoo nga ang iyang balay gitukod diha sa bato. Kay sa panahon nga mobundak ang ulan ug mobaha ang mga suba ug ang hangin mohapak ug mokusokuso sa iyang balay, dili kini matumba kay natukod man ang balay diha sa bato. Gani, adunay gustong ipasabot ang Ginoong Hesus gikan niana nga storya kay sumala sa bersikulo 24, siya niingon: “*“Busa ang tanan nga nakadungog sa akong gisulti ug nagtuman niini mahisama sa usa ka maalamong tawo nga nagtukod sa iyang balay diha sa bato.”*

Daghan man kitang angay ipasabot gikan niini nga storya, apan dili nalang nato himoong kuti ang pagtuon aron mas makuha nato ang mas importante nga pagtulon-an. Sa sinulat ni Santiago diha sa Biblia, daghan siyang gipangtudlo bahin sa pag-aplikar sa mga teksto nga natudlo sa Ginoo, sa mga propeta ug sa mga apostoles. Ang entrada niya nga mga pulong nagtudlo og tulo ka ehemplo o sumbanan kung unsaon nato pagkahibalo nga kita nag-aplikar ba sa pulong sa Dios o wala.

Una, diha sa Santiago 1:26, siya nag-ingon:

“Kon may nagtuo nga siya relihiyoso apan wala magpugong sa iyang dila, walay kapuslanan ang iyang tinuohan ug naglimbong siya sa iyang kaugalingon.” Ang gipasabot ni Santiago nga kung ganahan kita nga matukod ang atong kinabuhi, angay kitang magpugong sa atong sinultihan. Dili kita magpataka o magpasagad og buhi og mga storya o mga pulong.

Ikaduha, diha sa bersikulo 27, siya nag-ingon:


“Alang sa Dios nga Amahan, ang putli ug matuod nga tinuohan mao ang pag-atiman sa mga ilo ug mga biyuda sa ilang kalisod ug ang pagmatngon nga dili kabulingan ang iyang kaugalingon sa kangil-ad sa kalibotan.” Sumla sa bersikulo 27, angay kitang makabaton og putli ug matuod nga tinuohan o relihiyon. Apan, ang

relihiyon nga gipasabot niya dili ang unsay ngalan sa pundok o denominasyon, kondili mao ang pagbaton og kasing-kasing sa pag-atiman sa mga nanginahanglan sama sa biyuda sa ilang panahon sa Israel nga walay katungod moangkon sa bahandi sa ilang mga bana tungod kay maoy ilang kustombri (custom) kaniadto, og sa pag-atiman usab sa mga bata nga walay ginikanan.

Ikatulo, anaa lang gihapon mabasa sa Santiago 27: “...**ug ang pagmatngon nga dili kabulingan ang iyang kaugalingon sa kangil-ad sa kalibotan.**” Ang ikatulo nagpahibalo kanato nga pwede diay mabulingan ang atong kaugalingon sa kangil-ad sa kalibotan. Sama nga ang atong ba-o nga pinalit nga sininang puti, kung dili kita magbantay, basin inig gawas nato sa balay mapiksan kini sa lim-aw nga anaa sa kalsada nga naagian sa usa ka motorsiklo o dakong salakyan. Busa, kung gikinahanglan nato nga magbantay sa atong sinultihan ug magbaton kita og kasing-kasing nga matinabangon, gikinahanglan usab ang maayo og Diosnon nga panghuna-huna pinaage sa pagpapuno sa atong kaugalingon sa mga pulong sa Dios.

Kining tulo nga atong gihisgotan dili mao ang gikinahanglan o requirements aron ka maluwas. Apan, mao kini ang mga pipila ka mga ebidensiya nga ikaw anak sa Dios. Unsa may benepisyo kon ato kining buhaton? Sigurado gayod ang pinasahe nga kalipay og katagbawan ang imong masinati dinhi niining kalibotana og bisan pa man sa sunod nga kinabuhi. Gani sa Langit, may mga ganti, korona og trono nga ihatag gikan sa atong Ginoo. Hallelujah!

Ang maalamon nga magtutukod dili lang maayo maminaw sa Pulong sa Dios, apan moaplikar usab sa iyang nadungog nga mga prinsipyo sa Dios. Amen!



40

NGANONG MOSANGYAW MAN KITA SA EBANGHELYO?

1 TESALONICA 2:19-20 (APSD)

19 Buot namong mobalik diha kaninyo tungod kay kamo ang among kalipay ug may pagsalig kami kaninyo. Ug kon moabot na ang atong Ginoong Jesus, makapasigarbo kami bahin kaninyo. 20 Kay kamo ang among garbo ug kalipay.

Adunay ganti- mao ang korona o purong-purong nga ihatag sa Ginoo ngadto sa mga tawo nga nagkabig og ubang mga tawo aron motuo og modawat sa gugma og sa pagka Ginoo ug Manluluwas ni Hesu-Cristo. Ang tawag ani nga korona mao ang “KORONA SA KALIPAY”. Adunay pito ka korona ang ihatag sa Ginoo sa mga tawo nga makasulod sa iyang dapit. Mao kini ang:

1. **Korona sa Kinabuhi (Crown of Life).** Santiago 1:12
2. **Korona sa Magdadagan o Korona nga Dili Madugta (Imperishable Crown or Runner's Crown).** 1 Corinto 9:24-27
3. **Korona sa Kalipay (Crown of Rejoicing).** 1 Tesalonica 2:19-20
4. **Korona sa Pagkamatarong (Crown of Righteousness).** 2 Timothy 4:5-8
5. **Korona sa Himaya (Crown of Glory).** 1 Pedro 5:2-4
6. **Korona sa Nagmadaugon (Overcomer's Crown).** Gipadayag 3:11
7. **Korona sa Namatay tungod sa Pagtoo (Martyr's Crown).** Gipadayag 2:10

(ALANG SA DUGANG NGA MGA DETALYE MAHITUNGOD SA PITO KA MGA KORONA NGA MADAWAT SA MGA MAGTOTUO NI GINOONG HESU-CRISTO, PANGITAA SUMPAY NIINI NGA LIBRO -ANG PAGTULON-3 o ang IKATULO NGA CEBUANO NGA LIBRO SA CORNERSTONE BELIEVERS CHURCH.)

Sa pito ka mga korona o ganti nga pwedeng madawat nimo, ang usa niini nga mao ang Korona sa Kalipay mao ang gisaad sa Ginoo alang niadto mga nagkugi sa pagsangyaw og pagmatuto sa mga tawo diha sa Cristohanong pagtulon-an.

Si Apostol Pablo nagsulat, “*19 Buot namong mobalik diha kaninyo tungod kay kamo ang among kalipay...*”. Ang pinakadako nga pribiliheyo nga gihatag sa Ginoo kanimo mao nga gipiyalan ka Niya sa bulohaton sa pagsangyaw sa Maayong Balita. Pwede man nga Siya ra mismo ang mosangyaw sa tawo sa bisan unsa nga paagi. Pwede diha sa vision (panan-awon) sama sa pagkabig niya kang Saulo o Pablo, pwede pud sa damgo, pwede pud Siya mosugo og laing tawo o anghel ba; ug daghan pa. Apan, pagkaanindot ba nga gipiyalan niini nga pribiliheyo. Ngano? Tungod kay may ganti kini nga katumbas nga dili matapos, nagpasabot nga hangtud sa kahangtoran na.

Ang tanan nga makasulod sa Gingharian sa Langit malipayon gayod. Apan, adunay pinasahe nga kalipay niadtong mga tawo nga makadawat og ganti. Sama ba sa mga estudyante nga nakahoman sa pagskwela. Magmalipayon sila kay makagraduate na. Apan, lahi ang kalipay niadto mga estudyante nga makadawat og mga awards, medalya og mga dungog (honors).

Sa Biblia, adunay mga bersikulo nag nasulat nganong mosangyaw og mokabig kita og mga tawo:

1. Tahoron ug tawagon ka nga “maalamon” kon makakabig ka og kalag.

Panultihon 11:30 (APSD) “30Ang binuhatan sa tawong matarong makatabang sa uban nga mahimong motarong ug motaas ang ilang mga kinabuhi. Ug maaghat niya ang mga tawo sa iyang kaalam.”

2. Nagluwas ka sa kalag sa uban kay imo man gibuhat ang gisugo sa Ginoo kanimo.

Santiago 5:20 (APSD) “angay ninyong masayran nga ang magpabalik sa makasasala gikan sa iyang daotan nga paggawi maoy magluwas sa kalag niadtong makasasala gikan sa silot nga kamatayon, ug mapasaylo ang daghang mga sala.”

3. Makapahugyaw sa kalipay kini sa mga anghel sa Langit.

Lucas 15:10 (APSD) “Unya miingon si Jesus, “Sama usab niana ang kalipay sa mga anghel sa Dios sa langit kon ang usa ka makasasala maghinulsol.”

4. Modan-ag ikaw sama sa bitoon o mosikat ikaw hangtud sa kahangtoran.

Daniel 12:3 (APSD) “Ang mga maalamon ug kadtong nagatudlo sa mga tawo sa pagkinabuhi nga matarong mosidlak sama sa mga bitoon sa langit sa walay kataposan.”

Usahay mogasto man kita og panahon, kwarta, pailob og kusog sa pagbuhat niini, apan dili kini ikatandi sa kalipay nga atong madawat gikan sa Hari sa Langit. **1 Corinto 15:58-** “Busa, mga hinigugma ko nga mga igsoon kang Cristo, pagpakalig-on kamo ug dili gayod matarog sa inyong pagtuo. Pagmakugihon kamo sa buluhaton nga gihatag kaninyo sa Ginoo, kay nasayod kamo nga may kapuslanan gayod ang inyong mga paghago alang sa Ginoo.”



Kung gusto ka og dugang nga kopya niini, mao ni ang mga pwede nimo nga kontakon:

Globe Mobile #: 09175261340

Sun Mobile #: 09258761280

Email address: cornerstonebelievers@gmail.com

Facebook: Bj Mascardo